

# BOWI IWAIING MATIU MENE GAENA

*Matiu, nung Yesura buro-mani 12 auna zo. Yazo nuna zo Lewi. Nung Yesura ungwe Yuda emo otao mani nuna eno gaena, arare nung porofetera ge gayao witao awiya ge nuna-una susuuno gaena. Awiya Yesu nung Yuda emora Mesia me awiya gipai gaese sero ayero yena ara. Ungwe-maungwe witao Yesu mene yero nasani nauna awiya Matiu mene gaena arauwa.*

---

**Yesu Kristora aya-ewowo auna yazo.**

*Lu 3:23-38*

- 1** <sup>1</sup>Emo kasa yero butunawe duwa Yesu Kristo nung Abrahamto Dawidira saisibuna nunato zo mene kasa yena, auna ungwe.
- 2** Abraham nung Isakara maung.  
Isaka nung Yakobora maung. Yakobo nung Yuda meta maingne auna maung.
- 3** Yuda nung Pereseto Zerara maung. Ai nunato awiya Tema. Perese nung Hesronna maung. Hesron nung Ramuna maung.
- 4** Ramu nung Aminadapra maung. Aminadap nung Nasonna maung.  
Nason nung Salamonna maung.
- 5** Salamon nung Boasira maung. Boasira ai awiya Rehap. Boasi nung Obedera maung. Obedera ai awiya Ruti. Obede nung Zesira maung.
- 6** Zesi nung emo tuwa Dawidi auna maung. Dawidi nung Solomonna maung. Solomonna ai awiya Yurayara bauno noi.
- 7** Solomon nung Riaboamna maung. Riaboam nung Abaisara maung.  
Abaisa nung Asara maung.
- 8** Asa nung Yeosofatra maung. Yeosofat nung Yoramuna maung.  
Yoramu nung Usayara maung.
- 9** Usaya nung Yotamuna maung. Yotamu nung Ahasira maung. Ahasi nung Hesekayara maung.
- 10** Hesekaya nung Manasara maung. Manasa nung Amosira maung.  
Amosi nung Yosayara maung.

- <sup>11</sup> Yosaya nung Yekonaya metamani nuna aune auna maung. Be aune Yuda emora iwo mene awong bunero puro baung tawing Babilon auna yewa. <sup>12</sup> Awong puro baung Babilon yewa aune Yekonaya nung Siatelira maung.
- Siateli nung Zerababora maung.
- <sup>13</sup> Zerababo nung Abiudura maung. Abiudu nung Elayakimna maung. Elayakim nung Azora maung.
- <sup>14</sup> Azo nung Zedokra maung. Zedok nung Akimuna maung. Akimu nung Eliudura maung.
- <sup>15</sup> Eliudu nung Eleasara maung. Eleasa nung Matanna maung. Matan nung Yakobora maung.
- <sup>16</sup> Yakobo nung Yosefera maung. Yosefe nung Mariara yu ara. Ora Maria mene zo mani Yesu Sorao emo naname yazo nuna Kristo awiya puna.
- <sup>17</sup> Kasa yao awena awiya eyero kasa yero bumuwa era. Abrahamna una atu kasa yero butunawe duwa Dawidira una atu kasa yena, awiya kasa yao dubu awong 14 yewa. Ora Dawidira una atu kasa yero butunawe duwa iwo mene Yuda ema puro baung Babilon tawingna yewa awiya kasa yao dubu dekaongka deka aine 14 yewa. Ora be auna atu kasa yero butunawe duwa Kristo kasa yena awiya dekaongka deka aine kasa yero dubu 14 yewa arauwa.

**Yesu kasa yao nuna-una ungue.**

*Lu 2:1-7*

<sup>18</sup> Yesu Kristo kasa yena auna susuwa awiya eyero mitiya era. Ai nuna Maria nung Yosefe eno sero gerewa nasani nauwato ara. Arata awongto oko tayao sero gerao gege gerewa newato Oweno mene tani putoungne yenu Maria mesa yena ara. <sup>19</sup> Ayero yenu yu gerao nuna Yosefe nung etutero nasani nauna, arare dubo nuna mene eyero kotuna, “Na nung saingtiro yangduwari nena. Nung ugaing yetiya auna na nung gera pugana meng goiye sero, saingtiro kora yero yangduwarinena.” Ayero sena ara. <sup>20</sup> Ayero yari kotupunasani nenu Tuwara angelo zo mene nung eno atiyora atu kasa yero eyero sena, “O Yosefe, ning Dawidira sai, bauno gerao nina Maria pumari nasani kotung-katung oko yase. Bauno mesa yetiya awiya mani Owenona ara. <sup>21</sup> Mani emodi pumariniya nung amimene dubu nuna pasena nunae-una abena auna atu sorero pumariniya, aeno yazo nuna Yesu yause.” Angelo mene ayero sena ara. Yazo auna susuwa awiya Tuwa Bayau Sorao Emo ara.

<sup>22</sup> Nona apakana kasa yena awiya porofete zo mene Tuwara bera ge eyero sena awiya me yaise kasa yena ara.

<sup>23</sup> Sana nigipu. Mani baunodi zo gitau emo zore oko tayao amimene mesa yero mani emodi pumariniya auna yazo nuna Emanuel

ayero sarineya. (Ge naname una “Tuwa Bayau mene name aune dema noiya.”)

<sup>24</sup>Yosefe atiyo nenu Tuwara angelo mene ge nung eno sena, awiya nigiro giro seka yero iropuro ge diungno Maria puro witi garo nuna-una yena ara. <sup>25</sup>Arata yu aro oko yao neteto aune mani emodi puna. Punu giro Yosefe mene mani yazo nuna Yesu yausena arauwa.

**Diga emora-una atu emo nigao bainane mene Yesura-una kasa yewa.**

**2** <sup>1</sup>Herode mene emo tuwa yero nasani nauna be aune Yesu nung Betelehem neape Yudaya tawingna atu kasa yena. Kasa yenu aune wari wiwitinoiya auna ina tawing zora emo nigao bainane mene Yerusalem neape kasa yero atata yero sewa, <sup>2</sup>“Yuda emo, emo tuwa ninae mani wuire zo kasa yetiya awiya napo natu mitiye? Nae wari wiwitinoiya auna ina atu arasa nuna giro nuna-una koing gairo nung bowi yari sero butunenane.” <sup>3</sup>Ayero sewa emo tuwa Herode arita Yerusalem napo susuwa awong teng nigiro awang yero sopine yewa ara. <sup>4</sup>Ayero yero Herode mene Yuda emora pirisa babuze aune sao tauyao ge gipiniao emo yausenu augaiwa atata yero sena, “Sorao emo naname awiya napo nauna atu kasa yaise sao ing?” <sup>5</sup>Ayero senu awong eyero sewa, “Betelehem neape Yudaya tawingna atu kasa yaise sao mitiye ara. Auna porofete zo mene Tuwa Bayaura bera ge eyero gaena era,

<sup>6</sup> Betelehem napo, Yudaya tawingna mitiye. Napo awiya Yudaya tawingna napo gitau yao auna wosao zo okowa. Napo auna atu gitau yao bainakama zo kasa yero Isreli emo dubu nana diya yero baingtariniya.”

<sup>7</sup>Ge awiya sewa nigiro Herode mene emo nigao bainane amaze nuna-una opene baese yau senu nuna-una bumuwa ara. Nuna-una bumuwa arasa awiya be noune kasa yeni auna susuwa gari sero nung awong atata yenu sero baingtiwa gigina ara. <sup>8</sup>Sewa giro awong Betelehem neape babaese sero eyero sena, “Niye baungno kaunete taungno giro buro na saya na deka ayero baungno koing gairo nung bowi yane.” <sup>9</sup>Emo tuwa mene ayero senu nigiro bamuwa ara. Bautunewa arasa nunae-una tawingna atu gigiwa dekaongka amimene nagibo gitau yero bautunete garo mani mitina atu dopena ara. <sup>10</sup>Arasa atu dopenu awong arasa giro yawa yawa bainakama yewa ara. <sup>11</sup>Ayero yero awong gare atu toiro mani ai nuna Maria aune awiya giro boma gaero nung bowi nasani maguro nunae waure awiya be apero gol aune nona boingsa sereyao aune nona sere iwaingne a dema puro nung eno pugaiwa ara. <sup>12</sup>Arare Tuwa Bayau mene atiyore awong Herodera una kapetegairo babao awang senu nigiro nagibo zora bautunete tawing nuka nunae-una kasa yewa arauwa.

**Yosefe aro maine puro baung Izip tawingna yena.**

<sup>13</sup>Awong kapetegairo bautunewa Yosefe atiyo nenu Tuwara angelo zo mene nuna-una kasa yero tugata yero eyero sena, “Ning iropuro mani aire puro Izip tawingna baungno atu ge nana diya neupu. Noeno oko,

Herode mene mani kaunete taungno dari siniya.” <sup>14</sup>Ayero senu Yosefe mene iropuro mani aire puro pingne tara yero Izip tawingna bamuwa ara. <sup>15</sup>Awong baungno atu nawe duwa Herode magayena ara. Tani ayao kasa yenu aune ge porofete zo mene Tuwa Bayaura bera eyero sena awiya me yena,

Mani nana Izip tawingna atu nenu  
yau sewang doro kapetegaina.

**Herode mene senu mani mamanikaka witao dewa mamagayewa.**

<sup>16</sup>Emo nigao bainane awong Herode etegairo nagibo ewe bamuwa, awiya Herode mene nigiro tini kapao baina puna. Ayero yero gorobo emo nuna senu baung Betelehem nape yero napo aune napo mamanikaka ziuno mitiwa auna mani emodidi dawang tani etobera atu wosiro bautuniya ayao amaze apakana dero aungkamore yewa. Awiya emo nigao bainane mene arasa kasa yaora be sewa nigina auna teng senu dewa mamagayewa. <sup>17</sup>Ayero yewa porofete Yeremia mene ge zo gitau eyero sena awiya me yena ara,

<sup>18</sup> Rema nape atu bewing kasa yariniya.

Zi saore dubo minaore baina kasa yariniya.

Bauno Reso mene mani mamani nuna eno zi sai  
onggo saya teng oko yariniya.

Noeno oko, mani apakana aung yarineya.

**Yosefe aro maine aune kapetegairo bumuwa.**

<sup>19</sup>Herode magayenu Yosefe Izip tawingna atu nasani atiyo nenu Tuwara angelo zo mene nuna-una kasa yero eyero sena, <sup>20</sup>“Mani daya magayaise sewa awong awiya magateya, arare ning iropuro mani aire puro kapete Isreli tawingna gaipu.” <sup>21</sup>Ayero senu giro Yosefe mene iropuro mani aire puro kapete Isreli tawingna gaiwa ara. <sup>22</sup>Kapetegairo Yosefe mene ge zo eyero nigina, “Akeleas nung maung nuna Heroderia buro puro Yudaya tawingna emo tuwa yero niya ara.” Ge ayero nigiro baungno atu nao awang yena ara. Ayero yero atiyore ge zo nigiro giro Yudaya tawing yangdoro Galilaya tawingna baungna ara. <sup>23</sup>Ayero yero napo zo yazo nuna Nasarete atu baungno nasani nauna ara. Arare porofete mene ge Sorao Emo eno sewa awiya me yena ara. Ge awiya eyero mitiya era,

Nung Nasarete emo ayero sarineya.

**Yohane ge ou zayero suwao emo amimene buro nuna zayena.**

*Mk 1:1-8; Lu 3:1-18; Yo 1:19-28*

**3** <sup>1</sup>Yohane ge ou zayero suwao emo amimene Yudaya tawingna kasa yero eu yanawira atu nasani ge eyero tugata nasani nauna, <sup>2</sup>“Uritira mitoiya amimene nata Tuwa yero nariniya auna be butuniya, arare niye

dubo darawa yepu.”<sup>3</sup> Ge porofete Yesaya mene sena awiya emo auna-una atu me yena. Ge awiya eyao era,

Zo nung eu yanawira soma mani aungna atu wawa sero eyero siniya, “Tuwara nagibo kora yepu korosae.”

<sup>4</sup>Yohane mene taung wori nuna wo kamel tumiza mene gayao amaze puro wosogairo nasani nauna ara. Ayero yero wora aingso mene ipura geing yero diro nasani nauna ara. Ora nona minao nuna awiya pika ou koware amaze mininasani nauna ara.

<sup>5</sup>Yerusalem napora emo bauno enata Yudaya tawingna emo bauno enata ou Yodan enabarata enabara emo bauno apakana nuna-una dowinasani nauwa ara. <sup>6</sup>Ayero yero pasena nunae keregairo yangdoti nauwa aune nung awong ou Yodan auna atu ge ou susunasani nauna ara. <sup>7</sup>Arare Farisayo ta Sadukayo awong ge ou eno nuna-una kasa yewa giro nung awong eno eyero sena, “Yira mani awiso, niye pasenana abena kasa yariniya awiya awang yero daigaese awe mene niye eno sesiye? <sup>8</sup>Niye dubo darawa yarineya auna teng me ninae-ina kasa yaise. <sup>9</sup>Ora taung puro wiwitinasani dubo ninae mene eyero oko sepu, ‘Nae Abrahamna saisibuna, arare Tuwa Bayau mene nae gera oko pugariniya.’ Na sana nigipu. Tuwa Bayau mene sari yero giro sai daba emimene Abrahamna saisibuna kasa yarineya ara. <sup>10</sup>Tuwa Bayau mene oto sosero i susuwara pugainu mitoiya. Arare i zo me iwaing oko iyao yai giro yetero au iyaora gariniya. <sup>11</sup>Niye dubo darawa neya giro na ou gege mene niye ge ou susunena. Na emo wosao gege. Ora emo zo ago bariniya nung amimene zo emo putoung bainane ara. Putoung nuna mene putoung nana daigatiniya. Nune na daigatiniya, arare na emo wosao eyao mene te soga nuna dimao<sup>a</sup> teng oko niya. Nune mene zo Oweno niye eno pugariniya. Nupema niye iyaora pugariniya. <sup>12</sup>Nung tapono wawong nuna mene initiniya. Puro buro wuit mozaora masira kasa yero iwe babaise sero wuit au bisira gariniya. Iwe babai wuit me awiya kora yero puro pu gare gariniya. Ora iwe zo iyao awao gege awinoiya auna augariniya.” Ayero sena arauwa.

#### **Yohane mene Yesu ge ou suwena.**

*Mk 1:9-11; Lu 3:21-22*

<sup>13</sup>Be auna atu Yesu nung Galilaya tawing doro baung Yodan oura yero Yohane mene nung ge ou suwaise sena. <sup>14</sup>Arare Yohane mene giginu teng oko yenu giro abena eyero sena, “Na eyao mene nono yanese buro sinesi? Nine na ge ou suwasa teng yariniya.” <sup>15</sup>Ayero senu Yesu mene ge abena

<sup>a</sup> **3:11** Te soga dimao. Soumai mene emo tuwa nunae-una te soga dipunauwa. Arata Yohane nuka nutope giginu nung Yesura soumani yaine yao teng oko. Noeno oko, Yesu nung witao nibamu, ora Yohane mene zo nung wosao nibamu.

eyero sena, “Ning yeme kotung-katung oko yase. Nao ge dimao buro apakana yanano teng iwaing yariniya.” Ayero senu Yohane mene ge nuna diuna. <sup>16</sup>Ayero ge ou suwenu Yesu mene Yodan ou doro wiwitinasani eyero gigina: Uriti be gausenu Tuwa Bayaura Oweno mene ni audubo ine yero wosiro nuna-una tame daungka yenu gigina ara. <sup>17</sup>Ayero yenu uritira atu ge zo eyero wosina, “Ning Mani nana. Ning yo diyang nana. Na ning eno yawa yawa nena.” Ge ayao wosina arauwa.

**Sanda mene Yesu etegari yena.**

*Mk 1:12-13; Lu 4:1-13*

**4** <sup>1</sup>Sanda Yesu etegaise Oweno mene Yesu yuno puro eu yanawira baungna.

<sup>2</sup>Ayenu Yesu nung iya mume 40 ayao nona semini nasani nete meri magayena ara. <sup>3</sup>Be aune etegaora maung kasa yero eyero sena, “Ning Tuwa Bayaura Mani me yai giro se daba amimene ma yai minase.” <sup>4</sup>Ayero senu giro Yesu mene abena eyero sena, “Aung ara. Noeno oko, ge gayao zo eyero mitiya, Minao taungna a gege mene emo bauno oko soremaise sao mitiya. Tuwa Bayaura una bera atu ge wowosinoiya amaze teng nigit nasani iwaing narineya.”

<sup>5</sup>Ayero senu Sanda mene Yesu yuno puro Tuwa Bayaura dang napo Yerusalem auna baungno ibu bainana enora pugainu witina ara. <sup>6</sup>Ayero yero nung eno eyero sena, “Ning Tuwa Bayaura Mani me yai giro etu sasero wosi. Ning eza oko yarinesa. Noeno oko, ge gayao zo eyero mitiya,

Tuwa Bayau mene sai angelo dubu nuna mene ning diya yarineya.

Ayero nasani te nina daba mene gayoiye sero, awong ning wawong mene soga nasani puro wosarineya.”

<sup>7</sup>Ayero senu Yesu mene awang sero abena eyero sena, “Ora ge gayao zo dema eyero mitiya,

Ning Tuwa Bayau nina amaze gaero gari oko yase.”

<sup>8</sup>Ayero senu Sanda mene nung nupema yuno puro diri witiro baungno dodopinasani tawing sero-sero zamena-simena yao nunae amaze gipena.

<sup>9</sup>A nasani eyero sena, “Boma gitira diro na bowi yarinesa, awiya na nona awiya apakana ning eno pugarinena.” <sup>10</sup>Ayero senu Yesu mene ge abena eyero sena, “Sanda, ning na yangdoro baung. Ge gayao zo eyero mitiya,

Ning Tuwa nina Tuwa Bayau awiya bowi yase.

Nung dekaongka gege sou yarinesa.”

<sup>11</sup>Ayero senu Sanda mene nung yangdoro baungna ara. Sanda baungnu angelo dubu ena kasa yero Yesu kora yewa arauwa.

**Yesu mene Galilaya tawingna baungno buro nuna zayena.**

*Mk 1:14-15; Lu 4:14-15*

<sup>12</sup>Yohane bunao gare pugaiwa mitinu Yesu mene auna bowi nigiro giro tawing awiya yangdoro Galilaya tawingna baungna. <sup>13</sup>Ayero yero

Nasarete napo yangdoro Kapaneam napo maze zo mitao masi nuna yena ara. Napo awiya ou nazi nugu mitiya. Napo awiya Sebulonito Naftalira tawingna atu mitoinya. <sup>14</sup>Ayero baungno mitao masi yenu aune porofete Yesayara ge zo eyero mitiya awiya me yena,

<sup>15</sup>Tawing zo ou nazira ina mitoiya auna atu Sebulonito  
Naftalira saisibuna yero nowa.

Tawing awiya ou Yodan deung enaba atu mitiya.

Tawing auna yazo zo Galilaya.

Emo Yuda oko mene atu kasa yero neya ara.

<sup>16</sup>Tawing auna emo dubu mumena atu neya amimene  
waegao baina garineya.

Magayao awang nasani mumena atu mitima nowa awena una atu  
waegao kasa yariniya.

Yesaya mene ge ayero gaena arauwa.

<sup>17</sup>Be auna atu Yesu mene zayero uritira ge sinasani emo bauno eno  
eyero tugata nasani nauna, “Uritira mitoiya amimene nata Tuwa yero  
nariniya auna be nugu niya, arare niye dabo darawa yepu.” Ayero  
sinauna arauwa.

**Yesu mene buro-mani siwongpatige amimene nung ago yaese sena.**

*Mk 1:16-20; Lu 5:1-11*

<sup>18</sup>Arare wari zore Yesu mene Galilaya ou nazira bage atu nete emo  
etobe metare tatore tauna ara. Zo Simon yazo nuna zo Petoro, aune meta  
nuna Anderea. Awongto wo pumao emo, arare awongto ou auna atu  
moga papati nasani newato tauna ara. <sup>19</sup>Taungno awongto eno eyero  
sena, “Nito bungputo na ago yaeto. Na nito gipana emo pumaora emo  
yaeto.” <sup>20</sup>Ayero senu giro awongto moga nunato mena yangdoro buro  
nung ago yewato. <sup>21</sup>Atu iropuro bautunete emo etobe awongto metare  
deka ayaq ine nupema tauna ara. Yakobo meta nuna Yohane awongto  
Zebedira mani etobe ara. Awongto maung nunato Zebedi aune dema  
wangna atu mitasani moga nunae kora newato giro Yesu mene buro nung  
ago yaetose sena ara. <sup>22</sup>Nung awongto yau senu giro awongto maung  
wangna atu yangdoro nung ago yewato ara.

**Yesu mene kora yao buro yero nasani nauna.**

*Lu 6:17-19*

<sup>23</sup>Yesu mene Galilaya tawing zipunasani Yuda emora yere ibu sero  
witiro ge tugata nasani uritira mitoiya amimene nata Tuwa yero nariniya  
auna Bowi Iwaing tugata nasani emo bauno yaya beraung giti puro  
nasani nauwa awiya kora yero nasani nauna ara. <sup>24</sup>Ayero naunu bowi  
nuna mene Siria tawingna teng yenu nigiro giro emo yaya-biyayare, emo  
iwae sorowe nunae-una mokora mitao, emo ena angzi apunao, arita ena

asama yao amimene kara iropuro nuna-una bamuwa kora yero aung yena ara. <sup>25</sup>Ayero yenu Galilaya tawingna, Dekapolis tawingna, Yerusalem napora, Yudaya tawingna, Yodan deung enabara emo bauno dubu bainakama amimene nuna-una au dekaongna gairo nung ago nasani nauwa arauwa.

**Yesu mene diri atu uriti ge tugata yena.**

*Lu 6:20-23*

**5** <sup>1</sup>Yesu mene emo bauno dubu baina awiya giro diri witiro adungno mitinu buro-mani nuna mene nuna-una nugu bamuwa aune <sup>2</sup>nung ge eyero sinasani emo bauno tugata yena ara.

<sup>3</sup>“Emo dubo nunae gosinowa wowosinoiya awong amimene yawa yawa yaese. Noeno oko, awong uriti napo auna gerao.

<sup>4</sup>Emo dubo mininasani mitowa awong amimene yawa yawa yaese. Noeno oko, Tuwa Bayau mene dubo nunae kora yai awong iwaing yarineya.

<sup>5</sup>Emo yazo nunae puro wowosinowa awong amimene yawa yawa yaese. Noeno oko, awong Maung nunae-una tawing apakana pumarineya.

<sup>6</sup>Emo pewayero nari sero merire maganonane ayao ine yero nowa amimene yawa yawa yaese. Noeno oko, awong pumaya teng yariniya.

<sup>7</sup>Emo ao-diyaore yero nowa amimene yawa yawa yaese. Noeno oko, Tuwa Bayau mene awong ao-diyariniya.

<sup>8</sup>Emo dubo etore oko, dubo dekaongka yero nowa amimene yawa yawa yaese. Noeno oko, awong Tuwa Bayau garineya.

<sup>9</sup>Emo mono kasa yaise buro yero nowa amimene yawa yawa yaese. Noeno oko, awong awiya Tuwa Bayau mene ‘emodi baunodi nana’ ayero sariniya.

<sup>10</sup>Emo ena nao pewayaore yero nowa giro ena mene awong dedunasani buninasani ayero nowa amimene yawa yawa yaese. Noeno oko, awong uriti napora gerao.

<sup>11</sup>Niye dubu nana yero naya giro emo ena mene ge iwinasani yazo niniae puro wowosi nasani niye dero tuninasani ge memeko-mameko niye eno sarineya, awiya niye yawa yawa yepu. <sup>12</sup>Ayero yaya niye dubo iwaing nasani yawa yawa yepu. Noeno oko, niye uritira atu zuma baina pumarineya. Porofete gitau nasani nauwa awong awiya deka ayero dero tuninasani nauwa. Porofetera te weso nunae maze ago nasani nowa, aeno yawa yawa yepu.

**Ge nigao dubu mene biyoung waegaore ine yero nanene.**

*Mk 9:50; Lu 14:34-35*

<sup>13</sup>Wo seka mitete gung yoiye sero, emo wo puro biyoung mene susunowa nimoi-namoi iwaing mitoiya, deka ayero niye tawingna emo

bauno apakana awena una towang atu biyoung ine yero nowa ara. Ora biyoung perusa yariniya, awiya name nono yanane aune mapu nuna nupema kasa yariniye? Aung ara. Biyoung perusa yao awiya meko ayero sero augatinowa emo mene papatinowa.

<sup>14</sup>Niye emo bauno apakana auna waegao ine. Napo zo diri tame daung mokera mitai nona zo mene oko worariniya. <sup>15</sup>Ora name damana gaero au apero mokora pugairo oko wopunonane. Awiya mitao masi nuna-una atu pugati nonane emo bauno garo mokora mitowa awiya teng waegati noiya. <sup>16</sup>Arare waegao ninae mene deka ayero emo baunona una towang atu waegaise. Ayero yai awong nao ninae gaya iwaing yai Maung ninae uritira mitooya awiya bowi yarineya arauwa.

**Yesu nung sao tauyao ge Mose mene gaena awiya sisigari oko buna.**

<sup>17</sup>Niye na eno eyero saneya, ‘Nung sao tauyao ge Mose mene gaena aune porofetera ge awiya disari buna.’ Na eno ayero zo oko sae. Ge awiya aung yaise oko, me yaise kasa yewang ara. <sup>18</sup>Na memokoba sane. Uritire tawingne mitarineyato teng Mosera sao tauyao ge deka ayero mitariniya ara. Ayero nasani Mosera sao tauyao ge agegewa dekaong-dekaong awiya dema mitete oko aung yariniya. Awiya me gege yero aune aung yariniya ara. <sup>19</sup>Arare emo zo mene Mosera sao tauyao ge maingkoka nibamu zo daigati nasani ena mene deka ayero yaese sariniya, awiya uritira mitooya amimene nata Tuwa yero nariniya be aune emo amimene emo wosao nibamu yariniya. Ora zo mene dipunasani ena deka ayero yaese sariniya, nung awiya uritira mitooya amimene nata Tuwa yero nariniya be aune emo baina yariniya. <sup>20</sup>Arare sana nigipu. Niye sao tauyao ge gipao emo aune Farisayo auna etutero nao nunae oko daigao yarineya, awiya niye uriti mokora oko towarineya.

**Sao tauyao ge namba 5 auna susuwa sena.**

*Lu 12:57-59*

<sup>21</sup>Aya ewovo naname eno ge zo eyero sao ara, ‘Ning emo oko dasa magayae. Zo nung mani dai magayariniya, nung awiya ge burora gerao yariniya.’ <sup>22</sup>Arata nane mene zo niye eno eyero tugata nena ara: Zo nung otao nuna eno tini kapao pumariniya, nung amimene ge burora gerao yariniya. Zo nung otao nuna eno ‘Ning mani meko nibamu’ ayero sariniya, nung emo gitau yao dubura augao auna gerao yariniya. Zo nung otao nuna eno, ‘Ning dau dubo siwingyao’ ayero sariniya, nung awiya soma mekora baungno iyaora gerao yariniya. <sup>23</sup>Arare ning aitara dopero nona zo Tuwa Bayau eno pugari sero nasani aune eyero kotumariesea, ‘Otao nana aune dubo meko nanato mitiya.’ <sup>24</sup>Ayero sero nona nina demese pugasa mitai ning baungno otao nina aune ge kora yero aune kapetegairo nona nina aitara pugase. <sup>25</sup>Ning zazra una baungno ge buro

yasese saya giro oko kasa yaore nagibe atu nasani aune emo ning gera pugatiniya aune ge mena kora ye. Ayero oko yao yasa iwo nina mene ning mena zazra una pugairo susuwa nina sai zaz mene gorobo emo nuna eno sai, ning bunao gare pugariniya. <sup>26</sup>Na meba sane. Ning ayero mitete tebeba oko kasa daung yarinesa. Otao nina-una abena pugasa aung yero baingtai aune ning kasa daung yarinesa arauwa.

**Sao tauyao ge namba 6 auna susuwa sena.**

<sup>27</sup>Aya ewowo naname eno ge zo eyero sao ara: ‘Ning kuma oko yase.’ <sup>28</sup>Arata nane mene zo niye eno eyero tugata nena ara. Emo zo mene bauno zo giro dubo-dubo yariniya, awiya nung bauno aeno dubo mene kuma yetiya ayero yariniya. <sup>29</sup>Arare diti moko nina zo mene pasena yasese yai giro diti moko awiya zokero augarinesa. Taung nina zere-tutupore puro nasa soma meko iyaore auna atu augaya babosi sero saineba diti moko nina zo gera ye. <sup>30</sup>Ora wawong me nina mene ning pasena yasese yai giro wawong awiya kapero yangdo. Taung nina zere-tutupore puro nete soma meko iyaore auna atu babosi sero, saineba wawong nina zo gera ye.

*Mt 19:9; Mk 10:11-12; Lu 16:18*

<sup>31</sup>Aya ewowo naname eno ge zo eyero sao ara: ‘Zo nung bauno nuna yangduwari yero giro bauno yangduwaora igi nung eno pugairo aune bauno iyengtai babaise.’ <sup>32</sup>Arata nane mene zo niye eno eyero tugata nena ara. Zo nung bauno nuna kuma oko yao amaze tebeba yangduwariniya, awiya nung bauno nuna kuma bauno yaise yariniya. Ora bauno mene kuma yariniya, awiya emo nung dotinasani pasena oko dimariniya. Zo nung bauno emo zo mene yangduna awiya atariniya amimene kuma yariniya.

**Sao tauyao ge namba 2 auna susuwa sena.**

<sup>33</sup>Aya ewowo naname eno ge zo eyero sao ara, ‘Ning Tuwa Bayaura benaungna sao tauyao ge nina awiya ge oko iwase. Sao tauyao ge sero giro Tuwara benaungna diung me yae.’ <sup>34</sup>Arata nane mene zo niye eno eyero tugata nena ara. Ge zo sasa emo bauno gaya me yaise sero nona zora yazo yausero oko sase. Uritira yazo yausero sao tauyao awiya eyao eno yangduwaese sinena. Uriti napo awiya Tuwa Bayaura mitao-masi. Arare ning uritira yazo yausarinesa, awiya Tuwa Bayaura yazo dema yau sarinesa ayero yariniya ara. <sup>35</sup>Tawingna yazo awiya yausero sao tauyao awiya dema eyao eno yangduwaese sinena. Tawing awiya Tuwa Bayaura te guto yao ara. Arare tawingna yazo yausarinesa, awiya Tuwa Bayaura yazo dema yausarinesa ayero yariniya ara. Yerusalem napora yazo yausero sao tauyao awiya eyao eno yangduwaese sinena. Yerusalem awiya Tuwa bainana napo, arare napo Yerusalem yazo yausarinesa,

awiya Tuwa Bayaura yazo dema yausarinesa ayero yariniya ara.<sup>36</sup> Ora ziyo ato ninae yausero sao tauyao awiya dema yangduwaese sinena. Noeno oko, niye giti ai ninae zo neyangyao awiya saya siwing yarinita? Ora giti ai siwing yao zo saya neyang yariniye? Awiya aung ara.<sup>37</sup> Arare niye ge me sari yero giro “Yore” gege, o “Aung” gege ayero sepu. Ge ena susuuno sao awiya mekora maung auna una atu butunoiya.

**Yao abena yao awiya aung ara.**  
*Lu 6:29-30*

<sup>38</sup> Aya ewowo naname eno ge zo eyero sao ara, ‘Zo mene diti moko nina gayai zokai giro abena gayasa zokae. Ora zo mene di nina dai bezai giro abena de bezae.’<sup>39</sup> Arata nane mene zo niye eno eyero tugata nena ara. Emo meko mene niye puro gera gaira yari saya taung aingso ninae oko sorepu. Nupema zo mene ning sowena dai giro enaba deka ayero gipe dae.<sup>40</sup> Ora zo mene ning gera pugairo taung wori nina zuma wosao awiya pumari sai giro mo uno awinao nina zuma bainane awiya dema nung eno pugai pumae.<sup>41</sup> Ora gorobo emo zo mene ning nona nuna diungno puro nagibo apungkaka babasese sai giro ning nona nuna diungno nagibo imoko kara baungputo.<sup>42</sup> Deka aine zo mene nona zo eno isa sai giro pugai pumae. Ora nona nina zo tebeba puro nari sai giro awang oko sase.

**Iwo eno dubo bayao yao.**  
*Lu 6:27-28, 32-36*

<sup>43</sup> Aya ewowo naname eno ge zo eyero sao ara, ‘Ning otao nina kora ye, ora iwo nina zo iwo ye.’<sup>44</sup> Arata nane mene zo niye eno eyero tugata nena ara. Iwo ninae eno otao yepu. Niye dero tuninowa awiya awong eno Tuwa Bayau eno isa sepu.<sup>45</sup> Ayero yarineya, awiya niye Maung ninae uritira atu mitoiya auna mani me yero narineya. Nung amimene sinoi wari nuna mene emo iwaingne mekore apakana awiya waegairo aung yero noiya. Nupema wa awiya sinoi emo iwaingne emo nao mekore auna-una teng wowosinoiya ara.<sup>46</sup> Emo bauno niye dubo bayao yero nowa awong aeno gege bayao yaya Tuwa Bayau mene nono yero niye gai iwaing yarinei? Nao awiya emo bauno uritira ge dotinowa amimene dema yero nowa ara.<sup>47</sup> Niye otao mani ninae gege tairo naya aune nao ninae mene nono yero emo bauno enana nao awiya daigariniye? Diga awong deka ayero yero nowa.<sup>48</sup> Arata niye mene zo uritira Maung ninae etutero noiya auna teng yero neupu.

**Mono pumaora ge.**

**6** <sup>1</sup>Niye Tuwara buro yanenese sao awiya teba emo bauno mene niye bowi yaese sero oko puro nae. Ayero yaya Maung ninae uritira atu mitoiya amimene nona iwaing niye eno abena oko pugariniya.

<sup>2</sup> Ning emo mono pupunasani ena mene gaese to oko pisarinesa. Ge iwao emo awong me sao yero nowa amimene yere ibu enana atuta napo kakame atu emo mono pupunowa awiya ena mene giro awong emo yazore saese ayero yero nowa ara. Na ge me niye eno sinena era. Emo ena mene awong eno yawa yawa yero nowa amimene abena nunae noi aung yero noiya. Nete ago abena iwaing zo oko pumarineya. <sup>3</sup>Ayao ine oko yarinesa. Ning mono pupunasani bayao nina awiya pungyero nebu eno oko sase. <sup>4</sup>Ayero yasa mono iwaing nina pungyero mitariniya. Ayero yai Maung nina nona pungyao gosinoiya amimene abena iwaing ning eno pugariniya.

**Isara ge.**

*Lu 11:2-4*

<sup>5</sup>Niye isa sari yero giro ge iwaing zo oko pumarineya. Awong yere ibu enana atuta kakame atu dopero isa saora tauyero nowa, awiya emo bauno mene awong giro bowi yaese nowa. Arare amimene abena nunae yero noi aung yero noiya ara. Nete ago abena iwaing zo oko pumarineya. <sup>6</sup>Arata nine mene zo isa sari yero giro garo nina auna witiro garo be gazero aune Maung nina pungyero mitoiya aeno isa se. Ayero yasa Maung nina nona pungyao gosinoiya amimene abena iwaing ning eno pugariniya ara.

<sup>7</sup>Niye isa tebeba be mene gege oko sepu. Awiya diga mene yero nowa auna tani. Awong amimene ge gayang-gayangne isa sinanane Tuwa Bayau nigariniya ayero sero nowa ara. <sup>8</sup>Arare niye tani nunae ine oko yepu. Maung niniae mene niye nung eno isa oko saore nona kau yero nowa awiya gosinoiya. <sup>9</sup>Arare niye isa eyero sepu.

O Mama nanae ning uritira atu mitosa, yazo nina dang mitaise.

<sup>10</sup>Bung, dubo sero tawing sero auna Tuwa nanae yase.

Uritira atu ge nina dipunowa, aine tawingna etu nanae una atu kasa yaise.

<sup>11</sup>Ma nae eno wari be sero pugatinosa awiya yeme pugai.

<sup>12</sup>Pasena emo ena mene nae eno yero nowa awiya yangdotinonane, aine ning pasena nanae yangdo.

<sup>13</sup>Nae etegaora atu oko pugase.

Nae mekora atu sorero pung. Awiya me yaise.

<sup>14</sup>Niye emora pasena yangduwaya giro uritira Maung niniae mene pasena niniae deka ayero abena yangduwariniya ara. <sup>15</sup>Ora niye emora pasena puro naya giro Maung niniae mene pasena niniae deka ayero puro nariniya arauwa.

**Semini nasani naora ge.**

<sup>16</sup>Niye Tuwa Bayau eno nona semini nasani benaung niniae yayare mene yaine oko nasani nae. Ge iwaing emo awong me sao yero nowa

amimene ayero yero benaung nunae awetu suwero yero nowa. Awiya emo bauno ena mene awong seminiro neya auna susuwa gaese ayero yero nowa. Na meba sinena. Emo bauno mene awong eno yawa yawa yero nowa amimene abena nunae yero noi aung yero noiya. Nete ago abena iwaing zo oko pumarineya. <sup>17</sup>Arata nine mene zo nona semini nasani benaung nina saero giti ai nina kisagairo neu. <sup>18</sup>Ayero yasa emo bauno mene semininesa awiya oko garineya. Maung nina pungyero noiya amimene nata gariniya. Ayero yero nung nona pungyao gosinoiya amimene abena iwaing ning eno pugariniya arauwa.

**Uritira wau me.**

*Lu 12:33-34*

<sup>19</sup>Wau moni ninae awiya tawingna etu oko wori mene dowaya mitae. Tawingna wau moni awiya ziri mene dedunoiya, o kayai yero meko yero noiya, arita emo mene goma yauseuno ugaing pupunowa. Arare wau ninae tawingna etu oko wori mene dowae. <sup>20</sup>Wau ninae awiya uritira atu wori mene dowepu mitae. Uritira wau moni awiya ziri mene dao ine teng oko, nupema kayai yao ine teng oko, nupema emo mene goma yauseuno ugaing pumao ine teng oko. Arare wau moni ninae awiya uritira atu wori mene dowepu mitae. <sup>21</sup>Noeno oko, masi wau moni ninae mitoiya masi dekaongka auna atu dubo ninae mitariniya arauwa.

**Taungna waegao.**

*Lu 11:34-36*

<sup>22</sup>Diti moko nina awiya taung nina auna waegao ara. Arare diti moko nina iwaing mitai aune taung aingso nina deka iwaing waegaore mitariniya. <sup>23</sup>Ora diti moko nina meko yai aune taung aingso nina deka ayero mume yariniya ara. Arare dubo nina deka ayao ara. Dubo nina mene mume yai, mume bainakama nina ina mitariniya.

**Name emo tuwa etobe sou yao ine teng oko.**

*Lu 16:13*

<sup>24</sup>Mani dekaongka mene emo tuwa etobera una atu sou buro yai teng oko yariniya. Awiya nung zo otao nasani zo eno iwo yariniya. Arata nupema zo tumo didinasani zo eno bereya yariniya. Niye deka ayero Tuwa Bayau eno sou buro yao arita wau monina sou buro yao awiya etobe deka ayero yao ine teng oko arauwa.

**Nona piti aeno sero kotung-katung oko yanene.**

*Lu 12:22-31*

<sup>25</sup>Arare na niye eno sana nigipu. Niye nao ninae eno kotung-katung nasani eyero oko sae, ‘Nona minao natu tamari nenine? Ou minao natu

tamari nenine?’ Nupema niye taung aingso ninae eno kotung-katung nasani eyero oko sae, ‘Taung wori natu tamari nenine?’ Niye sepu. Nao ninae mene me ta nona mene me niye? Taung aingso ninae mene me ta taung wori ninae mene me niye? <sup>26</sup>Niye ni mamani kotungno gipu. Awong buro uno yetero yero urinasanita wo dedunasani gainasani ayero oko mininowa. Awong nona minao oko gurutu yero nowa. Arata uritira Maung ninae mene saineba nona minao nunae tapunoiya ara. Awiya nono niye? Niye wosao nunae ing? Awiya aung ara. Arare nung nona iwaing niye eno pugariniya. <sup>27</sup>Ninae-una zo mene nao nuna eno kotung-katung nasani nete wari be ena nao nuna-una susuuno paka tame yai teng yarinita? Aung ara. <sup>28</sup>Niye noeno taung wori more eno yanakana kotungkatung yero nowi? Niye i ware atu agiti bairo wuzi ditinowa auna susuwa awiya kotungno gipu. Awong asino aimaora buro oko yero nowa. Nupema awong mo gayaora buro oko yero nowa. <sup>29</sup>Arata na niye eno sinena era. Gitau emo tuwa Solomon mene taung nuna sipunasani yero baingtiti nasani nauna, arata simao nuna yero nauna amimene i wuzira simao awiya oko daigaina. <sup>30</sup>I wuzi yeme ware atu iwaing ditiniya, arata gora emo mene wezero igiyarineya ara. Arata saineba, Tuwa Bayau mene sinoi simao iwaing kasa yero Solomonna simao iwaing awiya daigati noiya. Tuwa Bayau mene ayero yero noiya, arare nung noeno niye eno mo taung wori oko tamao yariniye? O tumo diyao besaore niye, nung niye eno mo taung wori iwaing-kawaing tamariniya. <sup>31</sup>Arare niye kotung-katung nasani eyero yanakana oko sae. ‘No yero minari nenine? No puro minari nenine?’ <sup>32</sup>Awiya diga mene kotumao nunae auna pugatinowa mitoinya ara. Niye nona awiya aung iwaing oko narineya, awiya uritira Maung ninae mene nigitinoiya ara. <sup>33</sup>Niye dubo ninae puro pu uritira ge nuna arita nao pewayao nuna auna gaipu mitae. Ayero yaya nung auna tame nona apakana awiya pugai pumarineya. <sup>34</sup>Arare yaya ago kasa yariniya auna kotung-katung oko yae. Gorara kotung-katung yao awiya gorara gerao gege. Wari be sero auna yaya tamao nuna mene gerao nuna mitai teng yariniya arauwa.

**Name zaz mene yaine oko yanene.**

*Lu 6:37-38, 41-42*

**7** <sup>1</sup>Tuwa Bayau mene niye gera pugoiye sero, niye zaz mene yaine yero emo ena gera oko pugae. <sup>2</sup>No eno oko, emo gera pugati nasani ge sarineya, teng Tuwa Bayau mene niye eno abena sariniya. Ora niye nona emo eno pugarineya, teng Tuwa Bayau mene niye eno pugariniya. <sup>3</sup>Ning noeno otao nina-una diti mokora uzozoru mitiya awiya gosinasani nina-una diti mokora i zizaing mitiya awiya oko giro baingtao nesi? <sup>4</sup>I zizaing nina-una diti mokora mitai aune ning otao nina eno eyero sasa teng yarinita? ‘Nina ina diti mokora uzozoru mitiya awiya pumane.’ <sup>5</sup>Ge iwao

emo me sao ine yero nowa, nina ina diti mokora i zizaing mitiya awiya gitau puro aune giro baingtiti nasani otao nina auna diti mokora uzozoru pumasa teng yariniya ara. <sup>6</sup>Niye uritira ge auna nona awiya sino eno oko pugae. Nupema simao wau onone ninae me awiya pu eno oko augairo yangduwae. Ayero yaya awong nona ayao ine awiya te mene patiro aune mena kapete gairo niye gamaneya.

**Isa sinete aune nona pumao.**

*Lu 11:9-13*

<sup>7</sup>Niye Tuwa Bayau eno isa sinete aune pumarineya. Niye tamaora buro yero nete aune me tamarineya. Niye isa ninae mene garo be daine yero nasani naya Tuwa Bayau mene nigariniya. <sup>8</sup>Emo bauno isa sinowa amimene pupunowa. Emo bauno tamaora buro yero nowa amimene me tapunowa. Emo bauno isa mene garo be daine yero nowa auna isa awiya Tuwa Bayau mene nigitinoiya. <sup>9</sup>Ora ninae una awe mene mani nuna ma eno sai daba pugariniye? <sup>10</sup>Arita wo eno sai yi pugariniye? <sup>11</sup>Aung ara. Niye emo memeko-mameko mene mani awiso ninae aeno nona iwaing pugatinowa ara. Arare eyero gosinonane ara: Maung ninae uritira mitioya auna bayao mene tawing emora bayao awiya daigatinoiya, aeno nung emo bauno isa sinowa awong eno nona iwaing-kakawaing witao pugariniya. <sup>12</sup>Niye nao emo mene niye eno yaese arataungno yero nowa teng ayao ine awong eno yepu. Ayero yaya aune sao tauyao ge apakana arita porofetera ge apakana gaewa awiya teng dipunowa ayao ine yariniya.

**Towao-bera ge.**

*Lu 13:24*

<sup>13</sup>Niye nao mera towao-be maingkoka auna toipu. Gera yao napo auna towao-be awiya bainakama. Nupema nagibo nuna dema bainakama. Auna emo bauno daigairo mene bautu nasani nowa ara. <sup>14</sup>Nao mera napo auna towao-be awiya maingkoka. Nupema nagibo nuna dema taung dao bainane. Arare emo bauno agi okoka mene gege tapunowa arauwa.

**Ge iwao emo awong me sao yero nowa auna ge.**

*Lu 6:43-44; 13:25-27*

<sup>15</sup>Ge gipao emo ge iwao awong sao nunae awiya lamana ine, dubo wosao gege. Arata moko nunae mene zo sinona moko ine, gorobo moko. Arare awong umo yero baingtiti nasani neupu. <sup>16</sup>Ge nunae-una me awiya giro aune susuwa nunae garineya. Pura mene biye zuwero iyarinita? Arita masao mene ona zuwero iyariniye? <sup>17</sup>Aung ara. I iwaing awiya me iwaing itinoiya. I meko awiya me meko itinoiya. <sup>18</sup>I iwaingna atu me meko kasa yao ine teng oko ara. Nupema i mekora atu me iwaing kasa yao ine a deka teng oko ara. <sup>19</sup>Arare i

zo me iwaing oko iyao yai giro kapero au iyaora garineya ara. <sup>20</sup>Susuwa ayero mitiya, arare niye ge nunae-una me awiya giro aune susuwa nunae garineya.

<sup>21</sup>Emo mene na eno “Tuwa nana, Tuwa nana,” ayero sero nowa awong teng apakana uritira mokora oko towarineya. Mama nana uritira mitiya auna ge dipunowa awong amimene gege towarineya ara. <sup>22</sup>Emo daigairo mene be bainana atu na eno eyero sarineya, “O Tuwa nanae, nae be nina-una Tuwa Bayaura ge porofete mene saine yewangne. Ora be nina-una iuae tunewangne. Ora be nina auna buro baina yewangne.” <sup>23</sup>Ayero saya na awong eno eyero sarinena, “Na niye zo za nibamu oko gosinona. Doro zanepu aung yae, pasena emo niye.”

**Emo etobe garo gamuwato auna ge eniya.**

*Lu 6:47-49*

<sup>24</sup>Emo zo mene ge nana ewiya nigiro dimariniya, nung awiya emo nigao bainane. Nung emo zo garo nuna-una ziwong kote me wauno pugainu dopena ayao ine ara. <sup>25</sup>Ayero yenu mitinu wabamu baina denu garo tau yero mitina ara. Garora ziwong mutero baingtina, aeno tau yero mitina ara. <sup>26</sup>Ora emo zo mene ge nana ewiya nigiro yangduwariniya, nung awiya emo darabi mene yaine garo ziwong tame paka yena, ayao ine yarininya. <sup>27</sup>Ayero yenu mitinu wabamu baina denu garo gisena ara.” <sup>28</sup>Yesu mene ge awiya sinete sero aung yenu emo bauno awong ge nuna dina awiya nigiro wawong di gamuwa. <sup>29</sup>Awiya noeno oko, nung gera susuwa mene ge diro baingtina. Awiya sao tauyao ge gipao emo awong ge gipinasani nauwa, awiya yangdoro daigairo putoungne sena arauwa.

**Yesu mene emo bozo tauyaore zo kora yena.**

*Mk 1:40-45; Lu 5:12-16*

**8** <sup>1</sup>Yesu mene diri atu wowosinenu emo bauno dubu baina amimene nung ago yero <sup>2</sup>wowosinewa emo zo bozo tauyaore mene Yesura benaungna baungno nugu atu boma gaero koing gairo eyero sena, “Tuwa, ning putoung nina mitiya, arare ning na kora yari yero giro kora yasa iwaing yarinena.” <sup>3</sup>Ayero senu Yesu mene wawong pugairo taung nuna dingyero eyero sena, “Na ayero yari kotupunena, arare bozo nina soyaise.” Ayero sinenu bozo nuna mena soyewa taung nuna iwaing yena ara. <sup>4</sup>Yesu mene ayero yero nung eno eyero sena, “Tani ning eno yetena auna bowi awiya emo zo eno oko sase. Ning baung, taung nina awiya pirisa eno gipasa gae. Ayero nasani nona Mose mene Tuwa Bayau eno pugasese sena awiya pugasa yaya nina aung yetiya auna susuwa giro baingtarineya.” Ayero sena arauwa.

**Yesu mene gorobo emora gitau yao zo auna soumani kora yena.**

*Lu 7:1-10*

<sup>5</sup>Yesu mene Kapaneam nepe baungno atu nenu Romana gorobo emora gitau yao zo mene nuna-una kasa yero nung yausero eyero sena, <sup>6</sup>“Tuwa,

soumani nana yaya mou-mesa yao puro gare atu apegairo mitiya.” <sup>7</sup>Ayero senu Yesu mene abena eyero sena, “Na buro kora yarinena.” <sup>8</sup>Ayero senu gorobo emora gitau yao mene ge abena eyero sena, “Tuwa, na emo iwaing oko. Arare ning garo nana-una towasa teng oko yariniya. Aeno ning etu mitasani aune ge gege sasa soumani nana iwaing yariniya.

<sup>9</sup>Awiya gosinena, noeno okowata, na emo babuze ago yero nona. Nupema na gorobo emo enana gitau yao. Arare nunae-una zo babaise sana babariniya, arita zo baise sana bariniya. Aine soumani nana buro yaise sana yariniya. Arare ning etu mitasani ge gege sasa soumani nana iwaing yariniya, awiya gosinena.” <sup>10</sup>Ayero senu Yesu mene ge awiya nigiro wawong di gauno emo dubu nung ago nasani newa aeno eyero sena, “Na ge me niye eno sinena. Isreli emo ninae-una atu emo zo tumo diyao eyao ine zo oko tamuwang. <sup>11</sup>Arare eyero tugata yana nigipu. Wari wosaorata witaora atu emo Yuda oko daigairo mene kasa yero Abraham Isaka Yakobo awong aune dema uriti mokora atu augairo anabonene yero adungno mininasani yawa yawa yarineya. <sup>12</sup>Arata emo uriti mokora gerao nunae mene zo mumena baungno zi irare barare sinasani mitarineya.” <sup>13</sup>Ayero sero gorobo emora gitau yao eno eyero sena, “Ning baung, tumo diyao nina-una me kasa yariniya.” Ayero senu soumani nuna be dekaongka aune iwaing yena arauwa.

**Yesu mene Petorora imeti auna yaya kora yena.**

*Mk 1:29-34; Lu 4:38-41*

<sup>14</sup>Yesu mene Petorora una gare witiro imeti nuna yaya taung kokoni yao puro mitinu gigina ara. <sup>15</sup>Giro wawong nuna ininu yaya bisi sena. Ayero yenu bauno awiya iropuro Yesura nona sainu miniwa ara. <sup>16</sup>Ture inu emo bauno iwaes sorowe mokora mitao daigairo puro bumuwa ara. Ayero yewa Yesu mene iwaes sorowe nunae be nuna mene tunena ara. Ayero nasani emo bauno yayare apakana kora yena ara. <sup>17</sup>Ayero yenu porofete Yesaya mene ge zo eyero gaena awiya me yena.

Nung yaya naname kora yai iwaing yarinene.

Nupema, nung mouyao naname dimariniya.

**Yesu ago yanenese sao auna ge.**

*Lu 9:57-62*

<sup>18</sup>Emo bauno daigairo mene Yesura una kasa yero nung zimuwa giro buro-mani mene nung puro dawero ou nazi deung enaba atu pugaese sena. <sup>19</sup>Arare babari sero nenu sao tauyao ge gipao emo zo mene nunaua nugu buro eyero sena, “Gipao emo, ning natu natu babarinesa awiya na teng ning ago yarinena.” <sup>20</sup>Ayero senu Yesu mene abena nung eno eyero sena, “Wo niniyang awong awao masire. Nupema ni mamani deka ayero awong paungne. Arata na Emora Mani mene zo niya-koma apegairo

oregao aungware keusuma nasani nona. Arare ning mena na ago yari oko sase.”<sup>21</sup> Ayero senu nunae-una dubura zo mene nung eno eyero sena, “Tuwa, ning nigasa na gitau mama nana magayai mutero aune na ning ago yane.”<sup>22</sup> Ayero senu Yesu mene abena eyero sena, “Ning na ago ye. Emo ititi aung mene yaine yero nowa amimene magayao emo mutaese.” Ayero sena arauwa.

**Bisi mene Yesura ge diuna.**

*Mk 4:35-41; Lu 8:22-25*

<sup>23</sup> Ayero sero wangna witinu buro-mani nuna witiwa aune bamuwa ara. <sup>24</sup> Bautunewa bisi mena buro wito gaenu kakawa iropuro bainakama yenu wito wang mokora toina. Be awiya Yesu nung auriti awinena ara. <sup>25</sup> Arare buro-mani nuna mene baungno uwero eyero sewa, “Tuwa, nae soreung. Name kara nosero tura babari sero nenane.” <sup>26</sup> Ayero sewa giro eyero sena, “Tumo diyao ninae baina oko. Niye noeno awang nei?” Ayero sero iropuro kakaware bisire gona yenu soma bisi binono dena ara. <sup>27</sup> Ayero yenu emo mene giro wawong di gauno eyero sewa, “Emo ewiya noiye? Nona apakana aune bisire kakaware dema ge nuna nigitinei?” Ayero sewa arauwa.

**Yesu mene emo etobera una atu iwae tunena.**

*Mk 5:1-20; Lu 8:26-39*

<sup>28</sup> Yesu mene ou nazi buwagairo Gadara emora tawing auna kasa yena ara. Kasa yenu emo etobe biritira atu buro nung tamuwato ara. Iwae sorowe nunato una mitauwa awongto gorobo baina yero nasani nauwato emo ena mene awang yero nagibo auna buro baungno oko yao yero nasani nauwa ara. <sup>29</sup> Arare awongto wawa sero eyero sewato, “Ning Tuwa Bayaura Mani mene nato eno no yari butunesi? Ning be baina oko kasa yaore yaya buro nae eno pugari butunesita?” <sup>30</sup> Be aune pu witao amimene ake ina atu nona mininasani mitiwa. <sup>31</sup> Arare iwae sorowe mene isa sinasani Yesu eno eyero sewa, “Ning nae tunari yero giro sasa pu dubu ouna-una mokora towanene.” <sup>32</sup> Ayero sewa giro nung awong eno eyero sena, “Niye baungpu!” Ayero senu awong emo etobe yangdoro baungno pu dubu newa auna-una mokora towa ara. Ayero yewa pu apakana yanakana sungno kowara baungno ou nazira gutero ou miniro mamagayero aung yewa ara. <sup>33</sup> Ayero yewa pu diya newa awong dema zanewa ara. Zanero baung napo bainana yero ge ungwe awiya apakana keregairo sero aung yewa ara. Awong tani emo etobera una kasa yena auna ge ungwe awiya yewa ara. <sup>34</sup> Ayero sewa giro napo bainana emo bauno awong apakana iropuro Yesu tamari bamuwa. Awong buro nung giro nung eno ge tau tataware yao sinasani nung tawing nunae yangdoro babaise sewa arauwa.

**Yesu mene emo zo te-wawong gimao awiya kora yena.**

*Mk 2:1-12; Lu 5:17-26*

**9** <sup>1</sup> Yesu mene wangna witiro ou nazi nupema buwagairo napo nuna-una baungna. <sup>2</sup> Baungno kasa yenu emo zo te-wawong gimao awiya gogara pugaiwa apegairo mitinu diungno puro bumuwa ara. Ayero yewa Yesu mene tumo diyao nunae-una susuwa giro emo asama yao eno eyero sena, “Mani nana, ning awang oko yase. Tau ye. Pasena nina disero aung nena era.” <sup>3</sup> Ayero senu Yudara sao tauyao ge gipao emo ena awong dubo nunae mene eyero kotumuwa, “Emo emimene Tuwa Bayau mene yaine niya.” <sup>4</sup> Ayero kotupunewa Yesu mene kotumao nunae giro aung yero eyero sena, “Niye noeno ge meko kotupunei? <sup>5</sup> Name emo yayare aeno ‘Iropung, ang yase’ tebeba ayero sanane nung oko ang yao yariniya, awiya name meng garinenane. No eno oko, emo bauno mene ge naname gaya ge iwao yariniya. Arata name ‘Na pasena nina disinena’ tebeba ayero sarinenane, awiya name meng oko garinenane. No eno oko, emo bauno mene ge naname auna me awiya gao ine teng oko. <sup>6</sup> Arare na pasena disaora putoung puro tawingna etu nona awiya gaese sero na ge ewiya dema nung eno sarinenane: Na ning eno eyero sinena, Iropuro awao masi gogare nina puro baung nina gare yase.” <sup>7</sup> Ayero senu emo awiya iropuro nuna nape baungna ara. <sup>8</sup> Ayenu emo dubu baina amimene tani awiya giro awang yero Tuwa Bayau nung putoung ayao zo emora waweng pugaina, awiya giro nung bowi yewa arauwa.

**Yesu mene Matiu yau sena.**

*Mk 2:13-17; Lu 5:27-32*

<sup>9</sup> Yesu mene atu iropuro bautunete takis pumao emo zo yazo nuna Matiu nung takis pumaora gare atu mitinu giro nung eno eyero sena, “Ning bung na ago yase.” Ayero senu giro iropuro nung ago yena ara.

<sup>10</sup> Ayero yero nung Yesu garo nuna-una atu nona minaise senu witinu aune takis pumao emo aune Yudara sao tauyao ge dao emo daigairo amimene kasa yero Yesu buro-maine aune dema tairo nona miniwa ara.

<sup>11</sup> Ayero newa Farisayo mene awong giro buro-mani nuna eno eyero sewa, “Gipao emo niniae mene noeno takis pumao emo aune Yudara sao tauyao ge dao emo aune dema mitasani nona mininei?” <sup>12</sup> Ayero sewa ge awiya Yesu mene nigiro abena eyero sena, “Emo yaya aung mene doktara una oko bautunowa. Arata emo yayare gege mene doktara una bautunowa.

<sup>13</sup> Niye baungno ge gayao eyero mitiya auna susuwa kotungno gipu.

Na Tuwa Bayau mene niye zawing pugaese oko ara tapunona. Niye mono pumaese aratapunona.

Na emo nao nunae pewayao sinowa awiya yausari sero oko bumuwang. Arata na emo pasena nao awiya yausari bumuwang.” Ayero sena arauwa.

**Seminiro naora ge sewa.**  
*Mk 2:18-22; Lu 5:33-39*

<sup>14</sup> Be auna atu Yohanena buro-mani mene Yesura una kasa yero nung atata yero sewa, “Nae aune Farisayo aune nae nona minao semini nasani yero nonane, arata buro-mani nina mene zo awong noeno nona oko seminao yero nowi?” <sup>15</sup> Ayero sewa Yesu mene awong eno abena eyero sena, “Emo bauno ataora sao zuwao nasani mitaya emo nung bauno atariniya amimene awong aune dema nariniya be aune awong dubo mininasani nona seminaese saya nigarineita? Aung ara. Ora ago emo awiya iwo mene puro babaya aung yariniya be aune awong nona seminarineya. Deka ayao ine na eno yaya aune buro-mani nana mene nona seminarineya. <sup>16</sup> Name mo toto worero gayari sero mo be sekawa puro mo asora oko gainonane. Ayero yari nenane, awiya mo sekawa mene watimai mo aso nupema kerai toto bainakama yariniya. <sup>17</sup> Name ou wain sekawa puro meme aingso matura oko sukupunonane. Ayero yarinanane, awiya ou wain mene daing yero meme aingso inai kerai ou wain meme aingsore awiya gera gaira yarinanane. Name ou wain sekawa puro meme aingso sekawara sukupunonane. Ayero nonane ou wain sekaware meme aingso sekaware awongto kara iwaing mitowato ara.” Ayero sena. Ge eniya awiya tebeba oko sena. Awong susuwa ewiya gaese sero sena: Nung nao sekawa auna ge sinauna, arare buro-mani nuna mene Yudara tani matu awiya yangdoro tani sekawa gege puro narinanane ayero sena arauwa.

**Yesu mene bauno zo kora yero aune mani baunodi zo magayaora atu uwenu seka yero iropuna.**  
*Mk 5:21-43; Lu 8:40-56*

<sup>18</sup> Yesu nung ge awiya sinasani mitinu yere ibu diya emo zo mene nuna-una buro benaungna atu koing gairo eyero sena, “Mani nana baunodi yeme magayetiya, arata ning puro babana wawong nuna-una tame pugasa iopariniya.” <sup>19</sup> Ayero sero baungnu Yesu mene iropuro buro-mani nuna aune emo awiya ago yero bamuwa ara. <sup>20</sup> Bautunewa bauno zo yu pupunasani nawe dunu dawang 12 ayao yena amimene Yesura una ame baungno Yesura taung wori tera atu ding yena ara. <sup>21</sup> Ayero nasani nuka nutope eyero kotuna, “Taung wori nuna gege ding yero iwaing yarinena.” <sup>22</sup> Ayero kotungno ding yenu Yesu mene kapetegairo bauno giro eyero sena, “Aya nana, ning oko awang yase. Ning tumo diyao nina mene iwaing yetesa.” Ayero sinenu bauno awiya mena iwaing yena ara. <sup>23</sup> Ayero yenu Yesu mene bautunete diyara gare witiro bui pisao emo aune emo bauno dubu bainane amimene zire buware nasani mitiwa giro eyero sena, <sup>24</sup> “Niye kasa yero bungpu! Mani baunodi awiya nung oko magayao. Nung auriti

awiniya.” Ayero senu awong nung izewa ara.<sup>25</sup> Ayero yewa nung senu wosiro aung yewa mani magayao mitina auna-una baungno mani baunodi awiya wawong ininu iropuna ara.<sup>26</sup> Ayero yena auna ge bowi mene tawing auna atu daure gairo teng yero baungna arauwa.

**Yesu mene emo ditu guma yao etobe aune iwae  
sorowe mokora mitao zo awiya kora yena.**

<sup>27</sup> Yesu mene atu iropuro bautunenu emo ditu guma yao etobe mene nung ago yero yausinasani eyero sewato, “O Dawidira sai, ning nato eno yo-amase.”<sup>28</sup> Yesu bautunete gare witinu awongto nuna nugu baungno kasa yewato ara. Nuna-una kasa yewato giro Yesu mene awongto atata yero sena, “Diti moko kora yaora putoung nana-una mitiya ayero sero gigeyato me yeti bumeitota?” Ayero senu awongto sewato, “Yore, Tuwa. Gigenato me niya.”<sup>29</sup> Ayero sewato giro nung ditu moko nunato dingti nasani eyero sena, “Tumo diyao ninato auna me mene ninato ina kasa yaise.”<sup>30</sup> Ayero senu ditu moko nunato pagaina ara. Ayero yenu Yesu mene awongto eno sao tauyao ge eyero pugaina, “Nito tani auna ge bowi emo ena eno oko saeto.”<sup>31</sup> Ayero sena, arata awongto doro baungno ge bowi nuna sero sero yewato tawing auna teng yena arauwa.

<sup>32</sup> Yesu buro-mani nuna aune atu iropuro bautunewa emo zo puro Yesura una bumuwara. Iwae sorowe zo nuna-una mitaunu ge aung nasani nauna.<sup>33</sup> Arare Yesu mene iwae sorowe tunenu baungnu emo awiya ge sena ara. Ge senu emo dubu baina amimene wawong di gauno eyero sewa, “Isreli tawingna etu gitau nona ayao ine zo oko kasa yenu gigiwangne.”<sup>34</sup> Ayero sewa, arata Farisayo mene Yesu eno eyero sewa, “Iwae sorowera gitau yao mene nung sorepuno ixae sorowe tunero noiya ara.” Ayero sewa arauwa.

**Yesu mene emo bauno eno yo amao tauna.**

<sup>35</sup> Arare Yesu nung atu nasani napo bainata maingkoka awiya nung teng nasani nauna ara. Atu nasani yere ibu nuna sero toiro ge gipinasani Tuwa Bayau nata Tuwa yero nariniya auna Bowi Iwaing tugata nasani nauna ara. A nasani emo bauno yayare apakana kora yero naunu yaya nuna sero aung yero nauna ara.<sup>36</sup> Arare nung emo bauno dubu baina awiya giro awong eno yo amao tauna. No eno oko, awong lama dubu diya aung ine. Arare awong putoung aung dubo mininasani nauwa.<sup>37</sup> Arare nung buro-mani nuna eno eyero sena, “Nona bure etu zauno mitiya, arata pumaora emo etoka gege.”<sup>38</sup> Arare niye pumao burora maung eno isa saya nung nona pumao emo tamai buro nuna-una babaese.” Ayero sena arauwa.

**Yesura buro-mani auna yazo.**

*Mk 3:13-19; Lu 6:12-16*

**10** <sup>1</sup> Yesu mene buro-mani nuna 12 yau senu bumuwara ixae sorowe tunaora putoung aune yaya benaung giti korayaora putoung aune

awiya awong eno pugaina ara. <sup>2</sup>Aposolo 12 auna yazo nunae awiya eyao era: Gitau yao Simon yazo nuna zo Petoro, meta nuna Anderea, Yakobo Zebedira mani, aune meta nuna Yohane, <sup>3</sup>Filip aune Batolomiu, Tomas aune Matiu takis pumao emo, Yakobo Alifayora mani, aune Tadias, <sup>4</sup>Simon Zelote aune Yudas Iskeriot nung nawe Yesu keregaina arauwa.

**Yesu mene buro-mani nuna eno buro ge sena.**

*Mk 6:7-13; Lu 9:1-6*

<sup>5</sup> Yesu mene buro-mani nuna 12 awong awiya burora iyengtiti nasani eyero sena, “Niye emo Yuda okora una tawingna oko babae, arita Samaria napo auna dema oko babae. <sup>6</sup>Isreli emo bauno dubu awong lama tara yetugao ine auna-una gege baungpu. <sup>7</sup>Bautunasani ge eyero tugata yepu: Tuwa Bayau nata Tuwa yero narinoya auna be nugu niya. <sup>8</sup>Atu nasani emo bauno yayare awiya kora yepu. Nupema mamagayao awiya dema uwepu. Ayero nasani bozore awiya kora yepu bozo soyae. A nasani iwae sorowe tunepu. Niye putoung awiya zuma aung tebeba pumeya, arare niye deka ayero buro awiya zuma aung yepu. <sup>9</sup>Moni bainata moni mamanikaka awiya oko guguno puro babarineya. <sup>10</sup>Niye nagibe atu zao oko desanegae. Taung wori etobe aung, o te soga sekawa zo aung, o tung zo aung, ayero neupu. No eno oko, buro emo awong nona zuma aung tebeba pugao minao gege ara. <sup>11</sup>Arare napo zorata zora kasa yero giro gitau emo iwaing zo kau yepu. Ayero yero zo gaya iwaing yai giro garo nuna-una witiro deka atu gege awiro-dutiro nasani nema aune baungno yepu. <sup>12</sup>Garo nunae-una wiwiti nasani giro eyero sepu, ‘Tuwara gao ninae-inा mitaise.’ <sup>13</sup>Ayero saya garo maung mene nigai teng yai giro ge ninae mene nunae-una atu me yaise. Arata garo maung mene nigai teng oko yao yai giro Tuwara gao ninae-inा atu gege me yaise. <sup>14</sup>Napo zorata garo zora babaya niye eno masi oko pugao, o ge ninae auna bereya yai saya giro garo awiya yangdoro baungpu. Ayero yero popo nunae te ninae-inा mitiya awiya durere gaipu wosae. <sup>15</sup>Na memokoba sinena. Tuwa Bayau mene emo awega-ziwega nasani abena pugariniya be aune napo etobe yazo nunato Sodomto Gomora auna emo awong abena mou-mesayao tamarineya. Arata ge ninae awang sarineya napo auna emo mene zo abena mou-mesa yao nibamu tamarineya.

**Mouyao benaung giti noyao kasa yariniya.**

*Mk 13:9-13; Lu 21:12-17*

<sup>16</sup> Sana nigipu. Niye lama ine, gorobo aung, amaze emo ena eu sino ine auna towang iyengtitinena. Arare niye umo nasani neupu. Ayero nasani gorobo aung dero yawero neupu. <sup>17</sup>Niye emo itere-temare yero baingtiti nasani neupu. Awong niye puro gera pugarineya. Awong yere ibu nunae-una atu niye waung mene darineya. <sup>18</sup>Awiya gege okowata, niye

buro-mani nana yero nowa aeno awong niye puro emo gitau yaora unata emo tuwara una babaya ge buro yarineya. Arare niye nunae benaungnata nupema digara benaungna tauyero Bowi Iwaing sero keregaipu.<sup>19</sup> Awong niye puro emo gitau yaora una pugaya ge nono yero sarinenine ayero sinasani kotung-katung oko yae. Ge abena saora be kasa yai aune ge sari yaya Oweno mene niye eno kotumao pugai sarineya ara.<sup>20</sup> Ge saya ge ninae oko yariniya. Maung ninae auna Oweno mene dubo ninae-una nariniya auna ge yariniya ara.<sup>21</sup> Tatomani ena mene metamani nunae magayaese iwora waweng pugarineya. Mamono ena mene mani awiso nunae magayaese sero iwora waweng pugarineya. Mani awiso ena mene ai amono mamono iwo nasani magayaese sero iwora waweng pugarineya.<sup>22</sup> Niye yazo nana puro nowa aeno emo apakana niye eno tini kapaore narineya ara. Arare zo nung tau yero dopero nete magayariniya, nung awiya Tuwa Bayau mene sorero pumariniya.<sup>23</sup> Arare napo zora atu naya dero tunaya giro napo awiya yangdoro nupema zora baungpu. Na meba sane. Niye buro yero bautu nete Isreli napo sero sero auna atu buro oko yero besugao naya na Emora Mani mene nupema kasa yarinena arauwa.

**Tuwa eno yewa ayao ine teng name eno yarineya.**

*Lu 12:2-9*

<sup>24</sup> Mani zota zo mene gipao emo nuna daigairo witaine yao oko mitiya. Nupema soumani mene emo tuwa nuna daigairo baina yao adeka dema oko mitiya. <sup>25</sup> Arata mani mene gipao emo nuna mene noiya aine yai teng yariniya. Nupema soumani mene emo tuwa nuna mene noiya aine yai teng yariniya ara. Awong na eno Iwaera Maung ayero sewa, arare buro-mani nana eno deka ayero ge memeko-mameko sarineya ara.<sup>26</sup> Arata saineba, susuwa ninae pungyero mitiya awiya ago kasa daung yai garineya. Arare niye awong giro awang oko yae.<sup>27</sup> Ge ena nane pungyero tugata yero nona awiya dubu bainana atu keregaipu nigae. Ora maingkoka dawong mene nigaine yao awiya dema daung mokera atu keregairo sepu.<sup>28</sup> Taung aingso ninae gege dero ititi ninae dari nasani putoung kau yarineya, awong awiya oko awang yepu. Taungne ititire etobe ayero musugai kowa iyaore auna babarineya auna putoung awiya nuna-una mitiya, nung awiya giro awang yepu.<sup>29</sup> Ni sisisi awiya nona me aung, arare maketra atu ni sisisi etobe auna zuma awiya toya dekaongka gege. Arata Maung ninae mene gai teng oko yati siya, awiya zo oko zuwero magayatiya.<sup>30</sup> Arata emo bauno niye mene zo Mama mene niye diya yero baingtiti nasani giti ai ninae zazagairo aung yero noiya ara.<sup>31</sup> Ni sisisi daigairo auna zuma awiya baina oko, arata ninae mene zo zuma bainane. Arare niye awang oko yae. Mama mene gai teng oko yao yai, nona meko zo ninae-ina tebeba oko kasa yariniya.<sup>32</sup> Zo nung emora benaungna atu ‘Na Yesura mani yero nona’ ayero sariniya, awiya nane

emo aeno uritira Mama nana auna benaungna atu ‘Nung awiya mani nana’ ayero sarinena.<sup>33</sup> Arata zo nung emora benaungna atu na bewae yariniya, nung awiya nane uritira Mama nana-una benaungna atu abena bewae yarinena arauwa.

**Yesu mene ge puro bunu emo bauno gagausewa.**

*Lu 12:51-53; 14:26-27*

<sup>34</sup> Na mono pumari oko, emo bauno gagausari sero bumuwang ara. Arare ge nana eno gagausero narineya.<sup>35</sup> Mani emodidi mamonone gagausarineya. Ai amono mani baunodidire gausarineya. Bemani imeti maingne deka ayero gausarineya ara.<sup>36</sup> Dubu dekaongka amimene gausero iwo wina-ye yarineya.<sup>37</sup> Zo nung aita maung nuna ara tamao baina ara tapunasani na maingkoka ara tamariniya amimene gerao nana yao ine teng oko ara. Zo nung deka ayero mani nuna emodita baunodi ara tamao baina ara tapunasani na maingkoka ara tamariniya a deka gerao nana yao ine teng oko ara.<sup>38</sup> Ora zo nung i pasao nuna diungno na ago oko yao yariniya, nung a deka gerao nana yao ine teng oko ara.<sup>39</sup> Zo nung nao nuna sorariniya amimene nao nuna taragariniya. Arata zo nung na eno nasani nao nuna yangduwariniya amimene nao me tamariniya arauwa.

**Yesu eno nasani otao mani mono pumao.**

*Mk 9:41*

<sup>40</sup> Zo nung niye kora yariniya, awiya na eno yetiya ayero yariniya. Ora na eno yariniya, awiya nung Mama nana na iyengtina aeno yetiya ayero yariniya.<sup>41</sup> Zo nung porofete zo nai giro kora-makora yariniya nung amimene porofetera abena auna teng pumariniya. Zo nung emo etutero nai giro kora yariniya amimene emo etutero naora abena auna teng pumariniya.<sup>42</sup> Na memoko sane. Zo nung emo na ago yero nowa awong auna zo nai giro ou iyangyao dungno pugai minariniya, awiya ou pugariniya aeno nung abena nuna me pumariniya.” Ayero sena arauwa.

**Yohane Yesura bowi sao emo mene buro-mani nuna ena Yesura una  
iyengtinu bamuwa.**

*Lu 7:18-35*

**11** <sup>1</sup> Yesu mene buro-mani nuna 12 aeno buro ge sero aung yero atu iropuro napo enana atu uritira ge sero gipero ayari sero baungna ara.

<sup>2</sup> Anenu Yohane nung bunao gare atu mitasani Kristo mene buro yero nasani nauna auna bowi awiya nigiro giro buro-mani nuna ena iyengtinu <sup>3</sup>baungno Yesu atata yero sewa, “Kristo bumaise sao awiya ning arita zo ago bumai gari diya yarinene?” <sup>4</sup>Ayero sewa Yesu

mene awong eno abena eyero sena, “Niye kapetegairo baungno nona gigeya, o ge nigeya auna bowi sinasani Yohane tugata yepu nigae.

<sup>5</sup>Diti guma yao awiya diti pagatineya; te meko yao awiya nupema angneya; emo bozo tauyaore awiya taung iwaing yero neya; dawong itigao awiya ge nigitineya; mamagayao awiya sekai yero iropupuneyea; ora bogamasa awiya Bowi Iwaing nigitineya. <sup>6</sup>Zo nung na eno gai mou oko yao yariniya amimene yawa yawa yariniya.” <sup>7</sup>Ayero senu Yohanena buro-mani awong kapetegairo bautunewa Yesu mene emo dubu baina mitiwa aeno Yohanena ge eyero sero tugata yena, “Niye Yohane gari eu yanawira bamuwa, awiya emo nono yao maze gari sero bamuwi? Niye emo iyangyao zo bisi mene teboza augati noi buro baungno noiya ayao ine maze gari bamuwita? Aung ara. <sup>8</sup>Niye emo nono yao maze gari sero eu yanawira bamuwi? Emo zo taung wori nuna iwaingne amaze gari sero bamuwita? Aung ara. Emo taung wori iwaingne awong awiya emo tuwara gare gege atu mitowa. <sup>9</sup>Arare emo nono yao maze gari sero bamuwi? Porofete zo gari sero bamuwita? Na sana nigipu. Emo gari sero bamuwa nung amimene porofete yero nasani porofete ena nauwa awiya daigatiniya. <sup>10</sup>Nung aeno sero ge zo eyero gaewa mitoiya,

Ewiya gipu! Na bowi sao emo nana iyengtarinena.

Nung gitau yero nagibo nina kora yariniya.

<sup>11</sup>Na memoko sana nigipu. Yohane ge ou zayero suwao emo amimene tawingna emo apakana daigatiniya. Arata Tuwa Bayaura napora gerao zo wosao nibamu amimene Yohane daigatiniya ara. <sup>12</sup>Yohane ge ou zayero suwao emo amimene buro zayena be auna atu emo bauno mene uritira mokora towari sero wina-zakita yero neyata emo putoungne mene toitineya ara. <sup>13</sup>Mose arita porofete emo ena awong Tuwa Bayau nata Tuwa yero nariniya auna ge sinasani gainasani ayero butunawe duwa Yohane kasa yena be aune porofetera ge atu tana yero dopena ara. <sup>14</sup>Arare niye ge nunae gao me yao ine teng yai giro ge ewiya gipu me yae: Eliya mene Sorao Emora nagibo gitau yero bumaise sao, awiya Yohane ara. <sup>15</sup>Zo nung dawongne mene ge ewiya nigaise.

<sup>16</sup>Arare na emo bauno yeme tawingna etu neya amaze nona nora pugairo sana teng yariniye? Niye tani mani mamanikakara ine yero nowa. Mani mamanikaka napo kakame atu adungno mitasani mani mamanikaka ena yau sero eyero sinowa, <sup>17</sup>‘Nae ge tuwari niye yuno gogoing detenane, arata niye na oko wuyao yeteya. Nupema nae yomaora zi be yetenane, arata niye zi be oko yao yeteya. Arare nae nono yanane gaya iwaing yariniye?’ ayero sinowa ara. <sup>18</sup>Yohane mene buro nuna zayero nona minao ena semini nasani noi giro nung eno eyero sinowa, ‘Iwae nuna-una mokora mitoiya.’ Ayero sinowa. <sup>19</sup>Nupema na Emora Mani mene kasa yero nona mininasani ou mininasani ayero nona giro na eno eyero sinowa, ‘Gipu! Nung nona yana mininao emo. Nung

ou wain yanakana mininoiya. Nung takis pumao emo aune Yudara sao tauyao ge dao emo awong auna otao.' Ayero sinowa. Arata nato buro yero nonato awiya Tuwa Bayaura kotumaora yero nonato auna susuwa awiya buro nanato una me mene keregatinoi emo bauno gosinowa me yero noiya." Ayero sena arauwa.

**Yesu mene Galilaya emo bauno gona yena.**

*Lu 10:13-15*

<sup>20</sup> Yesu mene napo enana atu buro putoungne daigairo nasani putoung nuna-una susuwa keregainu gigiwa, arata dubo oko darawa yao yewa. Arare ge zayero eyero sinasani awong gona yena, <sup>21</sup> "Oiye Korasin emo bauno! Oiye Besaida emo bauno! Mouyao bainakama ninae-una kasa yariniya. Na tani putoungne ena ninae-una atu yero nona awiya na napo Tayato Saidon auna atu yateni siya, awiya awong yemaoko dubo darawa yero pasena nunaе kotungno dubo mininasani mo taung yiurire awiya awiro awetu suwero mitateya. <sup>22</sup> Arare sana nigipu. Tuwa Bayau mene emo awega-ziwega nasani abena awong eno pugariyi be aune Tayato Saidon napora emo bauno mene abena wosao tamarineya. Arata ninae mene zo abena ninae bainakama tamarineya. <sup>23</sup> Ora niye Kapaneam emo bauno, emo bauno ena mene yazo ninae de ika yarineita? Aung ara. Awong yazo ninae puro wosarineya. Ninae una tani baina kasa yena ayao ine Sodom nape atu kasa yati siya, awiya napo awiya oko disatiya. Yeme ewiya mitatiya. <sup>24</sup> Aeno sana nigipu. Ago Tuwa Bayau mene emo bauno awega-ziwega nasani abena pugariyi be aune Sodom napora emo bauno mene abena mou yao tamarineya. Arata ninae mene zo abena mou-mesayao nibamu tamarineya." Ayero sena arauwa.

**Yesu mene name nuna-una buro oreganenese sena.**

*Lu 10:21-22*

<sup>25</sup> Be aune Yesu mene ge eyero sena, "O Mama, ning uritire tawingne auna Tuwa. Awong nuka nuyetope gosinowa emo baina yero noiya emo ayao amimene susuwa nina gowi sero ning putoung nina-una susuwa puingtinosa. Ora awong nuka nuyetope gosinowa mani wuire ine yero noiya awong aeno zo keregatinosa. Arare na aeno ning bowi nena. <sup>26</sup> O Mama, ning ayero gege yari aratapunosa."

<sup>27</sup> Nung ge awiya sero aung yero aune eyero sena, "Mama nana mene susuwa nuna keregaora putoung awiya wawong nana-una pugaina. Emo zo mene na Maungna Mani auna susuwa oko gosinoiya; Mama mene nata gosinoiya. Deka ayero emo zo mene Mamana susuwa oko gosinoiya; na Mani mene nata gosinona. Ora na Mani mene Mamana susuwa emo ena eno gipinona, awong amimene Mamana susuwa gosinowa. <sup>28</sup> Niye sao tauyao ge dimari kaputinasani mouyao dipunowa amimene nana-una

bungpu. Buro oregao me tamae. <sup>29</sup>Na dabo wosaore ao-diyaore nona, arare nana-una buro amoka nana-una agewa puro dipunasani susuwa nana giro baingtae. Ayero yaya ititi ninae oregairo baingtae. <sup>30</sup>Amoka nana niye eno pugari nena awiya iwaing. Deka aine nona ninae dimaese pugarinena awiya eo-meo yao.” Ayero sena arauwa.

**Sabat bere buro yowi sero awang sewa auna ge.**

*Mk 2:23-28; Lu 6:1-5*

**12** <sup>1</sup>Sabat iya be zo aune Yesu gitau yenu wuit bure towang bamuwa ara. Bautunasani buro-mani nuna mene merire auno wuit me kowero miniwa ara. <sup>2</sup>Ayero yewa Farisayo emo awong awiya giro Yesu tugata yero eyero sewa, “A gi! Buro-mani nina buro neya awiya sao tauyao ge mene Sabat bere tani ayao yowi sero awang sao mitiya.” <sup>3</sup>Ayero sewa giro Yesu mene eyero sena, “Dawidi aune emo ena nung aune dema nasani nauwa awong merire apunasani tani zo yewa auna ungwe awiya niye oko zazagairo gao mene saine neya! <sup>4</sup>Awong Tuwa Bayaura ibu auna toiro ame Tuwa Bayaura benaungna pugatinasani nauwa awiya puro miniwa ara. Ame awiya awong emo wosao mene minao sao oko. Pirisa emo gege mene mininaese sao ara. Arata awong miniwa Tuwa Bayau mene giginu meko oko yena. <sup>5</sup>Ora sao tauyao ge zo bukura gayao mitiya awiya niye zazagairo susuwa nuna gosinowita? Ge awiya eyao era. Pirisa emo awong Sabat bere ibu bainana atu buro nasani iya be dang awiya sisigatinowa pasena oko yero noiya. <sup>6</sup>Ora nane sana nigipu. Sao nana mene ibu bainana buro awiya daigatiniya. <sup>7</sup>Ge gayao zo eyero mitiya era,

Na Tuwa Bayau mene niye zawing pugaese oko aratapunona. Niye mono pumaese aratapunona.

Niye ge auna susuwa nigatei siya, awiya niye buro-mani nana pasena aung eeno ge oko sateya. <sup>8</sup>Na Emora Mani mene Sabat be auna Tuwa yero nona ara.” Ayero sena arauwa.

**Yesu mene Sabat iya zore emo wawong amao zo kora yena.**

*Mk 3:1-6; Lu 6:6-11*

<sup>9</sup>Ayero sero atu baungno yere ibu nunae zo auna witina ara. <sup>10</sup>Witinu emo zo wawong nuna amao amimene atu mitina ara. Arare emo ena mene Yesu gera pugari sero, iko nora gairo gera pugari nenine ayero sero giro nung atata yero sewa, “Emo Sabat iya zore kora yao awiya teng nita?” <sup>11</sup>Ayero sewa Yesu mene be nunae-una puro eyero sena, “Ninae-inia auna zo mene lama nuna dekaongka Sabat iya zo aune zuwero kotera wosai nung Sabat iya kotungno yangduwarinita? Aung ara. Saineba kara watimarininya. <sup>12</sup>Lama awiya nona me aung ara. Arata emo mene zo nona me ara. Arare Sabat bere soremao iwaing yaora buro yao awiya teng

ara.”<sup>13</sup> Ayero sero emo aeno eyero sena, “Wawong nina iteti.” Ayero senu wawong nuna itetinu iwaing yero zo aune dema teng yena ara.<sup>14</sup> Ayero yenu Farisayo awong tani awiya giro apakana baungno Yesu daya magayaise sero ge gatewa ara.

**Ge Yesu eno sao awiya me yena.**

<sup>15</sup> Yesu mene ge awiya nigiro napo awiya yangdoro baungna ara. Napo awiya yangdoro bautunenu emo bauno daigairo mene nung ago yewa giro emo bauno yayare awiya kora yenu iwaing yewa ara.<sup>16</sup> Iwaing yewa giro Yesu mene awong susuwa nuna keregowi sero ge tauyao nibamu sena ara.<sup>17</sup> Ayero yenu ge gitau Tuwa Bayau mene senu porofete Yesaya mene gaena, ge awiya me yena ara. Ge awiya eyero mitiya,

<sup>18</sup> Ewiya mani sou nana. Na nung giro baingtiro  
aune pumuwang ara. Nung yo diyang nana.

Na nung aratapunona. Na Oweno nuna-una tame pugana nung  
soremai diga emo bauno eno etutero naora ge sero  
gipero yariniya ara.

<sup>19</sup> Nung ge matu yaota ge betao awiya oko yariniya. Ge nuna-una  
bewing kakame etu oko kasa yai nigarineya.

<sup>20</sup> Nung emo bauno opowang botu zorogao ine awiya gera yari  
okowata, kora yai tauyarineya.

Nung emo bauno damanana wuik kayai yao ine awiya sisigari  
okowata, kora yai iwaing yarineya ara.

Ayero nasani buro etutero korayero naora ge mene nao apakana  
daigatinasani iwaing kasa yariniya.

<sup>21</sup> Ayero yai diga emo naiye-naiye amimene nung  
tumo diyarineya ara.

**Yesu mene iwae zo emo zora una atu tunenu giro tori dewan.**

*Mk 3:20-30; Lu 11:14-23; 12:10*

<sup>22</sup> Emo zo iwae mene mokora toinu ditu guma yenu ge sao teng oko yero nasani nauna emo awiya ena mene puro baung Yesura una yewa ara. Ayewa Yesu mene kora yenu ditu moko nuna pagainu ge wina-se yewato ara.<sup>23</sup> Ayero yenu emo bauno dubu baina mitiwa amimene giro wawong di gauno bowi pasore nasani eyero sewa, “Dawidira sai bumaise sao arita?”<sup>24</sup> Ayero sewa Farisayo mene nigiro eyero sewa, “Iwae sorowera gitau yao yazo nuna Bielsebul amimene nung sorepunoi iwae tuninoiya ara.”<sup>25</sup> Ayero sewa Yesu mene kotumao nunae-una susuwa giro ge nunae abena sari sero tawingna pugairo eyero sena, “Tawing zo auna emo awong gagausero wina-de yarineya, awiya tawing awiya mena zatu yero i bairo suwariniya. Deka aine napo zota dubu zo auna emo awong gagausero wina-de yarineya, awiya napo awiya tauyao oko mitarineya.

<sup>26</sup>Arare Sandara dubu mene awigairo nasani wina-de yatei siya, awiya putoung nuna sisigairo aung yatiya. <sup>27</sup>Ayero na Bielsebulra putoungna iwae tuninoni siya ayero sinowa, ge awiya meba siya, awiya mani awiso ninae iwae tuninowa awong awiya ana putoungna iwae tunarine?

Awong Tuwa Bayaura putoungna iwae tuninowa, arare awong amimene ge iwao ninae auna susuwa keregarineya. <sup>28</sup>Naka awiya Tuwa Bayaura Oweno mene sorepunoi iwae tuninona, arare Tuwa Bayau nata Tuwa yero nariniya auna putoung ninae-una yemaoko kasa yero mitoiya. <sup>29</sup>Arata zo mene emo putoung bainane zo mitai aune garo nuna-una witiro wau nuna sorero pumao awiya teng nita? Awiya aung ara. Nung emo putoung bainane awiya gitau bunero aune wau nuna sorero pumariniya ara.

<sup>30</sup>Zo nung na eno otao oko yao yariniya amimene na eno iwo yariniya. Nupema zo nung dubu nana oko duma dao yariniya nung amimene sisigao buro yariniya. <sup>31</sup>Arare sana nigipu. Emora pasena susuwa giti arita Tuwa Bayau izaora ge susuwa giti awiya disao ine teng ara. Arata zo nung Oweno izariniya, emo auna pasena awiya disao teng oko ara. <sup>32</sup>Zo nung na Emora Mani eno ge meko sariniya, awiya Tuwa Bayau mene pasena awiya disariniya. Arata zo mene Oweno sero pusugairo iyariniya awiya pasena nuna tawingna etuta ago uritira atu disao aung yao ine teng oko ara.

**I me mene ira susuwa keregatinoiya.**

*Lu 6:43-45*

<sup>33</sup>Niye i zo eno ‘iwaing’ ayero sero giro me nuna eno deka ayero ‘iwaing’ sepu. Ora i zo eno ‘meko’ ayero sero giro me nuna eno deka ayero ‘meko’ sepu. Noeno oko, i me mene ira susuwa keregatinoiya ara. <sup>34</sup>Niye yira saisibuna, niye meko mene nono yero ge iwaing sarinei? Dubo mene denenu mitoiya auna teng be mene keregairo sinoiya. <sup>35</sup>Emo iwaing awiya kotumao iwaing nuna-una mokora mitoiya, arare nung tani iwaing yero noiya. Emo meko awiya nung kotumao memeko-mameko nuna-una mokora mitoiya, arare nung tani memeko-mameko yero noiya. <sup>36</sup>Arata nane sana nigipu. Ge diti giro oko sinowa awiya Tuwa Bayau mene emo bauno awega-ziwega nasani abena pugariniya be aune niye ge auna ge buro yarineya ara. <sup>37</sup>Awiya noeno oko, ge sinosa amimene susuwa nina keregai iwaing yai Tuwa Bayaura una kotora atu iwaing yarinesa. Arata ge sinosa amimene susuwa nina keregai meko yai Tuwa Bayaura una kotora atu zuwarinesa.” Ayero sena arauwa.

**Yesu mene tani putoungne yaise ato sewa.**

*Mk 8:11-12; Lu 11:29-32*

<sup>38</sup>Yesu mene ayero sero tugata yenu sao tauyao ge gipao emo ena aune Farisayo ena awong amimene ge eyero kapetegairo sewa, “Gipao emo,

ning tani putoungne zo ye kasa yai ganene.” <sup>39</sup>Ayero sewa abena eyero sena, “Niye emo memeko-mameko. Emo mene bauno daigati noiya deka ayero niye Tuwa Bayau daigatinowa. Niye tani putoungne zo yana gari sineya. Arata niye tani putoungne zo oko garineya. Tani gitau porofete Yonana una atu kasa yena, deka ayao ine kasa yai garineya. <sup>40</sup>Yona nung iya mume etama ayero wo baina auna obera atu mitina, deka ayero na Emora Mani mene iya mume be etama ayero tawing mokora atu mitarinena. <sup>41</sup>Tuwa Bayau mene emo awega-ziwega nasani abena pugariniya be aune Niniwe emo mene iropuro emo bauno be yeme tawingna etu neya euna susuwa keregaya mouyao dimarineya. Awiya noeno oko, Niniwe emo Yona mene Tuwara ge tugata yenu nigiro dubo darawa yewa. Arata na etu dopero mitena amimene Yona daigatinena. <sup>42</sup>Ora Siba tawingna bauno tuwa nung dema iropuro emo bauno yeme tawingna etu neya euna susuwa keregai mouyao dimarineya. Awiya noeno oko, bauno amimene Solomonna kotumao bainakama awiya sai nigari taung dero tawing ake nibamu auna atu buna ara. Arata na etu dopero mitena amimene Solomon daigatinena.

**Iwae mene nupema tera kapetegairo bariniya.**

*Lu 11:24-26*

<sup>43</sup>Iwae mene emora mokora atu kasa yero oregaora masi eu atu tamari babariniya. <sup>44</sup>Baungno oko tamao nete giro eyero sariniya, “Garo nana doro bumuwang deka auna nupema kapetegairo babarinena.” Ayero sero baungno garo awiya sauno kora yeteya besuma sungno mitiya awiya gariniya. <sup>45</sup>Awiya giro nupema baungno iwae otao mani 7 awiya nung ine oko, meko nibamu awiya puro garo deka auna toiro mitao masi yarineya ara. Ayero yaya emo awiya gitau meko nasani nauna amimene be aune meko yore nibamu yariniya. Arare emo dubu meko yeme tawingna etu neya auna-una atu deka ayero kasa yariniya ara.” Ayero sena arauwa.

**Yesura ai metamaine.**

*Mk 3:31-35; Lu 8:19-21*

<sup>46</sup>Yesu nung ge awiya tugata nasani nenu nunuae-una bautara atu ai metamaine nuna mene ge nung eno sari sero nung diya mitiwa ara. <sup>47</sup>Ayero mitiwa emo zo mene Yesu eno eyero sena, “Ai nina metamaine awong ge ning eno sari sero buro bautara atu dopero miteya.” <sup>48</sup>Ayero senu Yesu mene ge abena eyero sena, “Awe ai nana yero niye? Awe mene metamani nana yero nowi?” <sup>49</sup>Ayero sero buro-mani nuna atu mitiwa aeno wawong yunu yero eyero sena, “Gipu. Aya mani metamani nana era. <sup>50</sup>Zo nung Mama nana uritira mitoifa auna ge nigiro dipunoifa nung amimene metata, numonota, aya nana niya ara.” Ayero sena arauwa.

**Emo zo mene nona we bure sesena auna ge ungwe.**

*Mk 4:1-9; Lu 8:4-8*

**13** <sup>1</sup>Iya be aune Yesu mene gare atu wosiro ou nazi deung bera bage atu adungno mitina ara. <sup>2</sup>Atu mitinu emo bauno dubu bainakama mene nuna-una kasa yewa ara. Kasa yewa giro nung wang zora witiro adungno mitinu emo bauno dubu baina mene zo awong ika atu dopewa ara. <sup>3</sup>Ayero yewa Yesu mene ge eniya ena sinasani kotumao daigairo awong eno tugata nena. Tugata nasani ge eyero sena, “Sana nigipu. Emo zo mene nona we bure atu sesari sero baungna ara. <sup>4</sup>Baungno nona we bure atu sesinenu we ena nagibe atu wosiwa. Atu wosiro daung mokera mitiwa ni mamani mene taungno miniro aung yewa ara. <sup>5</sup>We ena awiya tawing daba tame soyao auna wosiwa ara. Tawing awiya sori oko, arare we amimene mena pusasa yewa ara. <sup>6</sup>Ayero yewa tatai nunaе mene imokore oko wosiro baunare wari mene witiro awenu irara yero auno aung yewa ara. <sup>7</sup>We ena awiya tawing i nawe tatai mitiwa auna wosiwa ara. We awiya i nawere dema apakana tetemo pusasa yewa i nawe mene nona awiya denu me oko iyao yena ara. <sup>8</sup>We ena awiya tawing me gawire auna wosiro me daigairo iwa ara. Nona wosiro pusasa yero iropumuwa auna zora me nuna 100, zora me 60, ora zora me mene zo 30, ayero kasa yewa ara. <sup>9</sup>Arare zo nung dawongne mene ge awiya nigaise.” Ayero sena ara.

**Yesu mene ge eniya sinasani nauna auna susuwa.**

*Mk 4:10-12; Lu 8:9-10*

<sup>10</sup>Ge ayero senu buro-mani nuna mene nuna-una nugu baungno atata yero sewa, “Ning noeno ge eniya ena awiya awong eno sinosi?” <sup>11</sup>Ayero sewa Yesu mene abena eyero sena, “Tuwa Bayau nata Tuwa yero nariniya auna ge pungyero mitoiya, auna susuwa awiya niye ena mene nigae se sao mitiya ara. Arata emo bauno ena awiya aung ara. <sup>12</sup>Zo nung nona nung eno pugao awiya puro nai giro nupema memani pugana nung zamena simena baina tamariniya. Arata zo nung nona nung eno pugao awiya doro aung nai giro na nona nuna sorero pumana nung teba aung nariniya ara. <sup>13</sup>Awong diti moko nunaе mene gosinowa, arata oko giro baingtitinowa. Awong dawong mene ungwe nigitinowa, arata ungwena susuwa awiya oko giro baingtitinowa. Aeno na ge eniya awiya awong eno sinona. <sup>14</sup>Arare ge zo porofete Yesaya mene gaena ge awiya nunaе-una atu me niya. Ge awiya eyero mitiya,

Niye dawong mene zo nigarineya,  
arata susuwa nuna oko nigiro baingtarineya.  
Niye diti moko ninaе mene garineya,  
arata susuwa nuna oko giro baingtarineya.

**15** Emo dubu ewiya awong kotumao aung.

Awong dawong itigao ine,

arare ge oko nigao yero nowa.

Awong ditu moko nunae sikimuwa.

Ayero oko yao yateya, awiya ditu moko mene nonana susuwa gateya;

arita dawong mene gera susuwa nigateya; nupema dubo mene  
nonana susuwa nigiro baingtateya.

Ayero oko yao yateya, awiya awong dubo darawa yaya na awong  
kora yatena.

**16** Ninae mene zo ditu moko pagairo giro baingtitinowa. Nupema  
dawong yawero nigitinowa. Arare niye yawa yawa yero nowa. **17** Na ge  
me sane. Gitau porofete daigairo aune etutero nao emo daigairo awong  
amimene nona gosineya awiya gari aratapu nasani nauwa, arata awong  
oko gao yero nawe mamagayewa. Awong ge nigitinowa awiya nigari  
aratapu nasani nauwa, arata oko nigao yero nawe mamagayewa.

**Nona we bure atu sesaora ge eniya auna susuwa sena.**

*Mk 4:13-20; Lu 8:11-15*

**18** Arare nona me bure sesaora ge eniya sesena auna susuwa nuna  
awiya keregairo sana nigipu. **19** Nona we ena nagibe atu wosina auna  
susuwa eyao era: Emo zo uritira ge nigitinoi susuwa oko kasa yao noi  
pasenana maung mene nuna-una kasa yero uritira ge dubo nuna-una  
toitinoiya awiya puro tara yero noiya ara. **20** Ora nona we ena awiya  
tawing daba tame soyao auna wosina, auna susuwa eyao era: Zo nung  
uritira ge nigiro mena puro yawa yawa yero noiya. **21** Arata nung tatai  
aung, arare nung be apungkaka gege Tuwara nagibora nariniya. Ayero  
nai uritira gera iwo kasa yai nung mena yangduwariniya ara. **22** Ora nona  
we ena i nawe towang wosina auna susuwa eyao era: Zo nung uritira ge  
nigitinoiya, arata nung tawingna nona eno kotung-katung noi wau moni  
mene nung etegatinoiya, arare tani ayao amimene uritira ge wori nowa  
me oko kasa yero noiya. **23** Ora nona we ena tawing gawire auna wosina  
auna susuwa eyao era: Zo nung uritira ge nigitinoi susuwa kasa yero  
noiya. Nung amimene me itinoiya. We zora me 100, zora me 60, zora me  
30, ayao ine kasa yero noiya ara.” Ge ayero sena arauwa.

**Wuit towang atu i nawe dema pusasa yao auna ge eniya.**

**24** Ayero sero ge eniya zo dema eyero sena, “Uritira mitoiya amimene  
nata Tuwa yero nariniya auna susuwa awiya eyero pugairo sana teng yae.  
Emo zo mene wuit me iwaing bure atu sesena. **25** Me sesena aune ping  
tuno tano iwo nuna mene kasa yero wuit auna towang atu i-we zo goru  
nuna wuitra ine auna me awiya puro baungno sesero doro tara yena.  
**26** Ayero yenu wuit aune i-we aune teng pusasa yewa. Pusasa yero me

iwa aune i-we auna benaung kasa daung yena ara. <sup>27</sup>Ayero yenu mani sou mene giro buro maung tugata yero eyero sewa, “Emo tuwa, ning buro nina auna nona me iwaing gege sesasa, arata i-we meko ewiya natu buro pusasa niye?” Ayero atata yewa sena, <sup>28</sup>“Awiya iwo zo mene sesena amimene pusasa niya.” Ayero senu nupema atata yero sewa, “Ayero nae baungno i-we awiya sumanenese kotupunesita?” <sup>29</sup>Ge ayero sewa abena eyero sena, “Aungwa. Niye i-we supunasani wuit dema sumowi sero yangdopu. <sup>30</sup>Wuit awiya i-we aune dema teng mitete iropaoeto. Ago wuit me pumaora be kasa yai aune me pumaora emo mene gitau i-we meko awiya suno tairo tiro iyaora igiyaese sarinena. Arata wuit me gege etutero garo nana-una zuwagaese sarinena.” Yesu mene ayero sena arauwa.

**I mastet aune yis aune auna ge eniya.**

*Mk 4:30-32; Lu 13:18-21*

<sup>31</sup>Yesu mene ge eniya zo eyero sena, “Tuwa Bayau nata Tuwa yero nariniya, awiya i mastet ayero sero nonane auna me ine ara. Emo awong i me awiya puro bure nunae-una atu urinowa. <sup>32</sup>Urinowa pusasa yero bairo nona we ena bure atu urinonane awiya apakana daigairo baina noiya. Ayero noi bowang nuna babuze kasa nowa ni mamani mene utung nuna-una buro bowangna atu uwang gapunowa.” <sup>33</sup>Yesu mene ayero sero ge eniya zo eyero dema sena, “Tuwa Bayau nata Tuwa yero nariniya auna susuwa awiya yis ine. Bauno zo mene tao baina zora atu plaware yisre pugairo dawenu yis toiro plawa punu titisero daing yena ara.” Ayero sena arauwa.

**Yesu mene ge eniya gege sinauna.**

*Mk 4:33-34*

<sup>34</sup>Yesu mene emo bauno ge tugata yero nasani nauna, awiya ge eniya gege sinauna ara. Ge keregairo oko sao yena. <sup>35</sup>Ayero yenu porofete zo mene gitau ge eyero sena awiya me yena,

Na ge eniya sinasani kotumao pungyao tawing kasa  
yena aune kasa yero butunoiya awiya keregarinena.

**Wuit towang atu i-we pusasa yaora ge eniya auna susuwa keregaina.**

<sup>36</sup>Yesu mene emo bauno senu bautunewa nung garo nuna-una witina ara. Witiro mitinu buro-mani nuna mene nuna-una baungno eyero sewa, “Ning wuit bure atu i-we enana ge sesesa auna susuwa se nae niganene.” Ayero keregaise sewa giro sena, <sup>37</sup>“Emo we iwaing sesena nung awiya Emora Mani.

<sup>38</sup>Buro awiya tawing apakana auna teng ara. We iwaing awiya uritira gerao dubu ara. Ora i-we awiya pasenana maung auna mani awiso. <sup>39</sup>Iwo

mene i-we sesena awiya Sanda. Wuit me pumaora be awiya be baina. Me pumaora emo awiya angelo dubu. <sup>40</sup>I-we suno iyaora igitinowa susuwa ayao awiya be bainana atu kasa yariniya. <sup>41</sup>Be bainana atu na Emora Mani mene angelo dubu nana iyengtana wosiro pasena yumaora nona arita emo pasena yero nowa awiya apakana yangtagairo emo tuwa yaora masi nana yangdoro <sup>42</sup>iyao tauyao awao gege awinoiya auna augarineya ara. Ayero yaya atu zi irare barare sinasani engweze-pangweze nasani mitarineya. <sup>43</sup>Be aune emo etutero nao awong Maung nunae-una atu nasani wari posinoiya ayao ine posero waegarineya. Zo nung dawongne mene ge ewiya nigiro baingtaise.

**Emo zo mene wau moni baina tauna auna ge eniya.**

<sup>44</sup>Tuwa Bayau nata Tuwa yero nariniya auna susuwa eyao era. Maguro zo wau moni bainane tawing agewa zora atu pungyao mitauna, awiya emo zo mene taungno nupema pungyenu kayero mitinu nung yawa yawa nasani nona-owi nuna awiya apakana emo eno pugairo aung yenu nung eno zuma pugaiwa puro baungno tawing agewa awiya zuma gaero pungna arauwa.

**Zewe zaima auna ge eniya.**

<sup>45</sup>Nupema Tuwa Bayau nata Tuwa yero nariniya auna susuwa awiya eyao era. Emo zo nung zewe zaima tamaora buro yero nauna. <sup>46</sup>Ayero kaunawe iwaing zo taungno giro nona-owi nuna apakana emo eno pugainu aung yenu nung eno zuma pugaiwa puro baungno zewe zaima awiya zuma gaero pungna ara.” Ayero sena ara. Name tawingna nona me aung awiya doro kotumao naname puro pu uritira gairo nanenese auna sena.

**Mogara ge eniya.**

<sup>47</sup>Yesu mene eyero sena, “Tuwa Bayau nata Tuwa yero nari niya auna susuwa awiya mogu ine. Emo mene mogu witora augairo wo ewego-papego benaung giti watimuwa. <sup>48</sup>Ayero yewa wo be bunu watimuwa witi ika yenu emo adungno wo yangtagati nasani wo minao awiya puro pu taora gaiwa. Ora oko minao ami zo augairo yangduwa ara. <sup>49</sup>Tawingna be aung nai aune susuwa ayao ine kasa yariniya. Be auna atu angelo awong tawing sero sero auna atu baungno emo bauno iwawaing auna towang atu emo bauno memeko-mameko yangta gatigairo <sup>50</sup>iyao tauyao nibamu awao gege awinasani mitoiya auna augaya babarineya. Ayero yaya atu zi irare barare sinasani engweze-pangweze nasani mitarineya.” <sup>51</sup>Yesu mene ayero sero atata yero sena, “Niye ge apakana auna susuwa nigiro baingtitineita?” Ayero senu awong eyero sewa, “Nigiro baingtitonanane.” <sup>52</sup>Ayero sewa giro eyero sena, “Buro-mani

nana zo mene Tuwa Bayau nata Tuwa yero nariniya auna susuwa awiya nigitinoiya amimene garo maung zo ine ara. Garo maung mene nona mature sekare garo nuna-una pugairo diya noi emo ena mene nona kau nowa giro garo mokora atu puro emo nona kau nowa aeno pugatinoiya. Deka ayero buro-mani nana mene kotumao mature sekare amaze puro nasani emo bauno gipari yero giro puro gipariniya.” Ayero sena arauwa.

**Nasarete napora emo mene Yesu bauta potewa.**

*Mk 6:1-6; Lu 4:16-30*

<sup>53</sup> Yesu mene ge eniya benaung giti awiya sinete sero aung yero tawing awiya doro baungna ara. <sup>54</sup> Ayero baungno napo nuna-una kasa yero yere ibu nunae-una toiro uritira ge tugata yenu emo mene wawong di gauno eyero sewa, “Emo ewiya nigao baina aune tani putoungne yao awiya natu taungni? <sup>55</sup> Name susuwa nuna gosinenane. Nung kapendara mani ara. Ai nuna yazo Maria. Aune metamani nuna yazo nunae Yakoboto Yosefe, aune Simonto Yuda. Nupema numono mani nuna apakana awiya nae aune dema yero nowa. <sup>56</sup> Arare emo ewiya nigao baina awiya natu taungni?” <sup>57</sup> Ayero sero nung eno kotumao meko pumuwa ara. Ayero yewa Yesu mene awong eno eyero sena, “Porofete awong emo yazore. Arata napo nunae-una atu, o mamono nunae-una atu awong emo yazo aung.” Ayero sena ara. <sup>58</sup> Napo auna emo awong nung tumo oko diyao yewa, arare nung tani putoungne ena daigairo nunae-una atu oko yero nauna.

**Yohane ge ou zayero suwao emo awiya dewa magayena.**

*Mk 6:14-29; Lu 3:19-20; Lu 9:7-9*

**14** <sup>1</sup> Be auna atu emo tuwa Herode mene Yesura ge bowi nigna ara. <sup>2</sup> Nigiro buro-mani nuna eno eyero sena, “Yohane ge ou zayero suwao emo nung ka amimene magayaora atu iropuro noiya, arare nung tani putoungne yero noiya.” <sup>3</sup> Ge awiya tebeba oko sena. Herode nung gitau yemaoko meta nuna Filip auna bauno sorero puna, yazo nuna Herodia, bauno aeno yero senu gorobo emo baungno Yohane tere wawongne bunero puro pu bunao gare gaiwa. <sup>4</sup> Awiya Yohane mene ge eyero sena aeno yena, “Ning bauno pumasa awiya teng oko niya.” <sup>5</sup> Ayero senu Herode mene Yohane dari kotupunauna ara. Arata emo bauno mene Yohane nung porofete ayero sinasani nauwa, arare Herode mene awong awang yero yangdunu mitauna ara. <sup>6</sup> Atu mitaunu aune Herode kasa yao be nuna bunu giro emo babuze senu nuna-una kasa yero augairo mitiwa Herodiara mani baunodi amimene nunae-una benaungna atu na wuinu Herode mene giginu iwaing yenu giro <sup>7</sup>nung eno eyero sena, “Na Tuwa Bayaura benaungna ge me sana tau yae. Ning nona zota zo ara taungno giro sasa pugarinena.” <sup>8</sup> Ayero senu mani baunodi awiya nung ai nuna

mene kotumao zo pugainu giro eyero sena, “Ning Yohane ge ou zayero suwao emo auna gitau ato awiya puro pu taora gairo yeme puro bung na eno pugase.” <sup>9</sup>Ayero senu emo tuwa nung dubo nuna mou yena ara. Arata Tuwa Bayaura benaungna ge senu tauyena, nupema emo dema mitiwa amimene ge nuna gaya wosao yoiye sero awang yero giro, <sup>10</sup>saineba sero senu gorobo emo awong baungno Yohane bunao gare atu dubo nuna kapero <sup>11</sup>gitau taora pugairo puro buro mani baunodi eno pugaiwa puna ara. Pugaiwa mani mene puro ai nuna eno pugainu puna ara. <sup>12</sup>Yohane dewa magayenu giro buro-mani nuna mene kasa yero taung aingso nuna puro mutewa. Mutero aune baungno Yesu eno ge ungwe yewa arauwa.

**Yesu mene emo 5,000 aeno ma taungna.**

*Mk 6:30-44; Lu 9:10-17; Yo 6:1-14*

<sup>13</sup>Yesu mene Yohanena bowi nigiro tawing awiya doro wang zora witiro tawing zo emo aung auna atu nata nari sero baungna ara. Bautunenu emo bauno mene bowi nuna nigiro napo sero sero auna emo bauno dubu baina amimene ika bautunete tawing deka auna kasa yewa ara. <sup>14</sup>Ayero yewa Yesu mene wangna atu wosiro emo bauno dubu baina awiya giro yo baina yenu giro emo bauno yayare nunae awiya kora yena ara. <sup>15</sup>Ayero nasani nenu ture itinenu giro buro-mani nuna mene nung eno eyero sewa, “Eu etu nenane ture itiniya, arare emo pugasa napo sero sero baungno nona minao tamarineya.” <sup>16</sup>Ayero sewa abena eyero sena, “Niye awong babaese oko sae. Ninae awong eno nona pugaipu minae.” <sup>17</sup>Ayero senu abena sewa, “Nae ma wawong zo aune wo etobe gege maze puro nenane.” <sup>18</sup>Ayero sewa giro Yesu mene sena, “Nona awiya puro nana-una bungpu.” <sup>19</sup>Ayero sero emo bauno senu yowangze patiro isiyero adungno mitiwa ara. Ayero yero mitiwa nung ma wawong zore wo etore awiya puro ditu ika uritira yero Tuwa Bayau eno lange sero eegairo buro-mani nuna eno pugainu puro emo bauno eno bono yewa ara. <sup>20</sup>Ayero yewa awong apakana miniwa teng yena ara. Ayenu giro nona itoto ena awiya puro pu dekaongna gaiwa saka 12 teng yena ara. <sup>21</sup>Ora emo nona miniwa awiya 5,000 mene nona miniwa ara. Arata ai amonone mani mamanikakare ami zo oko zazagao yangduwa arauwa.

**Yesu mene ou patinu tauyenu ang yero baungna.**

*Mk 6:45-52; Yo 6:15-21*

<sup>22</sup>Yesu mene buro-mani nuna eno senu awong nata wangna witiro gitau ou nazi deung enaba bamuwa ara. <sup>23</sup>Bautunewa Yesu mene senu emo bauno zanero bautunewa nung isa buro yari nata witi ika diri yena ara. Atu isa buro nasani nenu ping atu ina. <sup>24</sup>A nenu wang mene bautunete ou nazi towang daung singsang gaina ara. Mume aune bisi benaungna atu butunenu kakawa baina dema dero buro wang puro

witiro wosiro nena. <sup>25</sup>Ayero nenu newa iya gari sero nenu Yesu mene ou nazi tame atu ang yero bautunete awong tamari nugu daung nenu <sup>26</sup>buro-mani mene nung ou tame atu ang nena amaze giro yangka sero ipinasani ‘iwaе mene butuniya’ ayero sero awang nasani aiyamama sewa ara. <sup>27</sup>Aiyamama sinewa Yesu mene eyero sena, “Niye tau yepu. Nane ara. Awang oko yae.” <sup>28</sup>Ayero senu Petoro mene be nuna-una puro eyero sena, “Tuwa, nine meba butunesita se giro na dema ou tame atu ang yero nina ina bumane.” <sup>29</sup>Ayero senu Yesu mene eyero sena, “Bung.” Ayero senu giro Petoro mene wangna atu wosiro ou tame atu ang yero Yesura una baungna ara. <sup>30</sup>Nuna-una bautunasani bisi baina nena awiya giro awang yero oura kuru-kuru sinasani Yesu yau sero eyero sena, “Tuwa, na pung!” <sup>31</sup>Ayero senu Yesu mene mena wawong nuna initinasani eyero sena, “Ning tumo diyao bainane oko, arare ou tura babari sero nesa. Ning noeno dubo eto nesi?” <sup>32</sup>Ayero sero wangna witiwato bisi aung yena ara. <sup>33</sup>Ayero yenu emo wangna mitiwa amimene Yesura una atu koing gairo eyero sewa, “Ning Tuwa Bayaura Mani me.” Ayero sewa arauwa.

**Yesu mene emo bauno yayare Genesaret atu kora yena.**

*Mk 6:53-56*

<sup>34</sup>Awong ou nazi buwagairo Genesaret tawingna atu kasayero witiwa ara. <sup>35</sup>Ayero yewa emo bauno mene Yesu gigiwa ziwenu ge sero sero yewa napo sero baungnu emo bauno yayare nunae mitauwa awiya puro Yesura una bamuwa. <sup>36</sup>Ayero yewa emo bauno yayare mene Yesu isa sero taung wori nuna tera atu gege ding yari sewa. Arare awong nung ding yewa awong auna yaya mene zo aung yena ara.

**Tuwa Bayaura ge mene aya-ewowora ge daigatinoiya.**

*Mk 7:1-13*

**15** <sup>1</sup>Be auna atu Yerusalem napora Farisayo aune sao tauyao ge gipao emo ena awong amimene Yesura una kasa yero atata yero sewa, <sup>2</sup>“Buro-mani nina awong noeno ewowo naname una tani daigatinowi? Ayero nasani wawong oko sayao<sup>b</sup> nona tebeba mininowa, amaze sinenane!” <sup>3</sup>Ayero atata yewa giro Yesu mene abena eyero sena, “Ora niye dema noeno tani ninae matu ago nasani Tuwa Bayaura sao tauyao ge awiya dedunowi? <sup>4</sup>Tuwa Bayaura ge zo eyero mitiya, ‘Ning tani iwaing ai maung nina eno nasani neu.’ Nupema ge nuna zo eyao era, ‘Zo

<sup>b</sup> 15:2 Wawong sayao. Waweng atu tawingta nona siwingyao zo mene mitao amaze sayari oko sewa. Awong sao tauyao ge nunae zo kotungno aeno sewa. Awong eyero sero nauwa: Yuda emo zo maketira-ta nagibe atu nasani nona zo emo Yuda oko zo mene ding yena amaze ding yariniya, awiya emo Yuda okora beingti suwaye Yuda emora-una gai aune nung wawong oko sayao tebeba nona ino minai moko nuna beingtire yariniya. Arare diga emora beingti mene awong yai pasenane yowi sero awong wawong sainaauwa ara.

nung ai maung nuna eno ge meko sari niya nung awiya depu magayae.’  
 5 Tuwa Bayaura ge ayero mitiya, arata ninae mene zo eyero sinowa, ‘Zo  
 nung aita maung nuna eno eyero tugata yariniya, nung amimene ai  
 maung nuna sou yaise sao oko mitiya, “Nona nito eno pugatena, arata  
 nona awiya yemaoko Tuwa Bayau eno pugari sewang tau yena.’ ”  
 6 Niye  
 ayero sinowa amimene ewowora tani puro nasani Tuwa Bayau mene ai  
 maung sou yaese ge sena awiya dotinowa aung yero noiya.  
 7 Niye ge iwao  
 emo me sao yero nowa! Porofete Yesaya mene ge gaena amimene niye  
 gapuniya. Ge gaena awiya eyero mitiya,

- 8 Tuwa mene eyero siniya,  
 Emo emimene na begiti mene bowi yero nowa,  
 arata moko nunae mene zo nana-una oko mitiya.
- 9 Awong emo ge amaze Tuwa Bayaura sao tauyao  
 ge ine ayero sinasani sero gipero yero nowa.  
 Arare awong na bowi yero tetere yero nowa.”

**Nona nomi mene noi name dubo beingtire yero nonine auna ge.**  
*Mk 7:14-23*

10 Yesu nung ayero sero emo bauno dubu baina yunu kasa yewa  
 eyero tugata yena, “Na ge sana nigiro baingtipu. 11 Nona be ninae-una  
 toitinoiya amimene oko niye yero noi beingtire yero nowa ara. Ge be  
 ninae-una atu kasa yero noiya amimene niye yero noi beingtire yero  
 nowa ara.” Ayero sena ara.

12 Ayero senu giro buro-mani nuna mene nimo aung nuna-una benaungna  
 baungno nung atata yero sewa, “Ning ge sesesa aeno Farisayo awong ge awiya  
 nigiro dubo mou pupuneya, awiya gosinesita?” 13 Ayero sewa giro abena  
 eyero sena, “I dubu baina uritira Mama nana mene oko urao agiti pusasa yero  
 baiwa awiya apakana suno aung yarinena ara. 14 Awong dubo mou pupuneya  
 auna kotung-katung oko yepu. Awong diti guma yao amimene nagibo  
 gitau yari yaine neya. Ora emo diti guma yao zo mene otao nuna diti guma  
 yao auna nagibo gitau yariniya, awiya awongto etobe deka ayero kowara  
 babarineyato.” 15 Ayero senu Petoro mene Yesu eno eyero sena, “Ning ge eniya  
 sesesa auna susuwa keregai niganene.” 16 Ayero senu Yesu mene eyero sena,  
 “Ayero niye deka dema kotumao aunga nowa. 17 Susuwa eyao oko nigao yero  
 nowita? Nona be mene mininonane tini naname una baungno nagibo nuna-una  
 wowosinoiya. 18 Ora ge be ninae-una atu kasa yero noiya awiya dubora  
 atu kasa yero noiya, arare ge amimene niye yero noi beingtire yero nowa  
 ara. 19 Emora dubora atu nona eyao awiya kasa yero noiya: kotumao meko,  
 emo dao magayao, kuma yao, nona ugaing yao, kotora atu ge iwao, ge iwero  
 emora yazo puro wosao. 20 Nona ayao amimene niye yero noi Tuwa Bayaura  
 benaungna atu beingtire yero nowa ara. Ora wawong oko saero nona minao  
 amimene noi niye beingtire oko yero nowa.” Ayero sena arauwa.

**Yesu mene bauno Yuda oko zora mani baunodi kora yena.**

*Mk 7:24-30*

<sup>21</sup> Yesu buro-mani nuna aune tawing awiya doro napo etobe mitauwato auna tawingna bamuwa ara. Napo etobe awiya Tayato Saidon. <sup>22</sup> Atu baungno newa Kenan tawingna bauno zo Yuda oko mene buro Yesu yausero sena, “O Tuwa, ning Dawidira sai mene naka eno yo aung. Mani baunodi nana iwae mene daraunu meko yero mitoiya.” <sup>23</sup> Ayero senu Yesu mene nigiro ge zo oko sena. Ayero yenu buro-mani nuna mene nuna-una kasa yero eyero sewa, “Ning bauno se babae. Nung naname una ago butunasani wawa siniya.” <sup>24</sup> Ayero sewa giro Yesu mene eyero sena, “Na Isreli emo dubu lama tara yao ine awong auna gerao gege.” <sup>25</sup> Ayero sinenu bauno awiya nuna-una benaungna kasa yero koing gairo isa sinasani eyero sena, “O Tuwa, ning na soreung!” <sup>26</sup> Ayero senu abena eyero sena, “Mani mamamina nona minao sorero sino<sup>c</sup> unao ine awiya teng oko niya.” <sup>27</sup> Ayero senu ge abena eyero kapetegaina, “Tuwa, awiya meba sinesa. Arata nupema sino awong diya nunae-una opesa wese atu nona susuna wowosi noi mininowa.” <sup>28</sup> Ayero senu giro Yesu mene eyero sena, “O bauno, tumo diyao nina bainakama. Arare sinesa ayero yaise.” Ayero sinenu mani baunodi nuna awiya iwaing yena arauwa.

**Yesu mene emo bauno daigairo kora yena.**

<sup>29</sup> Yesu nung tawing awiya doro nupema kapete gairo butunete Galilaya ou nazira kasa yero bage-bage nete diri zora witiro baungno adungno mitina ara. <sup>30</sup> Atu mitinu emo bauno dubu baina amimene emo bauno yayare witao nibamu puro buro nuna-una kasa yewa ara. Awong ena te gimao, o ena diti guma yao, o te wawong amao, o ena ge aung dau emo, o dubu bainane mene zo yaya benaung giti noyao, ayaq amaze puro kasa yero Yesura benaungna pugaiwa apakana kora yero aung yena ara. <sup>31</sup> Ayero yenu dau mene ge ungwe-maungwe yewa, ora te wawong amao mene iwaing yewa, ora te gimao mene iwaing yero ang yewa, ora diti guma yao mene zo diti pagaiwa ara. Arare emo bauno dubu baina mene tani amaze giro yawa yawa bainakama nasani Isreli emora Tuwa Bayau auna yazo de ika gatinasani bowi pasore yewa ara.

**Yesu mene emo 4,000 ma pugainu miniwa.**

*Mk 8:1-10*

<sup>32</sup> Yesu mene buro-mani nuna yau senu bumuwa eyero sena, “Na emo dubu ewiya eno yo baina niya. Noeno oko, awong nana-una wari be

<sup>c</sup> **15:26** Yesu mene sinona ge sena, awiya nung sino eno oko senata Yuda emo mene emo Yuda oko awiya sino ine ayero sero nauwa, aeno Yesu mene eniya ge pu sinona gairo sena ara.

etama ayero nete doteya nona minao aung yeti nona kau neya. Arare nona aung ayero sana awong etu iropuro bautunete nagibe atu meri magayowi sero awang nena.”<sup>33</sup> Ayero senu buro-mani nuna mene eyero sewa, “Ewiya: Eu nezera etu nenane, arare ma witao natu taungno emo dubu baina ewiya eno puganane minaya teng yariniye?”<sup>34</sup> Ayero sewa giro nung awong atata yero sena, “Ma ninae una nazigo mitiye?” Ayero senu awong eyero sewa, “Ma 7 aune wo mamanikaka etoka gege ara.”

<sup>35</sup> Asewa giro Yesu mene emo bauno adumaese senu adungno mitiwa ara. <sup>36</sup> Ayero yewa nung ma 7 aune wo eto amaze puro Tuwa Bayau eno dange sero eegairo buro-mani nuna eno pugainu awong bono yero emo bauno eno pugairo bamuwa ara. <sup>37</sup> Pugairo bamuwa emo bauno miniwa teng yena ara. Ayero yewa nona itoto awiya puro pu dekaongna gaiwa saka 7 teng yena ara. <sup>38</sup> Nona miniwa auna emo namba nunae 4,000. Arata bauno mani awisore ami zo oko zazagao.

<sup>39</sup> Yesu mene emo bauno iyengtinu bautunewa nung wangna witiro bautunete Magadan tawingna kasa yena arauwa.

**Tani putoungne zo yaise sewa Yesu mene awang sena.**

*Mk 8:11-13; Lu 12:54-56*

**16** <sup>1</sup>Farisayo emo aune Sadukayo emo awong amimene Yesura una kasa yero Yesu gaero gari sero etegao ge eyero sewa, “Ning kara sasa uritira tani putoungne zo kasa yai ganene.”<sup>2</sup> Ayero sewa giro awong eno abena eyero sena, “Niye ture iyari yero noi giro eyero sinowa, ‘Ture gori iwaing ziweri sawiya, arere awiro wari witariniya.’<sup>3</sup> Ora iya gari noi giro eyero sinowa, ‘Bereze siwingniya, arare yeme wa diyariniya.’ Niye berezera susuwa gosinowa, arata be euna susuwa emi zo niye oko gao yero neya ara.<sup>4</sup> Niye emo memeko-mameko. Emo mene bauno daigatinowa, deka ayaq ine niye Tuwa Bayau daigatinowa. Niye tani putoungne zo yana gari sinowa. Arata niye tani putoungne zo oko yana garineya. Tani gitau Yonana una atu kasa yena deka ayaq ine kasa yai garineya.” Yesu mene ayero sero awong yangdoro buro-mani nuna aune dema bamuwa arauwa.

**Farisayo aune Sadukayo emora tani auna ge eniya sena.**

*Mk 8:14-21*

<sup>5</sup> Yesura buro-mani awong ma nuwegairo doro Yesu aune dema ou nazi buwagaiwa ara. <sup>6</sup> Buwagairo suwa yero witi ika yewa Yesu mene eyero sena, “Farisayo aune Sadukayo auna yis awiya seung ninae-una goiye sero, niye umo yero baingtiti nasani neupu.”<sup>7</sup> Ayero senu awong eyero sinasani wina-se yewa, “Ma oko pao doro bumenane aeno sinita nowa.”<sup>8</sup> Ge auna sinewa nung yetine yero giro abena awong eno eyero sena, “Oiye, tumo diyao besaore niye! Noeno ma doteya auna ungwe-

maungwe nei? <sup>9</sup>Niye noeno susuwa nana oko gao yero nei? Na ma wawong zo amimene emo 5,000 aeno pugena mineya teng yeti itoto awiya yangtagairo saka nazigo yeteya be bumiye? <sup>10</sup>Ora ma 7 mene emo 4,000 aeno pugena mineya teng yeti itoto nunae yangtagairo saka nazigo yeteya be bumiye? <sup>11</sup>Na ma minao eno oko sesena. Niye noeno oko kotungno baingtao yetei? Farisayo aune Sadukayora yis awiya seung ninae-una goiye sero umo yero baingtiro naese sinena.” <sup>12</sup>Ge awiya tugata yenu awong nigiro eyero sewa, “O, nung ma minaora yis aeno oko sesiya. Farisayo aune Sadukayora gipao ge nunae aeno sesiya.” Ayero sewa ara.

**Petoro mene Yesura susuwa sero keregaina.**

*Mk 8:27-30; Lu 9:18-21*

<sup>13</sup>Yesu nung napo Sisaria-Filipai auna tawingna kasa yero buro-mani nuna atata yero sena, “Emo awong na Emora Mani aeno awe sero nei?” <sup>14</sup>Ayero senu awong nung eno eyero sewa, “Ena mene ning maze Yohane ge ou zayero suwao emo ayero sero nowa, asinowa ena mene Eliya ayero sero nowa, ena mene zo Yeremiata porofete gitau nasani nauwa auna zo, ayero ning eno sinowa ara.” <sup>15</sup>Ayero sewa giro nung nupema awong atata yero sena, “Ora nika niyetope na awe sero nowi?” <sup>16</sup>Ayero senu giro Simon Petoro mene abena eyero sena, “Ning Sorao Emo ninae Kristo. Ning Tuwa Bayau putoungne auna Mani ara.” <sup>17</sup>Ayero senu Yesu mene abena eyero sena, “Simon Yonana mani, ning yawa yawa yase. Noeno okowata, ge me sesesa awiya emora mokora atu oko kasa yero noiya. Uritira Mama nana mene sero keregai sinesa ara. <sup>18</sup>Arare na yazo nina sekawa zo sinena: Ning Petoro. (Ge naname-una Daba.) Arare nane daba tame atu dubu nana pugatinana garo ine kasa yero babariniya. Ayero yana mekora putoung mene awong puro wosari yai teng oko yariniya. <sup>19</sup>Ayero yero na uritira napo auna ki awiya ning eno pugarinena. Arare ning nona zo tawingna etu awang sasa giro nona awiya Tuwa Bayau mene uritira atu deka ayero gai teng yariniya.” <sup>20</sup>Ayero sero buro-mani nuna eno ge tauyao sinasani eyero sena, “Na Sorao Emo ninae Kristo nena awiya emo eno oko sae.”

**Yesu magayero aune seka yero iropariniya auna ge bowi bere-bere sena.**

*Mk 8:31-9:1; Lu 9:22-27*

<sup>21</sup>Be auna atu Yesu mene zayero nona nuna-una ago kasa yarinena auna ge buro-mani nuna eno sero keregairo eyero sena, “Na Yerusalem nape witana emo gitau yao aune pirisa babuze aune sao tauyao ge gipao

emo awong amimene yaya-biyaya na eno pugatinete na iwora waweng pugaya daya magayariena. Magayero wari be etama aung yai aune nupema seka yero iroparinena.” Ayero sero aune tani nuna-una ago kasayariniya auna ge apakana tugata yero sero aung yena ara. <sup>22</sup>Ayero senu giro Petoro mene nung yuno ewe baungno aune awang sinasani eyero sena, “Tuwa, Tuwa Bayau mene nigai nona ayao oko kasa ye nina-una gaise.” <sup>23</sup>Ayero senu Yesu mene kapetegairo Petoro eno abena eyero sena, “Sanda, ning awiya Tuwa Bayaura ge okowata, emora ge niya.” Ayero sena arauwa.

**Yesu ago yaora ge.**

<sup>24</sup>Be deka aune Yesu mene buro-mani nuna eno eyero sena, “Zo nung na ago yari yero giro aratamao nuna apakana doro dubo minaore yaya tamaore auna i pasao nuna diungno na ago yaise. <sup>25</sup>Noeno okowata, zo nung nao nuna tawingna awiya sorero puro nari kotumariniya auna teng nao nuna awiya aung yariniya. Arata zo nung na eno yero giro nao nuna duwariniya amimene nao iwaing tamariniya. <sup>26</sup>Zo nung tawingna nona iwaing apakana awiya pupunariniya, arata nao nuna aung yariniya, awiya nona nomi nuna-una mitariniye? Ora nao nuna kapetegaise kotungno zuma no pugai aune nao nuna awiya abena kapete nuna-una gariniye? Aung ara. <sup>27</sup>Na Emora Mani mene Mama nana-una waegaore angelo dubu nuna aune dema wosiro emo bauno apakana auna nao nunae-una teng abena pugarinena ara. <sup>28</sup>Na meba sane: Emo ena etu dopero miteya amimene oko magayao mitaya na Emora Mani mene tawing sero sero auna Tuwa yero nete daung-mokera kasayana gariney.

**Yesu nung diri atu uritira waegao pungna.**

*Mk 9:2-13; Lu 9:28-36*

**17** <sup>1</sup>Yesu mene wari be 6 nete Petoroto Yakobo aune meta nuna Yohane awong pungnu awong nata diri baina zora witiro bamuwa ara. <sup>2</sup>Ayero yero atu beraung nunae-una dodopinasani beraung nuna zo ewe yena ara. Ayero nasani beraung nuna warira waegao ayao ine waegaina ara. Nupema taung wori nuna awiya neyangyero zayang zayang yena ara. <sup>3</sup>Ayero nenu Moseto Eliya mene wosiro nuna-una nugu kasa yero nung aune dema ge ungwe-maungwe nasani mitiwa Petoro otao etore mene gigiwa ara. <sup>4</sup>Ayero gigiwa Petoro mene Yesu eno eyero sena, “Tuwa, nae etu mitenane awiya iwaing. Arare nigasa na kouboga etama sinane — zo nina, zo Mosera, zo Eliyara.” <sup>5</sup>Ayero sinenu bereze waegao bainane zo wosiro awong worena. Ayero yenu aune ge zo bereze mokora atu eyero kasa yenu nigiwa, “Awiya Mani bouwa nana. Na nung eno yawa yawa nena. Niye ge nuna nigipu.” <sup>6</sup>Buro-mani mene ge awiya nigliro diti beraung nunae worero puro pu tawingna gairo awang yero

ipinasani mitiwa ara. <sup>7</sup>Ayero newa Yesu mene nunae-una nugu baungno awong initinasani eyero sena, “Niye iropungpu, awang oko yepu.” <sup>8</sup>Ayero senu awong diti pagairo Yesu gege gigiwa ara. <sup>9</sup>Arare diri atu wowosinewa aune Yesu mene eyero sena, “Nona benaung sekawa zo gigeya auna ge bowi emo zo eno oko sarineya. Mama mene na Emora Mani awiya uwai magayaora atu seka yero iropana aune ge bowi awiya sarineya.” <sup>10</sup>Ayero senu giro buro-mani nuna mene nung atata yero sewa, “Eliya gitau bumai aune Kristo bumariniya,’ awiya sao tauyao ge gipao emo mene noeno ayero sinowi?” <sup>11</sup>Ayero atata yewa giro abena eyero sena, “Eliya nung meba gitau kapetegairo tawingna nao meko awiya apakana korayai aune Kristo bumariniya, awiya ge meba ara. <sup>12</sup>Arata sana nigipu. Eliya nung yemaoko kasa yero naunu emo bauno mene susuwa nuna gigiwa oko kasa yao yenu nung eno tani tebe-tabe yewa ara. Arare awong na Emora Mani deka ayero puro dedunasani gainasani ayero yarineya ara.” <sup>13</sup>Ayero senu awong nung Yohane ge ou zayero suwao emo aeno sena awiya gigiwa arauwa.

**Yesu mene mani emodi zora una atu iwae tunena.**

*Mk 9:14-29; Lu 9:37-42*

<sup>14</sup>Awong diri atu wowosinete emo bauno dubu baina auna una kasa yewa aune emo zo mene buro Yesura nugu atu koing gairo eyero sena, <sup>15</sup>“Tuwa, ning mani nana eno yo aung. Nung be ozaung angzi apunasani yaya baina tapunoiya. Nung iyaora zuvero nasani oura gutero nasani ayero noiya ara. <sup>16</sup>Arare na buro-mani nina eno puro bumena kora yari teya teng oko tiya.” <sup>17</sup>Ayero senu Yesu mene abena eyero sena, “O niye emo bauno meko, tumo diyao aung. Na be nazigo niye aune dema narineni? Mani puro nana-una bungpu.” <sup>18</sup>Ayero senu awong mani puro bumuwa nung iwae gona yero ge senu mani doro baungnu mani mena iwaing yena ara. <sup>19</sup>Arare buro-mani nuna mene awong gege nata mitasani aune nung atata yero sewa, “Nae nono yero iwae tunaora buro yetenane teng oko yao yetiye?” <sup>20</sup>Ayero sewa abena eyero sena, “Tumo diyao ninae besao aeno teng oko yao yetiye. Na meba niye eno sana nigipu. Tumo diyao ninae awiya i me maingkoka zo ine iropuro baina yariniya, amimene zo niye diri eeno, ‘Ning etu zokero otu baung!’ ayero saya, zokero babariniya. Tumo diyao ayao awiya ninae-una mitai niye buro baina yao teng ara. <sup>21</sup>[Iwae ayao tunao awiya nona zota zo mene oko niya ara. Isa saore nona seminaore mene gege tunao teng ara.]” Ayero sena arauwa.

**Magayero iopariniya auna ge bowi nupema sena.**

*Mk 9:30-32; Lu 9:43-45*

<sup>22</sup>Buro-mani nuna nawe apakana Galilaya tawingna atu nuna-una au dekaongna gaiwa aune Yesu mene eyero sena, “Nanane aune na Emora

Mani awiya emora waweng pugaya<sup>23</sup> daya magayana wari be etama aung yai aune Mama mene na uwai iropari nena ara.” Ayero senu buro-mani awong nigiwa dubo nunae mou yena arauwa.

**Petoro mene wora bera atu moni pungna.**

<sup>24</sup> Yesu buro-mani nuna aune Kapaneam nape kasa yewa emo ena Tuwa Bayaura ibu baina aeno takis buro nasani nauwa amimene Petoro atata yero sewa, “Gipao emo ninae mene ibu bainana takis 50 toya awiya pugatinoita?” <sup>25</sup> Ayero sewa Petoro mene eyero sena, “Yore, pugatinoiya ara.” Ayero sero nung nupema tera Yesura una gare witiro ge awiya oko keregao nenu Yesu nung nuka nutope Petoro atata yero sena, “Simon, susuwa ewiya gasa nono yai giro abena se gane: Tawingna emo tuwa awong ana-una atu takista kastam<sup>d</sup> pupunowi, dubu nunae unata dubu zora una ing?” <sup>26</sup> Ayero senu Petoro mene eyero sena, “Dubu zora una.” Ayero senu Yesu mene eyero sena, “Iwaing sinesa, arare emo tuwara dubu awong takis pugaese sao oko mitiya. <sup>27</sup> Arata saineba, awong name eno kotumaya meko yao eno, ning ou nazira baungno angsi augairo wo zo gitau dumarinesa awiya watimasa witai be nuna inasa zanai kina zo tamarinesa. Awiya ibura takis moni nanao ayero sero puro baungno awong eno pugasa teng yae.” Ayero sena arauwa.

**Emo baina yero nao auna auna ge.**

*Mk 9:33-37; Lu 9:46-48*

**18** <sup>1</sup> Wari be aune buro-mani nuna awong nuna-una baungno atata yero sewa, “Uritira mitoiya amimene nata Tuwa yero nai aune awe mene gitau yao baina yero nariniye?” <sup>2</sup> Ayero sewa Yesu mene mani maingkoka zo senu bunu nunaeuna towang atu pugairo<sup>3</sup> eyero sena, “Na meba niye eno sane. Niye dubo kapetegairo mani mamanikakara nao ine oko yero narineya, awiya uritira mokora oko towarineya. <sup>4</sup> Zo nung dubo nuna puro wosiro mani eyao ine yero nariniya, nung amimene Tuwa Bayau nata Tuwa yero nai aune emo gitau yao baina yariniya. <sup>5</sup> Arare zo nung na eno nasani mani eyao ine zo kora yariniya, nung amimene na kora yetiya ayao ine yariniya arauwa.

**Mani pasenana oko yumanene.**

*Mk 9:42-48; Lu 17:1-2*

<sup>6</sup> Zo nung mani mamanikaka na tumo didinowa auna zo yumai pasena tamoiye sero, niye bere-bere daba bainakama zo emo auna dube

<sup>d</sup> **17:25** Kastam. Kastam awiya takis zo. Nona ake-akemo atu puro buro nape toware yero giro bere gitau nona auna takis moni pugairo aune puro nape toitinauwa. Tani deka ayao ine Papua Nu Gini taun auna maketira atu yero nowa. Nona minao puro toware yero giro bere gitau goma be zuma gaero aune nona puro toiro maket yero nowa.

kimegairo wito kurura teugaipu gutero babai teng yariniya. Noeno oko, emo amimene pasena oko yaore oura gutero magayariniya, awiya nona eo yao gege. Arata nung pasena yai aune Tuwa Bayau mene abena pugariniya, awiya nona mou-mesa yao. <sup>7</sup>Pasenana yumao benaung giti amimene kasa yero emo bauno yumai pasenana zuwarineya. Arata zo nung emo bauno pasenana yumariniya amimene meko yaise. <sup>8</sup>Arare wawong nina zo meneta te nina zo mene pasena yasese yai giro kapero yangdo. Nao me iwaing pumari kotungno giro wawong dekaongkare gege o te dekaongkare gege nete nao me iwaing topetasa teng yariniya. Arata tere wawongne zere tutupore deka ayero puro nasa ago ning iyao tauyao awao gege awinoiya auna augaya babasa teng oko yariniya. <sup>9</sup>Ora diti moko nina zo mene pasena yasese yai giro zokero yangdo. Nao me iwaing pumari kotungno giro diti moko dekaongkare gege nete nao me iwaing topetasa teng yariniya. Arata etobe deka ayero puro nasa ago ning kowa iyaore auna augaya babasa teng oko yariniya.

**Lama zo tara yao auna ge.**

*Lu 15:3-7*

<sup>10</sup>Niye mani-mamani nana zo gaya oko wosao yaise. Awiya susuwa eeno sinena. Angelo nunae uritira atu nowa awong uritira Mama nana auna benaungna kasa nasani mani nunae-una ge ungwe yero nowa.

<sup>11</sup>[Na Emora Mani mene emo tiri-tara yao awiya kau yero tamari sero wosiwang.]

<sup>12</sup>Ora ge zo sana kotungno abena sepu gane. Emo zo lama nuna 100 nunae-una zo mene tara yai giro yangduwarinita? Aung ara. Nung lama 99 nona mininasani miteya awiya doro baung eu ware yero tara yao amaze kau yariniya. <sup>13</sup>Na meba sana. Nung baungno kau nete taungno aune 99 oko tara yao awong aeno okowata, tara yeti tamiya awiya eno dubo iwaing yariniya ara. <sup>14</sup>Arare deka aine uritira Maung ninae mene mani-mamani nana nunae-una zo mene Maungna una gomara atu tara yoiye sero sinoiya arauwa.

**Otao pasena yai aune kora yaora nagibo.**

<sup>15</sup>Otao nina zo mene pasena nina yai giro ning baungno nito nata adungno meko nuna gipe gae. Ayero yasa nung ge nina nigiro kotumao nuna iwaing tamai nupema otao wina-ye yarineyato. <sup>16</sup>Ora ge nina dai giro doro baungno emo dekaongkata etobe ayao awiya puro nupema tera nuna-una babaya awongto dema susuwa nuna gosinasani ge nito sarineyato awiya nigaeto. <sup>17</sup>Ora ge ninae teng deka ayero dai giro dubu nana-una benaungna atu keregai gae. Dubura ge deka ayero dai giro niye gaya nung emo meko, diga emota takis pumao emo ine yaise. <sup>18</sup>Na memoko sane. Niye tawingna etu tairo diyaya giro Tuwa Bayau mene

deka ayero uritira atu tairo diyariniyi. Ora tawingna etu besaya giro Tuwa Bayau mene deka ayero uritira atu besariniyi.

<sup>19</sup>O zo susuuno sana nigipu. Ninae-una etobe mene nona zo eno dubo nunato dekaongka tiyayato dekaongka yai isa sayato giro uritira Mama nana mene isa nunato nigiro auna teng pugariniyi. <sup>20</sup>Noeno oko, emo etobeta etama awong yazo nana-una augaya giro na nunae-una towang atu narinena.” Ayero sena arauwa.

**Soumani meko zo mene otao nuna oko ao-diyao yena auna ge.**

<sup>21</sup>Yesu mene ge ayero senu Petoro mene atata yero sena, “Tuwa, otao nana zo mene na eno pasena nai na be nazigo ayao awiya pasena nuna yangduwari nen? Be 7 ayao awiya yangduwana teng yarinita?” <sup>22</sup>Atata yenu Yesu mene abena eyero sena, “Na be 7 ayao yangduwasese oko sinena. Ning be daigairo nibamu 70 taims 7 ayao ine yangdotinasese sinena. <sup>23</sup>Tuwa Bayau nata Tuwa yero nariniyi auna susuwa amaze na emo tuwa zora pugairo sana nigipu. Emo tuwa zo mene mani sou dubu nuna abena nuna abena pugaese ge buro awiya zayena. <sup>24</sup>Arare ge buro zayero sou mani bunaese senu nunae-una zo abena nuna 10 milion kina amimene emo tuwara una kasa yena. <sup>25</sup>Nung abena nuna baina awiya pugaine yao teng oko yenu giro emo tuwa mene eyero sena, ‘Emo erita bauno maingne nuna arita wo nuna nona wau nuna awiya apakana emo mene zuma gaero pumaya na moni tamane.’ <sup>26</sup>Ayero senu soumani mene emo tuwara una koing gairo isa sinasani eyero sena, ‘Emo tuwa nana, ning na ao-diyasa abena nina pugarinena.’ <sup>27</sup>Isa senu emo tuwa nung yo-auno giro ao-diro abena nuna baina awiya yangduna. <sup>28</sup>Ayero yenu nung gare atu wosiro baungno soumani otao nuna zo tauna, nung awiya nuna-una abena nuna 100 kina mitina. Nung amaze taungno dubo iniro dedunasani eyero sena, ‘Abena nana yemeneka keeune mena pugail’ <sup>29</sup>Ayero yenu otao nuna nuna-una koing gairo nung eno isa sinasani eyero sena, ‘Ning na ao-diyasa abena nina pugarinena.’ <sup>30</sup>Nung eno isa senu ge nuna oko nigao yero baungno senu otao nuna eno eyero sinasani bunaogare pugaiwa, ‘Abena nuna pugairo aung yero aune kasa yarinesa.’ <sup>31</sup>Ayenu otao mani nuna mene giro moko nunae meko yenu baungno emo tuwa eno ge ungwe yewa ara. <sup>32</sup>Ge ungwe yewa emo tuwa mene nigiro soumani awiya nupema yau senu bunu eyero tugata yena, ‘Ning emo meko nibamu amaze sina. Ning na eno isa sesesa na ning yo-aungno giro abena nana baina awiya ning eno dotena. <sup>33</sup>Arare na ning ao-diyena ayao ine ning deka otao nina eno yo-aungno ao-diyatesa, awiya teng yatiya.’ <sup>34</sup>Ayero sero dung yero tini kapenu gorobo emora waweng pugairo eyero sena, ‘Niye bunaogeko nibamu nung eno pugaipu, nasani aune nung abena nana baina awiya pitiro aung yai aune yangduwarineya.’ <sup>35</sup>Yesu mene ayero sero ge ewiya susuuno sena, “Arare niye dubo eo-yaore pasena wina-yangduwao oko yao yaya uritira Mama nana mene nona mou-mesa yao deka ayao niye eno yariniyi arauwa.”

**Bauno yangduwaora ge.**

*Mk 10:1-12; Lu 16:18*

**19**

<sup>1</sup> Yesu nung ge noyao benaung gitи awiya sero aung yero Galilaya tawing doro Yudaya tawing agewa ou Yodan deung enabara mitina atu baungna ara. <sup>2</sup> Bautu nenu emo bauno dubu baina mene nung ago yewa ara. Tawing auna atu newa nung emo yayare kora yena ara. <sup>3</sup> Atu nenu Farisayo nung gaero gari sero kasa yero nung atata yero sewa, “Zo nung bauno nuna susuwa zota zo eno yero yangduwai teng yarinita?” <sup>4</sup> Ayero sewa nung abena eyero sena, “Niye Tuwara ge eyero mitiya awiya oko zazagairo gao mene saine neya, awiya!

Yaora Maung mene nung tawing zayaora atu emo yari nasani emore baunone teng yena. <sup>5</sup> Yero aune eyero sena, ‘Arare emo mene ai maung nuna yangdoro bauno nuna aune dema gauno baingtiro awongto dubore taungne dekaongka yero narineyato.’

<sup>6</sup> Arare awongto etobe okowata, dekaongka yero narineyato. Tuwa Bayau mene awongto pu dekaongna gainu atiwato, arare emo mene oko kapaese.” <sup>7</sup> Ayero senu awong abena eyero sewa, “Ayao siya, awiya Mose mene noeno eyero seni, ‘Emo zo mene bauno nuna yangduwari yero giro igi pugairo sai babaise.’ Mose mene noeno ayero seni?” <sup>8</sup> Ayero sewa Yesu mene abena eyero sena, “Mose nung niye Tuwa Bayaura ge nigao awang gaung yero nauwa susuwa aeno wina-yangduwaora ge sewa nigina ara. Arata zayaora atu nagibo ayao ine zo oko mitauna. <sup>9</sup> Arare nane sana nigipu. Zo nung bauno nuna yangdoro zo atariniya nung amimene susumao nunato awiya kapero nung kuma yetiya aine yariniya. Arata bauno nung emo zore nete meko yero nai aune emo zo mene atiro aune awang sariniya, awiya wina-yangduwaora pasena awiya bauno mene dimariniya. Emora oko yariniya.” <sup>10</sup> Ayero senu buro-mani nuna mene eyero sewa, “Arare sao auna susuwa ayero mitai giro name bauno aung nao amimene zo iwaing mitaora nagibo ara.” <sup>11</sup> Ayero sewa Yesu mene abena eyero sena, “Emo dubu baina mene ge amaze nigiro pu dube gao ine aung. Emo putoung mena pugao pumao gege mene puro pu dube garineya. <sup>12</sup> Emo ena aira tiyangna atu kasa yero bauno ataine yao teng oko somono nowa; ora ena awiya emo mene taung aingso nunae gera nowa bauno oko atao yero nowa; ora ena mene zo uritira ge eno bauno oko atao somono nowa. Arare zo auna putoung mitai giro ge ewiya puro pu dube gaise.” Ayero sena arauwa.

**Yesu mene mani mamanikaka gao yena.**

*Mk 10:13-16; Lu 18:15-17*

<sup>13</sup> Emo bauno awong mani mamanikaka nunae puro baung Yesura una yero wawong paka ziye yero isa saise sewa. Ayero yewa buro-mani nuna mene emo bauno awang sewa ara. <sup>14</sup> Awang sewa giro Yesu mene eyero

sena, "Niye mani mamanikaka yangdopu nana-una bumae. Nagibo nunae oko gazae. Ayao amimene uriti napora gerao." <sup>15</sup>Ayero sero wawong nuna paka ziyo nunae-una yero awong gao yena. Ayero yero aune tawing awiya doro baungna ara.

**Emo zo wau bainane amimene Yesu bauta potena.**

*Mk 10:17-31; Lu 18:18-30*

<sup>16</sup>Emo zo mene Yesura una kasa yero atata yero sena, "Gipao emo, na buro iwaing zo nomaze yero aune nao me iwaing tamarineni?" <sup>17</sup>Ayero senu Yesu mene eyero sena, "Nona iwaingna susuwa gari sero noeno na atata nesi? Iwaingna susuwa auna Maung awiya dekaongka gege niya. Arare ning nao me iwaing auna gerao yari yero giro sao tauyao ge nuna diung." <sup>18</sup>Ayero senu giro nung sao tauyao ge awiya noiye ayero sinasani atata yenu Yesu mene eyero sena, "Na sao tauyao ge eyao eno sinena: 'Ning emo oko dasa magayae. Ning kuma oko yase. Ning ugaing oko yase. Ning emo zo gera pugatinasani ge oko iwase. <sup>19</sup>Ning ai maung nina-una ge diung. Ora ning nika nitope aratapunosa, deka aine emo ena eno ye.' Amaze sinena ara." <sup>20</sup>Ayero senu emo taung seka amimene abena eyero sena, "Awiya yemaoko otu mena diungno butunona. Arare zo nono yero yana teng yariniye?" <sup>21</sup>Ayero senu Yesu mene eyero sena, "Ning etutero nari kotungno giro baungno nona nina apakana pugasa emo mene zuma gaero pumaya wau moni nina awiya emo bogamasa eno bono yasa pumae. Ayero yasa wau nina uritira atu mitariniya. Ayero yero aune ning buro na ago yase." <sup>22</sup>Ayero senu emo taung seka amimene ge awiya nigiro kotung-katung nasani doro baungna. No eno oko, wau moni nuna witao. <sup>23</sup>Baungnu Yesu mene buro-mani nuna eno eyero sena, "Na memoko sane. Emo wau moni bainane mene uritira towari nete buro bainakama yariniya. <sup>24</sup>Na nupema sane. Wo kamel mene zai mo gayao auna enora towao awiya teng oko. Deka ayero emo wau moni bainane mene Tuwa Bayaura napo auna babao awiya deka teng oko." <sup>25</sup>Ayero senu buro-mani awong ge awiya nigiro yangka sero eyero sewa, "Arare awe mene<sup>e</sup> uritira baungno nao me iwaing tamao teng niye?" <sup>26</sup>Ayero sewa Yesu mene awong anuwing nasani eyero sena, "Awiya emo mene yao ine teng oko. Arata Tuwa Bayau mene ayero yai teng yariniya." <sup>27</sup>Ayero senu Petoro mene bera puro eyero sena, "Ayero nae nona nanae apakana nuwe gatigairo ning ago nonane. Arare nete auna abena no

---

<sup>e</sup> **19:25** Yesura buro-mani ge ayero sewa, noeno okowata, Yuda emora gitau yao mene eyero sinauwa, "Emo wau bainane mene uritira babari sero nete waura oko yero babarineya. Arata emo bogamasa mene uritira babari sero nete waura bainakama yarineya." Arata Yesu mene zo ayero oko sena. Arare buro-mani nuna mene iwawa yero eyero kotumuwa. "Emo waure mene uritira babao ine teng oko siya, awiya name bogamasa mene nono yero uritira babarineenie?" Ayero kotumuwa ara.

nanae-una kasa yariniye?" <sup>28</sup>Ayero atata yenu Yesu mene eyero sena, "Na memoko sane. Nete nona apakana seká yero iwaing kasa yariniya be aune na Emora Mani mene adumao masi simaore nana-una atu adungno mitana na ago yewa niye deka ayero emo tuwara adumao masi 12 auna atu mitasani aune Isreli emo dubu 12 amaze awega-ziwega yarineya.

<sup>29</sup>Arare zo nung na eno nasani metamani o nu ai amono, o meto mani, ai maungne mani awiso, o napo, o tawing yangduwariniya — nung amimene abena nona daigairo ipu ewa-gaewa yao puro auna tame nao me iwaing dema maung yariniya ara. <sup>30</sup>Arare emo gitau neya awena-una ena mene ago yarineya. Ora ago neya awong auna ena mene gitau yarineya.

**Wain buro yero nowa auna ge eniya.**

**20** <sup>1</sup>Tuwa Bayau nata Tuwa yero nari niya auna susuwa awiya wain burora maung zora pugairo sane. Wain burora maung zo mene wain buro nuna eno kotungno giro buro emo pumari gora-gara baungna. <sup>2</sup>Ayero yero ena puro buro be dekaongka auna zuma nuna K1.00 ayero keregainu gigiwa teng yenu giro buro nuna-una iyengtinu bamuwa. <sup>3</sup>Wari witiro 9 kilok nenu nung nupema baungno emo ena napo kakame atu tebeba newa giro eyero sena, <sup>4</sup>'Wain buro nana mitiyare niye baungno buro yaya zuma teng pugarinena.' <sup>5</sup>Ayero senu giro wain buro nuna-una bamuwa ara. Ayero yero 12 kilok aune mani ena puro 3 kilok nupema ena puna. <sup>6</sup>Ayero 5 kilok nupema baungno emo ena buro aung newa taungno giro eyero sena, 'Niye noeno wari eune buro oko yao timara neya ture itiniye?' <sup>7</sup>Ayero senu awong abena eyero sewa, 'Awong buro ge zo nae eno oko sao.' Ayero sewa giro nung awong iyengtiti nasani eyero sena, 'Wain buro nana-una buro mitiya arare baungpu yae.' <sup>8</sup>Burora maung mene ayero nenu ture inu buro diya yao emo nuna yau senu bunu eyero sena, 'Ning buro emo au dekaongna gairo zuma pugai pumae. Ago kasa yeteya atu zayero pugairo bautunete gitau kasa yeteya atu besugai.' <sup>9</sup>Ayero senu giro ago bumuwa awiya senu bumuwa K1.00 pugairo aung yena. <sup>10</sup>Pugainu gitau bumuwa awong giro eyero kotupunewa, 'Zuma puro witiro pugariniya.' Ayero sinasani mitiwa, arata diya mene K1.00 dekaongka amaze awong eno pugaina. <sup>11</sup>Pugainu puro gugumama sinasani burora maung eno kotumuwa meko yena. Ayero nasani eyero sewa, <sup>12</sup>'Ago bumeya awong buro wan aua gege yeteya. Arata nanae mene zo wari baina auna atu yaya kokoni yao tapunenane ture iya, awiya ning noeno ago bumeya aeno zuma teng ayero pugatinesi?' <sup>13</sup>Ayero sewa burora maung mene nunae-una zo eno eyero sena, 'Otao, na niye eno oko meko nena. Na K1.00 sesena nigesa teng yetiya. <sup>14</sup>Arare moni nina puro baung. Na ago beya awiya ning eno teng ayero pugari kotumena teng yetiya. <sup>15</sup>Nona nana ware, eyerota

ayero yana teng yariniya. Ning bayao nana-una awong eno dubo mou tapunesita?”

<sup>16</sup> Yesu mene ungwe awiya diro besugairo ge susuuno eyero sena, “Arare ago neya amimene gitau yarineya. Ora gitau neya amimene ago yarineya.” Ayero sena arauwa.

**Yesu magayero iropariniya auna ge bowi senu be etama yena.**

*Mk 10:32-34; Lu 18:31-34*

<sup>17</sup> Yesu nung Yerusalem nepe babari sero wiwitinete aune buro-mani nuna 12 awiya gege puro baung ewe yero aune awong nuka nuye gege nagibe atu bautunasani eyero tugata yena, <sup>18</sup> “Sana nigipu. Name Yerusalem babari wiwitinenane. Atu kasa yanane aune awong na Emora Mani awiya pirisa babuze aune sao tauyao ge gipao emora waweng pugaya na magayanese sarineya. <sup>19</sup> Magayanese sero na puro emo Yuda okora waweng pugaya na izinasani waung mene dedunasani anete i pasaora daya magayarinena. Magayana wari be etama aung yai aune nupema iroparinena ara.” Ayero sena arauwa.

**Yakoboto Yohanena ai mene awongto baina yaetose sena.**

*Mk 10:35-45*

<sup>20</sup> Be auna atu Zebedira aro mene mani nuna etobe puro Yesura una nugu baungno koing gairo nona zo eno isa sena ara. <sup>21</sup> Ayero yenu nung atata yero sena, “Ning no eno sinesi?” Ayero senu giro nukara eyero sena, “Ning sasa mani nana etobe ning Tuwa baina kasa daung yarinesa be auna atu awongto nina una nugu zo wawong mera zo wawong mepora<sup>f</sup> mitaetose.” <sup>22</sup> Ayero senu Yesu mene abena eyero sena, “Ning ge sinesa auna susuwa oko gosinesa. Na ou dokowang yao zo minarinena, awiya nito teng minarineyato?” Ayero senu awongto sewato, “Yore, teng minarinena.” <sup>23</sup> Ayero sewato nung awongto eno abena eyero sena, “Ou dokowang yao zo minarinena, awiya minarineyato. Arata nito nana-una zo wawong mera zo wawong mepora adungno mitarineyato auna ge awiya nane saine yao oko. Mama nana nung dubo nuna mene mani ena kotupunasani masi awiya sosenu mitoilya, arare awong amimene masi auna adungno mitarineyato.” Ayero sena arauwa.

<sup>24</sup> Asewa buro-mani 10 awong ge awiya nigiro otao nunae etobe eno gigiwa meko yena ara. <sup>25</sup> Anewa giro Yesu mene awong yau senu bumuwa eyero sena, “Tawingna emo tuwa mene emo bauno awong sou yaese

---

<sup>f</sup> **20:21** Gitau otu emo tuwara wati mugo namba wan mene emo tuwara wawong mera adungno mitauna. Ora emo tuwara wati mugo namba tu mene emo tuwara wawong mepora adungno mitauna. Arare Yakoboto Yohane awongto susuwa awiya kotupu nasani Yesura wati mugo yero nari sewato.

sinowa. Nupema, emo babuze mene emo bauno puro wosiro awong witao nunae ine yero nowa, awiya gosineya. <sup>26</sup>Ora ninae mene zo ayero oko yae. Ninae-in a zo mene baina yari yero giro enana soremao yero naise. <sup>27</sup>Ora gitau yao yari yero giro enana soumani yero naise. <sup>28</sup>Na Emora Mani mene deka ayero emo bauno na sou yaese okowata, naka natope sou buro nasani nete magayero emo bauno daigairo mekora atu sorero pumari bumuwang.” Ayero sena arauwa.

**Yesu nung Yeriko napora emo etobe kora yenu ditu pagaiwato.**

*Mk 10:46-52; Lu 18:35-43*

<sup>29</sup>Yesu buro-mani nuna aune awong Yeriko napo buwagairo doro bautunewa emo bauno dubu baina amimene awong ago yero bamuwa.

<sup>30</sup>Bautunewa emo ditu guma yao etobe nagibo deungbera atu adungno mitasani Yesu buro bautuniya ayero sewa nigiro yanakana wawa sinasani eyero sewato, “Tuwa, ning Dawidira sai mene nato eno yo aung!”

<sup>31</sup>Yanakana wawa sewato emo bauno mene awongto giro sinasani awang sewa ara. Awang sewa awongto nigiro oko nigao ine yero gewera yero wawa sinasani eyero sewato, “Tuwa, ning Dawidira sai mene nato eno yo aung!” <sup>32</sup>Ayero sewato giro Yesu mene nagibe atu dopero senu bumuwato awongto atata yero sena, “Na no maze nito eno yanese sineito?” <sup>33</sup>Ayero senu abena eyero sewato, “Tuwa, ditu nanato sasa pagaise sinenato.”

<sup>34</sup>Ayero sewato Yesu mene awongto ka eno yo-auno ditu nunato ding yenu mena pagaiwato ara. Ayero yero Yesu ago yewato arauwa.

**Yesu nung emo tuwa mene yaine yero Yerusalem nepe witina.**

*Mk 11:1-11; Lu 19:28-40; Yo 12:12-19*

**21** <sup>1</sup>Yesu buro-mani nuna aune bautunete Yerusalem nepe kasa yari sero nasani aune Betefasi napo Oliwa diri susuwara mitina atu kasa yero Yesu mene buro-mani nuna etobe iyengtit i nasani eyero sena, <sup>2</sup>“Nito baungno napo maingkoka atu mitiya gosineyato auna toiro baungno wo dongki maingne geta yao miteyato awiya tamarineyato. Taungno geta besero puro bumaeto. <sup>3</sup>Nito atu nayato zo mene nito atata yai giro abena eyero seputo, ‘Tuwara buro euna mitiya.’ Ayero sayato mena pugariniya.” Ayero sena arauwa.

<sup>4</sup>Nona awiya tebeba oko kasa yena. Ge porofete zo mene gitau sena awiya me yaise ayero yena ara. Porofete mene ge eyero gaena,

<sup>5</sup> Niye napo Zaiyon auna emo bauno eno eyero tugata yepu nigae: Ewiya gipu! Emo tuwa ninae mene ninae-una butuniya.

Nung dubo wosaore nasani wo dongki tame adungno butuniya.

Nung wo nona-owi dimao auna mani auna tame adungno butuniya.

<sup>6</sup>Arare mani etobe baungno Yesura ge dipunasani <sup>7</sup>dongki aire maingne puro bumuwato taung wori nunae mene tame ero zuwewa

Yesu witina ara. <sup>8</sup>Ayenu emo bauno daigairo mene taung wori nunae dutugairo birigairo nagibe atu ero zuwewa. Ora ena mene zo i gomi kapero nagibe atu ero zuwewa ara. <sup>9</sup>Ayero yero emo bauno witao mene gitauore agore gazero bautu nasani wawa sero eyero sewa, “Oro, oro, Dawidira sai. Tuwara bera butunesa, ning awiya bowi yanene. Uritira atu nowa amimene Tuwa Bayau bowi yaese.” <sup>10</sup>Asinewa Yesu Yerusalem nape witinu napo susuwa awong zabu-butu nasani eyero sewa, “Awe mene butuni nei?” <sup>11</sup>Ayero sewa emo dubu baina amimene abena eyero sewa, “Awiya porofete Yesu. Nung Galilaya tawingna Nasarete nape atu kasa yena amimene butuniya.”

**Yesu mene wina-piti yao emo ena Tuwa Bayaura ibu bainana atu tunena.**

*Mk 11:15-19; Lu 19:45-48; Yo 2:13-22*

<sup>12</sup>Yesu mene Tuwa Bayaura ibu bainana witiro nona wina-piti nasani mitiwa awong awiya tunena ara. Ayero nasani moni darawa yao emora tewo arita emo ni gumo ibu atu zwing pugao auna buro nasani nauwa auna apa adumao awiya ininu kapetegaina. <sup>13</sup>Ayero nasani eyero sena, “Ge gayao zo eyero mitiya era,

Ibu nana awiya isa saora ibu mitaise.

Arata niniae yeteya ibu ewiya ugaing yao emora pungyao masi ine niya.” Ayero sena arauwa.

<sup>14</sup>Ibu bainana atu nenu emo ditu guma yaore asama yaore nuna-una bamuwa kora yena ara. <sup>15</sup>Ayero yenu pirisa babuze aune sao tauyao ge gipao emo awong tani putoungne nuna gigiwa ara. Nupema, mani mamani mene Tuwa Bayaura ibura atu yawa yawa nasani, “Oro, oro, Dawidira sai,” ayero sewa nigawa ara. Arare tani putoungne giro mani mamanina ge nigiro awong tini kapena. <sup>16</sup>Tini kapenu Yesu eno eyero sewa, “Awong emimene ge ewiya sineya nigitinesita?” Ayero sewa abena eyero sena, “Nigitinena. Arata niye ge gayao zo eyao mitiya awiya oko zazagairo gao mene saine neya, awiya!

Mani mamanikaka arita mani wuire auna dubo nunae pumasa eo yai nunae-una bera atu bowi yao nina iwaing kasa yariniya.”

<sup>17</sup>Ayero sero awong doro Yerusalem nape atu wosiro Betani nape yero atu awina arauwa.

**I fik zo mene Yesura bera soyena.**

*Mk 11:12-14, 20-24*

<sup>18</sup>Yesu mene gora-gara napo Betani doro nupema tera Yerusalem witari sero bautunenu meri yena ara. <sup>19</sup>Ayero yenu nagibo deungbera atu i fik zo dopero mitinu giro i susuwara baungno me kau yero gi gege mitinu

giro i aeno eyero sena, “Ning sobe yero me nupema oko iyarinesa.” Ayero sinenu nuna bera i awiya gi nuna irara yenu soyena ara. <sup>20</sup>Ayenu buromani nuna awiya giro wawong di gauno eyero sewa, “I awiya nung nono yero mena soyetyie?” <sup>21</sup>Ayero sewa Yesu mene eyero sena, “Na memoko sane. Niye dubo eto oko yao tumo diyao mere dema narineya amimene tani ira atu kasa yetiya ayao awiya ninae yarineya. Awiya gege oko, niye diri oeno eyero sarineya, ‘Diri, ning zokero witora gute.’ Ge sarineya, auna teng kasa yariniya. <sup>22</sup>Ayero yero tumo diyao mere dema nasani aune nona zota zo no eno isa saya kasa yariniya.” Ayero sena arauwa.

**Yesura putoung auna susuwa gari atata yewa.**

*Mk 11:27-33; Lu 20:1-8*

<sup>23</sup>Yesu mene bautunete Tuwa Bayaura ibu bainana witiro emo bauno uritira ge gipinasani mitinu pirisa babuze aune Yuda emora simai amimene nuna-una baungno nung atata yero sewa, “Ning tani ena yero nosa awiya ana bera yero nosi? Awe mene ning eno senu yero nosi?” <sup>24</sup>Ayero sewa Yesu mene ge abena eyero sena, “Na niye eno atata zo yarinena. Niye abena na eno sarineya, awiya na deka ayero ana bera tani ayero yero noni auna susuwa sarinena. <sup>25</sup>Yohane ge ou suwao buro nuna awiya ana bera nauni, emora berata Tuwa Bayaura bera ing?” Ayero sinasani atata yenu awong ge no sarinenine ayero sinasani dubo gagausewa ara. Ayero yero nuka nuyetope ge wina-se nasani eyero sewa, “Name ‘Tuwa Bayaura bera’ ayero sarinenane, awiya nung eyero sariniya, ‘Arare niye noeno ge nuna oko nigao yewi?’ <sup>26</sup>Name ‘Emora bera’ ayero satenane, arata emo bauno mene name eno iwo yowi sero awang nenane. Noeno oko, awong Yohane gosinauwa porofete me yero nauna.” <sup>27</sup>Ayero sero Yesu eno eyero sewa, “Nae oko gosinenane.” Ayero sewa Yesu mene ge abena eyero sena, “Arare na deka ayero ana bera tani ewiya yero noni auna susuwa oko sarinena.”

**Emo zora mani emodi etobe auna ge eniya.**

<sup>28</sup>Yesu mene eyero sena, “Ungwe diyana nigiro sepu. Emo dekaongkara mani etobe nasani nauwato ara. Arare maung mene mani zo eno eyero sena, ‘Mani, ning yeme baung wain buro yase.’ <sup>29</sup>Ayero senu abena sena, ‘Aungwa. Na bure oko babarinena.’ Ayero sero nete dubo darawa yero bure baungna. <sup>30</sup>Bautunenu maung mene nupema mani zo eno ge dekaongka kamaze tugata yero sena ara. Senu giro mani zo amimene abena eyero sena, ‘Yore, nakara yarinena.’ Ayero sero oko babao kara mitina. <sup>31</sup>Arare niye mani awe mene maung nuna-una ge diungna ayero sarinei?” Atata ayero yenu awong eyero sewa, “Mani ge gitau sena.” Ayero sewa Yesu mene eyero sena, “Na memoko sane. Takis pumao emore towangna baunone awong Tuwa Bayau nata Tuwa nunaе yaise sero

gitau nasani nuna-una mokora toitinaya ninae mene zo ago yari neya.  
 32 Noeno oko, Yohane kasa yero etutero naora nagibo niye eno gipenu niye ge nuna awang yero yangduwa takis pumao emore ugaing baunone mene ge nuna nigiwa ara. Ayero yewa niye gigiwa, arata niye dubo oko darawa yao, o ge nuna oko nigao yewa.” Ayero sena arauwa.

**Wain buro diya yao emo memeko-mameko auna ge eniya.**

*Mk 12:1-12; Lu 20:9-19*

33 Yesu mene eyero sena, “Na ge eniya zo sana nigipu. Emo baina zo mene tawing zora wain urero goma gaero ziuna. Ayero yero wain me mozaora kote baina zo wauno wain buro diya yao emora garo dema yero ayena ara. Ayero aung yero emo ena mene wain buro nuna diya naese sero nung tawing zo ake nibamu auna baungna ara. 34 Baungno nenu wain paora be bunu giro nung me ena pumari kotungno soumani nuna ena iyengtinu baungno diyara una kasa yero sewa giro 35 diya mene iropuro soumani zo puro dero musuna-masuna yewa, ora zo maze zo dewa magayena, ora zo awiya daba mene dewa ara. 36 Ayero yewa burora maung mene nigiro nupema soumani daigairo pugatinaunu bautunauwa nao deka ayao awong eno yero nauwa ara. 37 Ayero nawe duwa giro nung mani yo diyang nuna nibamu amaze eyero kotupu nasani iyengtina ara. ‘Mani nana baungno kasa yai awong giro ge nuna dimarineya,’ ayero sero iyengtinu baungno kasa yenu 38 diya mene mani nuna yo diyang nibamu awiya giro eyero sinasani wina-se yewa ara, ‘Nung amimene nete tawing euna maung yariniya. Arare bungpu, name mani ewiya danane magayai tawing ewiya naname yae.’ 39 Ayero sero nung bure atu musuna-masuna nete puro baungno goma bautara atu dewa magayena ara.”

40 Yesu mene ayero sero susuuno eyero sena, “Arare burora maung nung kasa yero buro diya yao emo eno nono yarinive?” 41 Ayero senu awong eyero sewa, “Nung emo memeko-mameko awiya dai oena-paena nete magayarineya ara. Ayero yero diya iwaing ena buro nuna-una pugai awong me kasa nai giro me puro buro maung eno pugati nasani narineya.” 42 Ayero sewa Yesu mene ge eyero susuuno sena, “Uritira ge gayao zo eyero mitiya, awiya niye zazagati nowita?

Garo yao emo mene daba zo gigiwa meko yenu  
yangduwa ara.

Arata daba amimene garo autura ziwong yero mitoiya.  
Nona awiya Tuwara bera kasa yena, arare emo mene gigenane  
iwaing niya arauwa.

43 Auna sana nigipu. Tuwa Bayau nata Tuwa yero nao auna nagibo awiya ninae-una atu sorero puro dubu zo eno pugarinen. Ayero yana awong buro yero me puro maung eno pugarineya. 44 [Zo nung daba auna tame atu zuwariniya amimene bezariniya. Ora daba amimene

emo zora una tame zuwariniya, awiya emo awiya dai bezero pusupasu yero mamanikaka yariniya.]”<sup>45</sup> Ge eniya ayero senu pirisa babuze aune Farisayo emo awong nigiro eyero sewa, “Oiye, nung name eno siniya.”<sup>46</sup> Ayero sero puro bunari kotungno aune emo bauno mene Yesu nung porofete ayero sero nauwa giro awong emo bauno awang yero yangduwa arauwa.

**Emo bauno ataora ana-bonene auna ge eniya.**

*Lu 14:15-24*

**22** <sup>1</sup>Yesu nung ge eniya zo nupema susuuno sena, <sup>2</sup>“Uritira mitoiya amimene nata Tuwa yero nariniya auna susuwa awiya emo tuwa zo mene mani nuna bauno pumaise sero ana-bonene yena auna pugairo sane. <sup>3</sup>Nung nona sosero buro-mani iyengtinu awong baungno emo bowi mena tugata yena awong awiya yuno puro bari bamuwa ara. Baungno sewa arata awong yangduwa. <sup>4</sup>Yangduwa giro emo tuwa mene buro-mani ena nupema tera iyengtiti nasani eyero sena, ‘Niye baungno emo bowi sao awiya eyero tugata yepu: Na kara nona sosetena mitiya. Wo bulimakao babuzere mamanikaka gawire awiya dema sesena dero aero yeteya ara. Ayero yero nona ewezo nibamu kora-makora yero aung yeteya ara. Arare niye bumaya name emo eno bauno pugati nasani nona mininasani yawa yawa yanene.’ <sup>5</sup>Emo tuwa mene ayero senu buro-mani baungno sewa awong nigiro oko nigao ine yero zanero tere taira yero bamuwa ara. Zo nung buro nuna-una baungnu, zo nung stowa nuna-una baungnu, <sup>6</sup>ora ena mene zo emo tuwara buro-mani sero pusugairo itinasani saniro puro dewa mamagayewa ara. <sup>7</sup>Ayero yewa emo tuwa mene nigiro tini kapenu giro senu gorobo emo nuna mene baungno emo mani dewa magayewa awiya dero aung yero napo nunae kouyewa awena ara. <sup>8</sup>Ayewa emo tuwa nung buro-mani nuna eno eyero sena, ‘Nona sairo sosao mitiya, arata emo bowi sao awiya awong awang yero yangdoteya, arare na awong abena dotinena. <sup>9</sup>Arare niye napo kakamo sero baungno emo tamarineya awiya teng sero puro bumaese sinena.’ <sup>10</sup>Ayero senu buro-mani nuna soma sero baungno emo mekore iwaingne tebe-tabe puro bumuwa augao ibu awiya be buro mitiwa ara.

<sup>11</sup> Mitiwa emo tuwa mene awong gari sero witiro emo zo ana-bonene yaora taung wori aung mitinu giro nung eno eyero sena, <sup>12</sup>‘Otao, ning nono yero ana-bonenena taung wori oko wosogao buro mitesi?’ Ayero senu nung ge titi yero doro mitina ara. <sup>13</sup>Ayenu emo tuwa mene buro-mani nuna eno eyero sena, ‘Niye te wawong nuna bunero au daung mumena gaipu. Atu zi aiyamama sero be kerinasani mitiae.’ ”

<sup>14</sup> Yesu mene ungwe awiya diro aung yero ge susuuno eyero sena, “Yau sao nigao awiya daigairo ara, arata kora yero yangta gairo pumao awiya zo etoka gege.” Ayero sena arauwa.

**Awong Yesu takis buro yaora atata yewa.**

*Mk 12:13-17; Lu 20:20-26*

<sup>15</sup> Yesu mene ayero senu Farisayo awong ewe baungno ge mene wao zo itaine yanane dariniya ayero sero ge diro kora-makora yewa. <sup>16</sup> Ayero nete buro-mani nunae arita Herodera Pati auna memba sao amaze ena tugata yero iyengtiwa Yesura una baungno eyero sewa, “Gipao emo, nae susuwa nina gosinonane. Ning ge iwao ge zo oko sinosa. Me gege sinosa ara. Tuwa Bayaura nagibo awiya nae witaota wosao teng tugata yero nosa nigit nonane. Ning emo witaore wosaore awiya giro awang oko yero nosa. <sup>17</sup> Arare nae ning atata nenane, ning se. Name Yuda emo mene takis moni Roma emora emo tuwa Sisa eno pugati nonane, awiya ning gosinosa teng yero noita aung ing?” <sup>18</sup> Ayero sewa nung dubo nunae-una ge iwao awiya giginu kasa yenu giro eyero sena, “Niye ge iwao emo mene me sao yero nowa. Noeno ge mene na wao itaine nei? <sup>19</sup> Niye takis moni pugati nowa awiya zo gipepu gane.” Ayero senu moni zo taungno gipewa giro <sup>20</sup> nung awong atata yero sena, “Ititire yazore monina mitiya ewiya ana ing?” <sup>21</sup> Ayero senu awong sewa, “Awiya Sisara.” Ayero sewa giro awong eno eyero sena, “Nona Sisara ayero sero giro Sisa eno pugaipu. Ora nona Tuwa Bayaura ayero sero giro Tuwa Bayau eno pugaipu.” <sup>22</sup> Ayero senu awong wawong di gauno doro bamuwa ara.

**Magayaora atu iropao auna Yesu atata yewa.**

*Mk 12:18-27; Lu 20:27-40*

<sup>23</sup> Wari be dekaongka auna atu Sadukayo emo awong Yesura una kasa yewa ara. Emo amimene magayao awong nupema oko iroparineya ayero sinauwa ara. <sup>24</sup> Awong amimene kasa yero atata yero sewa, “Gipao emo, Mose nung ge eyero gaena. ‘Emo zo mene mani aung magayai giro meta nuna mene bauno noi nuna ataise. Ayero yero aune tato nuna eno mani zo pumaise.’ <sup>25</sup> Arare nanae-una towang tatomani metamani 7 nasani nauwa. Arare tato kiyongne nunae mene bauno puro mani oko pumao nawe magayenu, meta nuna wese mene bauno noi nuna awiya atina. <sup>26</sup> Nung deka ayero nete magayenu meta maingkoka zo mene bauno dekaongka amaze nupema atina. Ayero yerota yero ayero butunawe metamani 7 apakana magayero aung yewa ara. <sup>27</sup> Ayero yewa aune bauno noi nunae awiya ago magayena ara. <sup>28</sup> Arare awong apakana bauno dekaongka amaze atiwa, arare be magayao mene nupema iroparineya be aune bauno awiya ana yariniye?” <sup>29</sup> Ayero sewa Yesu mene awong eno eyero sena, “Niye Tuwa Bayaura ge gayao aune Tuwa Bayaura putoung awiya oko gosinowa, aeno ge meba wosopapatineya. <sup>30</sup> Magayao mene iropuro nupema oko wina-ati yarineya. Awong uritira angelo ine yero tebeba narineya. <sup>31</sup> Arare iropaora sineya aeno sane. Tuwa Bayau nung ge eyao niye eno sena amaze niye oko zazagairo gao mene saine neya, awiya! <sup>32</sup> Nung eyero sena,

Na Abrahamto Isaka arita Yakobo auna Tuwa yero nona.

Tuwa Bayau nung emo magayao ayero sero nonane awiya gosinoi seka gege yero nowa. Arare nung emo magayaora Tuwa okowata, nung emo seka mitowa auna Tuwa yero mitoia.”<sup>33</sup> Yesu mene ge ayero senu emo bauno dubu baina amimene ge nuna awiya nigiro wawong di gauno yawa yawa yewa arauwa.

**Sao tauyao ge nomi mene gitau yao baina niye, auna Yesu atata yewa.**

*Mk 12:28-34; Lu 10:25-28*

<sup>34</sup> Yesura ge mene Sadukayo emo puro wosina. Ayero yenu Farisayo awong nigiro au dekaongna gairo <sup>35</sup> otao nunae zo Yudara sao tauyao ge susuwa nigiro baingtao aeno sewa nung Yesu etegari sero eyero sena, <sup>36</sup> “Gipao emo, sao tauyao ge nomi mene gitau yao baina niye?” <sup>37</sup> Ayero senu Yesu mene eyero sena, “Ara tamao nina bainakama awiya Tuwa Bayau nina nuna-una mitaise. Ayero nasani dubore ititire kotumaore nina mene nung sou ye.” <sup>38</sup> Sao tauyao ge amimene sao tauyao ge apakana awiya daigati nasani bainakama niya. <sup>39</sup> Nupema zo eyero mitiya awiya awongto dekaongka neyato ara. ‘Ning nika nitope aratapunosa, deka aine emo ena eno ye.’ <sup>40</sup> Sao tauyao ge etobe amimene Mose aune porofete ge nunae apakana auna gera poza nibamu neyato.” Ayero sena arauwa.

**Yesu nung nuka nutope susuwa nuna-una awong atata yena.**

*Mk 12:35-37; Lu 20:41-44*

<sup>41</sup> Farisayo emo au dekaongna gairo newa Yesu mene awong atata yero sena, <sup>42</sup> “Niye Yuda emora Sorao Emo yazo Kristo aeno no sinowi? Nung sai ana ing?” Ayero senu awong abena eyero sewa, <sup>43</sup> “Nung Dawidira sai.” Ayero sewa Yesu mene abena eyero sena, “Niye Kristo nung Dawidira sai sineya, aune Dawidi noeno Oweno mene gaenu aune Kristo eno ‘Tuwa nana’ ayero seni? Ayero sinena, noeno oko, Dawidi mene eyero sena,

<sup>44</sup> Tuwa mene tuwa nana eno eyero sena,

‘Ning buro wawong me nana-una adungno mitasa na iwo dubu nina awiya benaung nina ina pugana izarinesa.’

<sup>45</sup> Arare aune Dawidi mene Kristo eno Tuwa nana ayero sena ara. Arare Kristo nung nono yero Dawidira sai yariniye?” <sup>46</sup> Ayero sinasani atata yenu awong ge abena kapete gari yero ge kau yewa ara. Ayero yero nung nupema atata yari oko kotumuwa.

**Awong sao tauyao ge gipao emo aune Farisayo auna ge iwao awiya umo yaese sena.**

*Mk 12:38-39; Lu 11:43, 46; 20:45-46*

**23** <sup>1</sup> Be auna atu Yesu mene emo bauno dubu baina aune buro-mani nuna aeno eyero tugata yena, <sup>2</sup> “Sao tauyao ge gipao emo aune Farisayo awong Mosera sao tauyao ge gipao emo yero nowa. <sup>3</sup> Aeno ge

sero gipero ayaya teng nigiro diungpu. Ora nao nunae ami zo ago oko nae. Noeno oko, awong be gege mene sao awiya zo sinowa, arata dimao mene zo oko dipunowa. <sup>4</sup>Awong sao tauyao ge witao nona mouyao ine awiya kora yero gausero diro ninae una tame pugairo dimaese sinowa. Arata nuka nuyetope dimao zo awang sero nowa ara. <sup>5</sup>Nona yero nowa amaze emo mene giro ara tamaese aeno gege yero nowa ara. Awong Tuwara ge ena gaero puro paus mamanikakara pugairo megeteta waweng diro puro naese sao<sup>8</sup>, awiya daigairo paus babuze diro puro nowa, awiya gosineya. Nupema, taung wori bera angsi imokakaung sipunowa kirikoro yero mitoiya, awiya gosinowa. <sup>6</sup>Ayero nasani ana-bonene yero minaora bera atu awong emo baina siya asero nona baina pugaya minari sinowa. Nupema yere ibura atu emo baunona benaungna atu adumari aratapunowa. <sup>7</sup>Emo bauno mene kakame atu awong arugati nasani yazo bowire nunae de ika gaese aratapunowa. Ayero yero yazo nunae gipao emo asaya nigari yawa yero nowa. <sup>8</sup>Arata ninae mene zo emo bauno ena mene niye gipao emo asaese oko sae. Noeno oko, gipao emo ninae dekaongka gege niya. Arare niye apakana otao gamao gege. <sup>9</sup>Ayero yero tawingna emo zo eno ‘gera maung nanae’ oko sae. Maung ninae dekaongka uritira mitiya a gege ara. <sup>10</sup>Awong niye gitau yao asaese adeka dema oko sae. Gitau yao ninae dekaongka awiya Sorao Emo ninae Kristo ara. <sup>11</sup>Zo nung sou ninae yariniya amimene baina ninae yariniya. <sup>12</sup>Zo nung nuka nutope puro wiwitinasani nai giro Tuwa Bayau mene nung puro wosariniya. Ora zo nung wosiro nariniya, awiya Tuwa Bayau mene yazo nuna de ika gariniya.

**Yesu mene Farisayo emo gera pugaina.**

*Mk 12:40; Lu 11:39-42, 44, 52; 20:47*

<sup>13</sup>Oiye, sao tauyao ge gipao emo arita Farisayo. Niye ge iwao emo me sao yero nowa. Emo bauno awong uritira mokora towari sero nowa ninae awong musugairo nasani uritira garo be gazero nowa ara. Niye nika niyetope oko towao nasani aune awong towari sinowa awang sinowa ara. <sup>14</sup>[Oiye, sao tauyao ge gipao emo arita Farisayo. Niye ge iwao emo me sao yero nowa. Niye bauno yu magayao auna wau amaze sorero puro nowa. Ayero nasani pasena ninae worero me sao yero nasani isa

<sup>8</sup> 23:5 Paus megete diyao. Gitau Tuwa Bayau mene ge pungyao zo eyero sena: Ge nana dubo ninae-in a o be ninae-in mitaise. Niye ge nana wawong ninae-in o megoto ninae-in sikigairo diro puro neupu. Awiya awong ge nuna yangduwao eno awang sena. Arata awong ge pungyao auna susuwa oko giro baitao yero nasani ge amaze papiyara gaero singgairo paus mamanikakara pugairo zo wawong mepora zo megete ayero sikigairo diro puro nauwa. Yuda emo witao mene paus amaze isa saora bera gege diro puro nauwa. Arata Farisayo mene zo awong taung nunae puro witari sero paus mamanikaka okowata, paus babuze-babuze amaze be ozaung sikigairo diro puro nasani yero nauwa.

imoko-kaungkaung sinowa. Isa imoko-kaungkaung mene pasena ninae oko worao yatei siya, awiya ago abena ninae meko maingkoka gege pumateya. Arata niye isa imoko-kaungkaung mene pasena ninae worero yero me sao yero nowa, arare auna ago abena ninae mou-mesayao nibamu tamarineya.] <sup>15</sup>Oiye, sao tauyao ge gipao emo arita Farisayo. Niye ge iwao emo me sao yero nowa. Niye emo dekaongka amimene tani ninae ago yaise sero tawingne witore buwagairo bautunowa ara. Arare ayao amimene niye aune dema tairo noi aune niye nung tugata yero nowa nung kowa iyaore auna gerao yero witiro niye daigatinoiya ara. <sup>16</sup>Oiye, gitau yao emo diti guma yetugao. Niye eyero sinowa, ‘Tuwa Bayaura ibu baina auna ikogati nasani sao tauyao awiya piti. Ora Tuwa Bayaura ibu bainana simao nona mitiya auna ikogati nasani sao tauyao amimene zo me.’ Ayero sinowa. <sup>17</sup>Oiye, dau emo diti guma yetugao. Tuwa Bayaura ibu baina awiya dang mitoiya aeno ibura simao nona awiya dang mitoiya ara. Arare nona nomi mene memoko nibamu niye, ibura simao meneta ibu mene niye? <sup>18</sup>O zo eyero sinowa, ‘Aitara ikogati nasani sao tauyao awiya me aung. Ora zawing aita tame mitiya auna ikogati nasani sao tauyao amimene me ara.’ <sup>19</sup>Oiye, emo diti guma yao ine. Aita awiya dang mitoiya aeno nuna-una tame zawing pugao amimene dang yero noiya ara. Arare nona nomi me noiye, zawing meneta aita mene niye? <sup>20</sup>Arare zo nung aitara ikogairo sai tauyai aita arita aita tame nona mitiya awiya dema gamariniya ara. <sup>21</sup>Ora zo nung kara Tuwa Bayaura ibu bainana ikogairo sai tauyai giro ibu baina arita Tuwa Bayau ibu bainana atu noiya awiya dema gamariniya ara. <sup>22</sup>Ora zo nung uritira ikogati nasani sai tauyariniya, awiya Tuwa Bayaura adumao masi aune adumaora maung aune dema gamariniya.

<sup>23</sup>Oiye, sao tauyao ge gipao emo arita Farisayo. Niye ge iwao emo me sao yero nowa. Niye i bure ninae-inna nona piti amaze dubu wawong etobe auna atu dekaongka teng auna Tuwara gerao ayero sero pugatinowa. Ayero nasani sao tauyao gera agewa nona me — emo eno yanenese saota mono pumaota sero dimao — awiya yangdoro nowa wowosinoiya ara. Niye dubu wawong etobe auna atu dekaongka Tuwa Bayau eno pugati nasani nona me awiya dema yatei siya, awiya teng yatiya. <sup>24</sup>Niye gitau yao emo diti guma yao. Niye ou minao ninae auna atu kumisa gutinoi giro awang nasani u pasi pugairo yasagati nowa. Arata wo kamel nona baina awiya niye mena nukinowa arauwa.<sup>h</sup>

<sup>25</sup>Oiye, sao tauyao ge gipao emo arita Farisayo. Niye ge iwao emo me sao yero nowa. Au-tao ninae taung tame gege saitinowa pewayero noiya.

---

<sup>h</sup> **23:24** Kamel nukao. Farisayo awong Tuwa Bayaura sao tauyao ge babuze awiya yangdoro sao tauyao ge nunae mamanikaka awiya ago yero baingtiti nasani nauwa. Aeno Yesu mene sao tauyao ge babuze amaze puro wo kamel auna pugairo sena.

Arata auna mokora dubo-dubo yero ugaing yero nowa auna nona meko amimene be bumao mitiya ara. <sup>26</sup>Farisayo emo diti guma yao. Ning gitau au-tao moko sayasa pewa yai aune taung nuna deka ayero pewa yari niya arauwa.

<sup>27</sup>Oiye, Farisayo, ge iwaoromo me sao yero nowa. Niye biriti simao ayaoyine. Biriti nung buyong asiyang mene simao, arata tura mokora awiya emoweture magayao gungyaore amimene mitiya ara. <sup>28</sup>Niye awiya deka ayao ine taung aingso niniae mene emora benaungna wosewa sao yero nowa. Arata dubo niniae mene zo ge iwaore uritira ge gera gaira yao mene bebumao arauwa.

*Lu 11:47-51*

<sup>29</sup>Oiye, sao tauyao ge gipao emo arita Farisayo. Niye ge iwaoromo me sao yero nowa. Porofetera biriti yero nowa wosewa yero noiya, a nasani ge emo matura biriti sipunowa. <sup>30</sup>Ayero nasani eyero sinowa, ‘Aya ewowo naname nasani nauwa aune natenane, awiya awong aune dema tairo porofete oko dero sisigatenane.’ <sup>31</sup>Ewowo niniae gitau porofete dedunauwa awiya niye ge ayero sinasani aune saisibuna nunae yero nowa auna susuwa niniae awiya keregatineya ara. <sup>32</sup>Arare porofete daora buro aya ewowo niniae mene zayewa, awiya yero besugaipu! <sup>33</sup>Niye yi mani. Niye yira mani awiso. Pasenana abena kowa iyaore auna babao awiya nugu yai niye nono yero daigarinei? <sup>34</sup>Arare na eyero sinena ara. Na naka natope porofete aune kotumao emo arita gipao emo ena niniae-inaiyengtana baya niye ena daya mamaga yarineya, ora ena awiya i pasaora darineya, ora ena zo yere ibu niniae-inatu waung mene darineya, awong ena ago iniro tunaya napo sero babaya baungno pupunasani dedunasani ayero yarineya. <sup>35</sup>Ayero naya tawingna atu emopewa yetugao awiya dedunauwa mamaga nauwa auna abena niniae-inakasa yariniya ara. Gitau yemaoko otu emopewyao zo yazo Abel awiya dewa magayena auna atu gorobo zayena awiya bumao gege butu nawe dunu niniae Berekayara mani Zekaraya nung aita tumana atu dewa magayena auna abena awiya niniae-inakasa yariniya. <sup>36</sup>Na memokoba niye eno sane. Gorobo apakana auna pasenana abena awiya emo bauno yeme tawingna etu neya auna-una kasa yariniya.

**Yesu mene Yerusalem napo susuwa eno sero zi sero yena.**

*Lu 13:34-35*

<sup>37</sup>O Yerusalem emobauno, Yerusalem emobauno. Niye porofete dedunowa magayero nowa. Nupema Tuwa Bayau mene ge emoniniae-inaiyengtitinoi butunowa awong awiya daba mene dedunowa magayero nowa. Kokora ai mene mani awiso nuna wati wese pugairo sanitinoiye deka ayao ine nane emobauno niye puro pu dekaongna gari yero nona

niye awang sinowa. <sup>38</sup>Arare Tuwa Bayau mene napo ninae yangduwai yanero mitariniyi, awiya gipu. <sup>39</sup>Sana nigipu. Niye na oko gao nasani nete eyero sinasani aune na nupema garineya, ‘Tuwara bera butuniya nung awiya bowi yanene.’” Yesu mene ayero sena arauwa.

**Yesu mene Tuwa Bayaura ibu baina disaya aung yariniya auna ge sena.**  
*Mk 13:1-2; Lu 21:5-6*

**24** <sup>1</sup>Yesu nung Tuwa Bayaura ibu bainana atu kasa yero bautunenu buro-mani nuna mene nuna-una baungno ibu bainana garo gipari sewa. <sup>2</sup>Ayero yewa nung ge abena eyero sena, “Nona apakana miti gosineya auna na memoko sana nigipu. Iwo mene ibu kasero disaya aung yariniyi. Ibura daba zo oko duwaya zora una tame mitariniyi.”

**Ago yaya-biyaya tawingna etu kasa yariniya auna ge sena.**  
*Mk 13:3-13; Lu 21:7-19*

<sup>3</sup>Yesu nung Oliwa diri witiro adungno mitinu buro-mani nuna mene nata nuna-una baungno atata yero sewa, “Nona sesesa awiya be nazi kasa yariniyi? Ora kasa yao be nina, o tawing aung yaora be awiya nugu nai tani nomi kasa yai ganane kasa yariniyi?” <sup>4</sup>Ayero sewa Yesu mene eyero tugata yena, “Emo ena mene dubo ninae sisiganeya, umo yero baingtiti nasani neupu. <sup>5</sup>Noeno oko, emo witao amimene kasa yero esega nana una yero eyero sarineya, ‘Na Kristo Sorao Emo ninae era.’ Ayero sinasani emo bauno daigairora dubo sisigarineya. <sup>6</sup>Niye winade nugu etu narineya awiya gosinasani aune nupema winade-wanade ake-akemo otu narineya auna bowi dema nigarineya. Nigiro awang oko yae. Nona awiya gitau kasa yaise sao mitiya. Nona ayao ine kasa yariniyi, arata tawingna be mena oko aung yariniyi. <sup>7</sup>Dubu zo mene iropuro emo tuwa enana dubu aune dema winade-wanade yarineya. Dora botiyo babuze kasa yerota kasa yero yariniyi. Nupema, dumi babuze iperota ipero yariniyi. <sup>8</sup>Bauno mani pumari yero nowa yaya gitau mena maingkoka zayero noiya. Arata ago yaya bainakama kasa yero noiya. Ayao ine yaya sesena awiya kasa yai aune yaya bainakama ago kasa yariniyi, awiya garineya.

<sup>9</sup>Be auna atu emo ena mene niye puro iwora waweng pugaya puro dedunasani gainasani ayero daya mamaga yarineya. Tawing sero sero auna emo bauno mene na eno tini kapao pupunasani niye buro-mani nana aeno iwo yarineya ara. <sup>10</sup>Be aune emo daigairo amimene uritira ge yangduwarineya. Doro ge wina-se nasani otao nunae awiya puro pu iwora waweng gairo iwo wina-ye yarineya ara. <sup>11</sup>Ora porofete ge iwao daigairo mene kasa yero emo daigairo auna dubo sisigarineya ara. <sup>12</sup>Uritira ge dao mene bainakama yariniyi susuwa aeno emo bauno daigairo auna mono pumao buro awiya aung yariniyi ara. <sup>13</sup>Arare zo nung uritira ge puro iniro takasero nasani tauyero dopero nete

magayariniya nung awiya Tuwa Bayau mene sorero pumariniya. <sup>14</sup>Tuwa Bayau nata Tuwa yero nariniya auna ge bowi amimene tawing sero sero teng babai emo dubu gitu mene nigaya aune be aung yariniya arauwa.

**Nona meko nibamu zo kasa yariniya.**

*Mk 13:14-23; Lu 21:20-24*

<sup>15</sup>Arare nona meko nibamu gera yao, porofete Daniel mene nona auna ge gaena, amimene ibu bainana masi dang auna dopai garineya ara. (Ge zazagatinesa amimene nigiro baingti.) <sup>16</sup>Ayao ine kasa yai giro Yudaya tawingna mitarineya amimene awang yero sungno baungno diri naese. <sup>17</sup>Ayero nasani zo nung garo nuna-una opesara atu mitariniya amimene nona-owi nuna gare mitiya awiya pumari oko towaise. <sup>18</sup>Ora zo nung bure atu nariniya amimene taung wori nuna doti mitiya awiya pumari oko kapetegairo nape babaise. <sup>19</sup>Oiye, bauno mesare arita bauno mani wuire, awong yanakana sumao ine teng oko, arare na awong eno yo apunena. <sup>20</sup>Awang yero sungno babao ninae awiya wara be aune ta Sabat iya auna atu kasa yai wa meneta Sabat iyara sao tauyao ge mene niye gazao eno, Tuwa isa sepu. <sup>21</sup>No eno oko, be auna atu mou bainakama kasa yariniya ara. Tawing kasa yena atu zayero butunawe duwa mou zo ayao ine oko kasa yena. Arata ago zo ayao ine nupema oko kasa yariniya. <sup>22</sup>Arare Tuwa mene be awiya oko kapao yatiya, awiya emo bauno apakana sisigairo aung yateya. Ora nung dubu gerao nuna eno yero aune be awiya kapena, arare apungkaka yariniya ara.

<sup>23</sup>Arare be aune emo zo mene niye eno eyero sai oko nigae, ‘Era Sorao Emo naname ara.’ Ora, ‘Sorao Emo naname ora.’ Ge ayao ine sero buro baungno ayaya oko nigae. <sup>24</sup>Be auna atu Sorao Emo ge iwao enane porofete ge iwao enane amimene kasa yarineya. Kasa yero emora dubo sisigari sero tani putoungne ena arita tani benaung seká ena witao awiya yarineya. Ayero nasani Tuwa Bayaura dubu gerao awiya dema dubo sisigari sero buro yarineya ara. Arata awong Tuwa Bayaura dubu gerao auna dubo sisigao ine teng oko, arare yero tetere yarineya ara. <sup>25</sup>Na nona ago kasa yariniya auna ge niye eno bere-bere sinena.

<sup>26</sup>Arare aune ‘Kristo soma emo aung auna atu kasa yeti gigenane,’ ayero saya oko gari babae. Ora ‘Garo mokora atu pungyero miti gigenane,’ awiya dema ayero saya oko nigae. <sup>27</sup>Noeno oko, bibiya mene papari-papari yero noi wari witaora atu baung deung enaba wari wosaora yero aung yero noiya, deka ayao ine na Emora Mani mene kasa yarinena.

<sup>28</sup>Buro awinoi ni owa mene iyao boingsa giro downinowa.

**Ago Emora Mani bumari niya.**

*Mk 13:24-27; Lu 21:25-28*

<sup>29</sup>Yaya kokoni yao iware dema aung yai aune wari mume yariniya. Ayero yai inona waegao awiya dema aung yariniya. Arasa uritira atu zokero wosariniya.

Ayero nai aune putoung uritira mitowa amimene iparineya.<sup>30</sup> Ayero yai aune Emora Mani auna owe uritira atu kasa yai tawing sero sero auna emo bauno amimene zi sinasani mitaya aune na Emora Mani mene uritira bereze tame atu putoungne waegao bainane aune dema kasa yana garineya ara.<sup>31</sup> Arare to baina pisaya ge sai na angelo dubu nana iyengtana tawing ageware ageware ikata enaka auna baungno dubu gerao nana pumarineya ara.

*Mk 13:28-31; Lu 21:29-33*

<sup>32</sup> Niye i fik auna tani awiya kotungno aune susuwa zo gipu. Bowang nuna botu kasa yero dang iwaing ditinowa be aune niye giro, ‘O warira be nugu niya,’ ayero sero nowa ara.<sup>33</sup> Arare nona awiya apakana kasa yero aung yai giro eyero sepu, ‘Nung nugu yetiya. Be towaora bautara dodopiniya.’<sup>34</sup> Na meba sane. Emo bauno yeme tawingna etu neya amimene oko magayero aung yao naya aune tani awiya apakana kasa yero aung yariniya ara.<sup>35</sup> Ago uritire tawingne awongto disero aung yarineyato ara, arata ge nana mene zo oko disero aung yariniya.

**Yesu kasa yaora be nuna awiya oko gosinenane.**

*Mk 13:32-37; Lu 17:26-30, 34-36*

<sup>36</sup> Ora tani kasa yariniya auna wari beta aua be awiya emo zo mene oko gosiniya. Uritira angelo awong deka ayero oko gosineya. Na Mani nuna deka ayero oko gosinena. Mama nung nata gosiniya.<sup>37</sup> Tani gitau Noa wangna oko witao aune yero nasani nauwa deka ayao ine naya aune na Emora Mani kapete gairo bumarinena.<sup>38</sup> Awong wabamu baina oko dao aune nona pupu nasani mini nasani ayero nasani bauno wina-darawa yero atiti nasani nauwa. Ayero nasani kara nauwita ayero sero newa Noa wangna witina ara.<sup>39</sup> Witinu awong wabamu baina dero butunena awiyaoko gao mitiwa ou baina buro awong nukero aung yena ara. Emora Mani auna kasa yao bera atu deka ayero yarineya.<sup>40</sup> Be auna atu emo etobe bure atu nayato na zo puro zo yangduwarinena.<sup>41</sup> Bauno etobe ma yeti nasani mitayato na zo puro zo yangduwari nena.<sup>42</sup> Tuwa ninae mene be nazi kasa yariniye, awiya niye oko gosineya, arare dubo ninae diya yero baingtiti nasani neupu.<sup>43</sup> Niye susuwa eyero gipu. Garo zora maung mene ugaing emo pingne bumariniya awiya gatiya, awiya nung sekia ayero mitasani garo nuna diya yero baingtai ugaing emo oko towatiya.<sup>44</sup> Arare Emora Mani auna kasa yao be oko gao nasani na oko bumarinena ayero sinaya be aune bumarinena. Ayao eno niye kora makora nasani neupu.

**Kasa yao be nuna awiya diya yanenese sero soumani zora pugairo sena.**

*Lu 12:41-48*

<sup>45</sup> Niye soumani iwaing yero neupu. Soumani iwaing nung kotumao iwaing puro nai giro emo tuwa nuna mene nung soumani nuna apakana

diya yaise sariniya. Nung awong diya nasani wo ma awong eno pugatinaise sariniya ara. Emo tuwa nuna mene buro ge awiya nung eno pugairo doro baungno nariniya. <sup>46</sup>Arare soumani amimene buro nung eno sao awiya teng dipunasani nai, emo tuwa nuna mene kapete gairo buro nuna-una me giro tani iwaing nung eno yai yawa yawa yariniya. <sup>47</sup>Na memokoba sane. Emo tuwa nuna mene diya buro baina soumani eno pugati nasani nona nuna apakana diya yaise sariniya. <sup>48</sup>Ora soumani awiya nung diya buro nuna pore nasani dubo nuna mene eyero sariniya, ‘Emo tuwa nana mene mena oko kapete gariniya. Nete ago kapete gariniya.’ <sup>49</sup>Ayero sinasani emo bauno sou buro yero nowa awiya dero gera gaira nasani otao nuna ena ou tauyao miniro dau yero nowa awong aune dema ana-bonene nasani ou tauyao mini nasani ayero nasani dau yarineya ara. <sup>50</sup>Ayero nasani nete emo tuwa nuna kapete gaora be awiya oko gao nasani nung mena oko kapete gariniya ayero sinasani nai, emo tuwa nuna kapete gairo bumariniya. <sup>51</sup>Buro soumani awiya yanakana wezero dero ge iwao emo awong abena tamarineya masi deka auna pugariniya. Atu zi aiyamama be kerero sinasani engweze-pangweze nasani mitariniya arauwa.

### Baunodidi wawong etobe auna ungwe.

**25** <sup>1</sup>Be baina awiya kasa yai aune uritira mitoiya amimene nata Tuwa yero nariniya auna susuwa awiya eyero kasa yariniya. Na sou baunodidi 10 auna pugairo sana nigipu. Emo zo mene bauno gerao nuna atari sero bauno gerao auna maungna una bauna. Bautunenu sou baunodidi 10 amimene emo awiya nagibe atu taungno puro bumari sero damana nunae puro bamuwa ara. <sup>2</sup>Baunodidi 5 awong awiya dau, ora 5 awong mene zo kotumaore. <sup>3</sup>Arare dau mene damana nunae gege pumuwa ara. Garewa nunae ou oko sukuno pumao. <sup>4</sup>Arata kotumaore mene damana nunae puro ou garewara dema sukuno puro aune bamuwa ara. <sup>5</sup>Arare emo awiya mena oko bumao, nimoj nenu awong diya mitete magayero giro auriti awinewa ara. <sup>6</sup>Auriti awinewa ping towang daung singsang gainu aune wawa zo eyero kasayena, ‘Emo butuniya. Iropungpu, baungno tamanenel’ <sup>7</sup>Arare baunodidi 10 awong nigiro giro iropuro damana nunae kora-makora yewa ara. <sup>8</sup>Ayero newa baunodidi dau awong iropuro baunodidi kotumaore aeno eyero sewa, ‘Nae damana nanae sikipuniya, arare niye nae eno ou sukungpu’ <sup>9</sup>Ayero sewa baunodidi kotumaore mene abena awong eno ge eyero kapetegaiwa, ‘Aung ara. Ou name apakana auna teng oko yarinita nowa. Arare niye stowara baungno ou niniae zuma gaero pungpul’ <sup>10</sup>Ayero sewa giro awong ou zuma gayari bautunewa emo awiya kasa yena. Arare sou baunodidi 5 nona kora yero damana nunae aune dopero mitiwa awiya yuno ataora ana-bonene yari maungna gare toiwa. Gare toiro garo be

gazero ana-bonene nasani mitiwa ara. <sup>11</sup> Atu mitiwa baunodidi dau awong ago buro wawa sinasani eyero sinewa, ‘O Tuwa nanae, be towao iwe!’ <sup>12</sup> Wawa sinewa abena eyero sena, ‘Na memoko niye eno sane. Na niye oko gosinona!’ Ayero sena ara.” <sup>13</sup> Yesu mene ayero sero ge susuuno eyero sena, “Niye be awiya oko gao, arare diya yero baingtiti nasani neupu.” Ayero sena arauwa.

**Yesu nung soumani etama mene moni pumuwa auna pugairo sena.**  
*Lu 19:11-27*

<sup>14</sup> Yesu mene eyero sena, “Uritira atu mitoiya amimene nata Tuwa yero nariniya auna susuwa gaese sero na soumani etama auna pugairo sane. Emo tuwa zo mene ake-akemo babari sero diya dubu nuna gurutu dekaongna gairo moni nuna diya yaese bono yena. <sup>15</sup> Ayero nasani soumani zo eno K5,000 pugairo zo eno K2,000 pugairo zo eno K1,000 pugaina ara. Awiya moni tamaora putoung nunae teng gosinasani pugaina. Moni pugairo aung yero nung doro baungna ara. <sup>16</sup> Nung bautunenu soumani moni K5,000 pungna amimene moni awiya puro buro yero susuunota susuuno ayero nenu K5,000 ayao teng kasa yenu moni nuna K10,000 yena. <sup>17</sup> Ora otao nuna K2,000 pungna nung deka ayao buro yenu K2,000 susuunu moni nuna K4,000 yena. <sup>18</sup> Arata soumani K1,000 pungna amimene emo tuwa nuna-una moni puro baungno mutenu mitina ara.

<sup>19</sup> Arare emo tuwa nunae be imoko-kaungkaung nawe kapetegairo buro kasa yena ara. Kasa yero soumani moni diya nauwa awiya au dekaongna gairo moni puro buro yewa nono yao kasa yeni, awiya saese sena ara. <sup>20</sup> Asenu giro K5,000 pungna amimene kasa yero K5,000 pugairo K5,000 zo susuuno eyero sena, ‘Tuwa nana, ning K5,000 na eno pugasa awiya na puro buro nawe dotena K5,000 ayao teng nupema kasa yetiya era!’ <sup>21</sup> Ayero senu emo tuwa nuna mene eyero sena, ‘Soumani iwaing ge dimaore. Ning nona maingkokaka awiya iwaing diya yasa, arare nane ning nona bainakamana diya pugarinena ara. Arare ning bung, na emo tuwa nina aune dema yawa yawa yaneno!’ <sup>22</sup> Ayero senu soumani K2,000 pungna awiya kasa yero eyero sena, ‘Emo tuwa nana, ning moni K2,000 na eno pugasa, awiya nane puro buro nawe dotena K2,000 ayao nupema kasa yetiya era!’ <sup>23</sup> Ayero senu emo tuwa nuna mene eyero sena, ‘Soumani iwaing ge dimaore. Ning nona maingkokaka awiya iwaing diya yasa, arare nane ning nona bainakamana diya pugarinena ara. Arare ning bung, na emo tuwa nina aune dema yawa yawa yaneno!’ <sup>24</sup> Ayero senu ago moni K1,000 pungna amimene kasa yero eyero sena, ‘Emo tuwa nana, na susuwa nina eyero gosinona. Ning emo kokoniyo. Emo zo mene nona bure urinoiya awiya ning me nuna pupunosa. Ora tawing agewa zo auna emo zo mene wuit me augatinoi kosoyero zapunoi

ning wuit me nuna pupunosa. <sup>25</sup> Arare na aeno awang yero moni nina mutewang mitoiya. Arare yeme na moni nina ning eno pugatinena era!'  
<sup>26</sup> Ayero senu emo tuwa nuna mene abena eyero sena, 'Ning soumani meko timara. Emo zo mene nona bure urinoi me nuna pupunona, o emo zo mene wuit me augatinoi kosoyer zapunoi pupunona, awiya gigesa me yetiya ayero sinesa, arare <sup>27</sup>ning na eno ayero kotupunasani moni nana awiya moni diya yao emo eno pugasa buro yaya zapunai kasa yero pumatena, awiya teng yatiya.' Ayero sero soumani ena eno eyero sena,  
<sup>28</sup> 'Arare niye moni nuna sorero K5,000 puro noiya aeno pugaipu pumae.  
<sup>29</sup> Zo nung nona nung eno pugao awiya puro nasani amimene buro yai giro ena susuuno nung eno pugarinena. Ayero yana aune zamena-simena nuna-una kasa yariniya ara. Arata zo nung nona nung eno pugao awiya puro nasani amimene buro oko yao yai giro na nona maingkokaka nuna-una mitiya awiya sorero pumarinena. Ayero yana nung aung nariniya.  
<sup>30</sup> Ora soumani timara nung awiya puro ake mumena augaya atu zi aiyamama sinasani engweze-pangweze nasani mitaise.'

**Yesu mene ago name awega-ziwega yariniya.**

<sup>31</sup> Nete ago na Emora Mani mene uritira waegao nana aune angelo dubure dema kasa yero Tuwara adumao masi simao zineka yao auna atu adungno mitarinena. <sup>32</sup> Ayero nasani tawing sero sero auna emo bauno pu dekaongna gana nana-una augarineya. Ayero yaya wo diya mene lamane memene awega-ziwega yero noiya deka ayero na emo bauno awega-ziwega yero <sup>33</sup>lama awiya beraung nana-una atu dubu zo gurutu yarinena ara. Arata meme zo nana-una bautara atu dubu zo gurutu yarinena. <sup>34</sup> Ayero yero na Tuwa mene beraung nana-una atu mitarinanya awong aeno eyero sarinena, 'Mama nana mene gao yena niye bungpu, uriti napo ninae topetae. Napo awiya gitau yemaoko tawing kasa yena be auna atu niye eno gerena. <sup>35</sup> Noeno okowata, niye na eno eyero yewa: Na meri magayewang giro niye na eno ma pugaiwa; na oure magayewang giro niye na eno ou pugaiwa; na esewa nasani mitao masi kau newang giro niye na kora-makora yewa; <sup>36</sup> na taung wori kau yewang giro niye na eno taung wori zo pugaiwa; na yaya pumuwang giro niye na eno yo-amuwa; na bunao gare mitiwang niye na soremuwa.' <sup>37</sup> Ayero sana etutero nao mene ge eyero kapetegarineya, 'Tuwa, ning natu meri magayasa ning eno nona pugaingwine? Ora ning natu oure magayasa ning eno ou pugaingwine? <sup>38</sup> Ning natu esewa nasani mitao masi kau nasa ning kora yewingne? Ora ning naina atu taung wori kau nasa nae ning eno taung wori pugaingwine? <sup>39</sup> Nupema ning natu bunao gare atu yayare mitasa ning kora yewingne?' <sup>40</sup> Ayero saya na Tuwa mene eyero sarinena, 'Na memokoba niye eno sane. Niye otao mani nana wowosigao auna zo kora-makora yewa, awiya niye na eno yewa ayero niya ara.'

<sup>41</sup> Na awong eno ayero sero aune nana bautara mitarineya awong aeno eyero sarinena, ‘Kowa iyaore auna gerao niye. Niye na doro baungpu, iyao tauyao Mama nana mene Sanda angelo dubu nuna aune eno kou yenu awao gege awinoiya auna atu nae. <sup>42</sup> Noeno okowata, niye na eno eyero yewa: Na meri magayewang giro niye na eno ma oko pugao yewa; na oure magayewang niye ou na eno oko pugao yewa; <sup>43</sup> na esewa nasani mitao masi kau newang niye na oko kora yao yewa; na taung wori kau newang niye na eno taung wori oko pugao yewa; na bunao gareta yayare mitiwang niye na oko kora yao yewa.’ <sup>44</sup> Ayero sana nana bautara mitarineya amimene eyero sarinena, ‘Tuwa, ning natu ma kau nasani, ou kau nasani, mitao masi kau nasani, mo kau nasani, yayareta bunao gare mitasa nae ning oko soremao yewingne?’ <sup>45</sup> Ayero saya na eyero sarinena, ‘Na memoko sane. Niye otao mani nana wowosigao auna zo awiya oko kora yao yewa, awiya na eno oko yao yewa ayero niya ara.’ <sup>46</sup> Ayero sana awong gera yao masi auna nape babarineya. Orata etutero nao mene nao me iwaing auna nape babarineya.” Yesu mene ayero sena arauwa.

**Awong Yesu dari opene ge diwa.**  
*Mk 14:1-2; Lu 22:1-2; Yo 11:45-53*

**26** <sup>1</sup> Yesu nung ge awiya apakana sinete sero aung yero buro-mani nuna eno eyero sena, <sup>2</sup> “Wari be etobe aung yai aune Magayao mene awong Daigaina auna iya be kasa yariniya, awiya gosineya ara. Arare be auna atu awong na Emora Mani i pasaora magayanese sero puro emora waweng pugarineya.” Ayero sena ara.

<sup>3</sup> Arare be auna atu pirisa babuze aune Yuda emora simai awong pirisa baina yazo Kayafa nuna-una augao gare witiro <sup>4</sup> Yesu opene puro dari ge diwa ara. <sup>5</sup> Ayero nasani eyero sewa, “Emo bauno yo-dubo uwanane tini kapai gorobo yowi sero, oregao be baina aune oko yanene.” Ayero sewa ara.

**Bauno zo mene Yesu ou sereyao suwenu pungna.**  
*Mk 14:3-9; Yo 12:1-8*

<sup>6</sup> Yesu mene Betani nape baungno Simon bozo tauyaore nenu kora yena auna gare atu nona mininasani mitinu <sup>7</sup> bauno zo mene nuna-una baungno ou sereyao zuma bainakamane garewa daba mene yao auna sukumao, awiya puro nuna-una ziye yasagainu suwena ara. <sup>8</sup> Ayero yenu buro-mani nuna mene giro dung yero eyero sewa, “Nona zuma bainane awiya noeno gera niye? <sup>9</sup> Amimene moni witao tamai emo bogamasa eno pugaoware.”

<sup>10</sup> Ayero sewa Yesu mene nigiro awong eno eyero sena, “Niye noeno bauno eno ge bautara sinei? Bauno nung na eno mono pupuni iwaing niya. <sup>11</sup> Emo bogamasa awong niye aune dema be gitit yero nowa

narinuya. Arata nane mene zo niye aune dema oko nao gege narinena. <sup>12</sup> Na be maingkokaka nete magayana mutarineya. Arare nung bere-bere taung nana siuno sosiniya. <sup>13</sup> Na memokoba sana nigipu. Bowi Iwaing tawing sero sero bautunai aune tani iwaing na eno yetiya auna bowi awiya dema sero sero ayaya babariniya.” Ayero sena arauwa.

**Yudas mene Yesu keregairo iwora waweng pugari moni pungna.**  
*Mk 14:10-11; Lu 22:3-6*

<sup>14</sup> Arare buro-mani nuna 12 nunae-una zo yazo nuna Yudas Iskeriot, nung amimene pirisa babuzera-una baungno <sup>15</sup> eyero sena, “Na Yesu keregairo pu wawong ninae-una gana niye na eno moni nazigo pugarinei?” Ayero atata yenu awong silva moni 30<sup>i</sup> zazagaiwa pungna ara. <sup>16</sup> Puro Yesu gera pugaora nagibo tamari buro yena arauwa.

**Yesu nung buro-mani nuna aune dema Magayao mene awong Daigaina auna bonene miniwa.**  
*Mk 14:12-21; Lu 22:7-14, 21-23; Yo 13:21-30*

<sup>17</sup> Magayao mene awong Daigaina auna iya be kasa yenu Yuda emo bauno mene yis semini nasani newa aune Yesura buro-mani mene nung atata yero sewa, “Nae yeme garo natu Magayao mene awong Daigaina auna bonene nina sairo kora-makora yanenese kotupunesi?” <sup>18</sup> Ayero sewa nung abena eyero sena, “Niye Yerusalem nepe baungno emo zo gitau sewang gigiwa aeno eyero sepu nigae: ‘Gipao emo nanae nung ning eno eyero siniya: Be nana nugu niya, arare nina-una buro buro-mani aune dema Magayao mene awong Daigaina auna bonene minarinanane sinena,’ ayero sepu gae.” Yesu mene ayero sena ara.

<sup>19</sup> Yesu mene ge awiya senu buro-mani nuna mene diungno Magayao mene awong Daigaina auna bonene sairo kora-makora yewa ara.

<sup>20</sup> Ture inu Yesu nung buro-mani nuna 12 puro Yerusalem baungno garo auna witiro Magayao mene awong Daigaina auna bonene miniwa ara.

<sup>21</sup> Mininasani Yesu mene eyero sena, “Na memokoba sane. Niniae-una zo mene na keregairo iwora waweng pugariniya.” <sup>22</sup> Ayero senu buro-mani nuna dubo mininasani dekaong dekaong nung atata yero sewa, “Tuwa, na eno sinesita?” <sup>23</sup> Ayero sewa nune eyero sena, “Na aune dema ame sura dusarinanato nung amimene na keregariyi.” <sup>24</sup> Na Emora Mani mene nagibo na eno sero gaewa auna babari sero nena ara. Arata emo na keregariyi nung awiya, oiy! abena nuna nono yao pumariniye? Ai nung oko pumao yatiya, awiya nung meko oko yatiya.” <sup>25</sup> Ayero senu Yudas keregao emo amimene deka ayero nung atata yero sena, “Gipao emo, na eno sinesita?” Ayero senu abena eyero sena, “Sinesa ara.” Ayero sena arauwa.

<sup>i</sup> 26:15 Silva moni 30. Awiya moni baina oko. Moni awiya K60 ayao ine gege ara.

**Yesu mene bonene pugaina.**

*Mk 14:22-26; Lu 22:14-20; 1 Kor 11:23-25*

<sup>26</sup> Awong nona mininasani mitiwa Yesu mene poro puro Tuwa Bayau eno dange sero eegairo buro-mani nuna eno pugatinasani eyero sena, “Puro minipu. Ewiya goi nana.” <sup>27</sup> Ayero sero awang ou wainne zo puro Tuwa Bayau eno dange sero awong eno pugatinasani eyero sena, “Niye apakana amimene minipu. <sup>28</sup> Ewiya yu nana. Yu amimene Tuwa Bayau aune tairo nao auna ge inai tau yariniya. Emo bauno daigairo auna pasena disaise yasagarinena. <sup>29</sup> Sana nigipu. Na ou wain yeme mininenane ewiya doro oko minao nete Mama nana nata Tuwa yai aune niye aune dema ou wain seka zo minarinanenane ara.” Ayero sena ara. <sup>30</sup> Awong yere zo gauno aune iropuro Yerusalem doro baungno diri yazo Oliwa auna witiro mitiwa ara.

**Petoro mene nung bewae yariniya auna ge sena.**

*Mk 14:27-31; Lu 22:31-34; Yo 13:36-38*

<sup>31</sup> Nagibe atu bautunasani aune Yesu mene eyero sena, “Ping eune niye apakana awang yero na doro zanarineya. Noeno okowata, ge gayao zo eyero mitiya awiya me yariniya,

Na Tuwa Bayau mene wo sipsip diya emo dana magayai wo sipsip sisi-bura-bura yarineya.

<sup>32</sup> Arata na magayaora atu iropuro Galilaya tawingna babana niye ago bumarineya.” <sup>33</sup> Ayero senu Petoro mene eyero sena, “Awong apakana ewiya iwo awang yero ning yangduwaya nane zo ning oko yangduwarinena.” <sup>34</sup> Ayero senu Yesu mene eyero sena, “Na memoko sana nigi. Nine ping eune kokora ge oko saore na bewae yasa be etama yariniya.” <sup>35</sup> Ayero senu Petoro mene eyero sena, “Awong na ning aune dema daya magayanese sarineya, arata saineba, na ning oko bewae yarinena.” Ayero senu buro-mani otao mani ena mene deka ayero nung soreuno sewa ara.

**Gesemani i burora bamuwa isa sena.**

*Mk 14:32-42; Lu 22:39-46*

<sup>36</sup> Yesu buro-mani nuna aune bautunete i buro zo yazo Gesemani auna kasa yero Yesu mene buro-mani nuna eno eyero sena, “Niye etu adungno mitaya nane zo otu baungno isa sarinena.” <sup>37</sup> Ayero sero Petoro aune Zebedira mani etobe puro bamuwa ara. Bamuwa Yesu nung dubo mininasani dubo mou yenu <sup>38</sup> awong eno eyero sena, “Na dubo minao bainane tapunena dubo minao mene na puro wosi magayanese niya. Arare niye na aune dema etu seka mitasani umo neupu.” <sup>39</sup> Ayero sero awong doro baungno ake yero ditu benaungne nuna pu tawingna gairo

eyero sinasani isa sena, “Mama nana, ning nigasa yaine yao yai giro yaya baina ewiya na daigae. Arata ge nana okowata, ge nina mene me yaise.”

<sup>40</sup> Isa ayero sero mani etamara-una kapetegairo awong auriti awinewa giro Petoro eno eyero sena, “Niye na aune dema aua dekaongka gege seká yero mitao teng oko, awiya! <sup>41</sup> Niye etegaora atu iyangyao eno, seká yero mitasani isa sepu. Dubo ninae mene buro iwaing yaora eo niya, arata taung mene zo mou niya.” Ayero sena ara.

<sup>42</sup> Arare nung nupema baungno ge eyero sinasani isa sena, “Mama nana, yaya baina ewiya na daigaise nigasa teng oko yao yai giro saineba diungno aung yana ge nina mene me yae.” <sup>43</sup> Isa ayero sero kapetegairo buro-mani awong diti morenu auriti awinasani mitiwa gigina ara. <sup>44</sup> Giro doro nupema baungno isa senu be etama yena. Ge gitau sena deka awiya sinasani isa sena ara. <sup>45</sup> Isa sero aung yero buro maingna-una kapetegairo eyero sena, “Niye auriti gege awinasani miteya. Be kasa yetiya. Emora Mani keregeya pasena emora waweng wiwitinena. <sup>46</sup> Keregao emo butuniya. Iropungpu, nunae-una babanene.”

### Iwo mene Yesu pumuwa.

*Mk 14:43-50; Lu 22:47-53; Yo 18:3-12*

<sup>47</sup> Ayero sinenu buro-mani 12 auna otao nunae Yudas mene iwo dubu baina gitau yenu kasa yewa ara. Iwo dubu awiya pirisa babuze aune Yuda emora simai amimene iyengtiwa gorobo yari sero iwire ami dawangne puro buro kasa yewa ara. <sup>48</sup> Gitau keregao emo mene iwo dubu baina eno ge zo gipero eyero sena, “Emo nane saniro toko yarinena, nuka ara. Nung awiya saniro pumarineya.” <sup>49</sup> Arare kasa yero mena Yesura-una baungno, “O gipao emo nana,” ayero sero toko yena. <sup>50</sup> Ayero yenu Yesu mene eyero sena, “Otao, buro nina yari sero bumesa awiya ye aung yae.” Ayero senu awong buro nung puro wawong bunewa ara. <sup>51</sup> Anewa Yesu aune dema newa auna-una zo mene iwi nuna geingna atu ininu gururu senu pirisa bainana soumani awiya dari yero dawong nuna kesena ara. <sup>52</sup> Ayero yenu Yesu mene eyero sena, “Iwi nina geingna pugai towae. Zo nung gorobo yariniya amimene abena nuna deka awiya gorobo tamariniya. <sup>53</sup> Ning susuwa nana mitiya awiya oko gao nasani aeno ayero nesita? Mama nana eno isa sana yemeneka keune angelo 70,000 pugai wosiro na soremateya, arata dotinena. <sup>54</sup> Ayero wosiro na soremaya ge gayao mene nagibo nana eyero kasa yaise sinoiya amimene nono yero me yariniye?” <sup>55</sup> Ayero sero emo dubu baina nung pumari bumuwa aeno eyero sena, “Niye iwire ami dawangne puro butuneya, awiya gorobo emo zo puro bunari bumaine neya. Be giti awiya na niye aune dema ibu bainana atu yero nona niye atu noeno na oko pumao yero nowi? <sup>56</sup> Arata tani ewiya porofete mene ge gaewa awiya me yero aung yaise kasa niya.” Ayero senu buro-mani nuna awong apakana nung doro zanero aung yewa ara.

**Awong Yesu puro pirisa baina auna gare witiro ge buro yewa.**

*Mk 14:53-65; Lu 22:54-55, 63-71; Yo 18:13-14, 19-24*

<sup>57</sup>Emo Yesu iniro saniwa amimene nung puro baungno pirisa baina yazo nuna Kayafa auna gare puro witiwa. Garo auna atu sao tauyao ge gipao emore simaire amimene augairo mitiwa ara. <sup>58</sup>Yesu puro bautunewa Petoro nung ake atu ago nasani pungyero-pungyero baungna ara. Bautunete kasa yero pirisa baina auna-una goma mokora toina ara. Toiro pirisa bainana soumani auna-una towang atu eyero sero adungno mitina, “Yesura ge nono saya tau yariniye, etu mitasani nigane.”

<sup>59</sup>Arare pirisa babuze arita gitau yao dubu awong teng mitasani emo zo mene Yesu eno ge iwai Yesu gera pugairo daya magayaise sero ge iwao ge yangtaka-betaka yewa ara. <sup>60</sup>Ayero nasani ge iwao daigairo sewa kasa yenu nigiwa mou oko yao yenu giro ge iwao ge iwaing zo tamari sero buro nasani mitiwa. Ayero nasani mitiwa emo etobe iropuro eyero sewato, <sup>61</sup>“Yesu nung eyero senu nigliwangto, ‘Nane Tuwa Bayaura ibu baina kasero wari be etama gege aung yai nupema yana doparininya. Na ayero yao ine teng.’ Ayero senu nigliwangto ara.” <sup>62</sup>Ayero sewato pirisa baina amimene iropuro Yesu eno eyero sena, “Ning noeno ge nina sineyato auna abena oko sao bora bora yero mitesi?” <sup>63</sup>Ayero senu Yesu mene ge abena oko sao bora bora yero dopero mitina ara. Ayero yenu pirisa baina mene nupema atata yero sena, “Tuwa Bayau putoungne auna benaungna ning atata yana se tau yae. Ning Yuda emora Sorao Emo yazo Kristo, Tuwa Bayaura Mani meta aung ing?” <sup>64</sup>Atata yenu Yesu mene eyero sena, “Sinesa ara. Arata zo sana nigipu. Nete na Emora Mani mene Tuwa Bayau Putoungne auna wawong mera atu adungno mitana garineya. Na uritira bereze tame adungno mitana wosiro buro kasa yai garineya.” <sup>65</sup>Ayero senu pirisa baina amimene ge awiya niginu meko yenu nung taung wori nuka nuna ininu kerenu emo dubu nuna eno eyero sena, “Nung Tuwa Bayau daigari nasani siniya, arare name noeno emo ena buro nung gera pugaese sarinenine? <sup>66</sup>Ge meko awiya nika niyetope nigiro no sarinei?” Ayero senu awong eyero sewa, <sup>67</sup>“Nung magayaora gerao niya ara.” Ayero sero Yesura benaungna begura pisero nung dero musuna-masuna yewa ara. Anewa ena mene zo wawong petata yero nung sowena dero <sup>68</sup>nung eno eyero sewa, “Oiye, Sorao Emo Kristo. Ning porofete me yai giro se, emo ning deduniya auna yazo aweni?”

**Petoro mene Yesu bewae yena.**

*Mk 14:66-72; Lu 22:56-62; Yo 18:15-18, 25-27*

<sup>69</sup>Ayero nasani newa Petoro nung goma mokora napo kakame atu mitina ara. Mitinu soumani baunodi zo mene nuna-una baungno eyero sena, “Ning amimene Yesu Galilaya emo oune dema nosa ara.” <sup>70</sup>Ayero

senu nung emo mitiwa auna beraungna atu bewae nasani eyero sena, “Ning ge sinesa awiya na kau nena.” <sup>71</sup> Ayero sero iropuro goma towao bera ina baungno mitinu nupema soumani baunodi zo mene giro emo atu mitiwa aeno eyero sena, “Emo ewiya nung Yesu Nasarete napora aune dema noiya.” <sup>72</sup> Ayero senu Petoro mene Tuwa Bayaura beraungna senu tau yenu nupema bewae nasani eyero sena, “Na emo owiya oko gosinona.” <sup>73</sup> Ayero sero dodopinenu be apungkaka aung yenu emo mitiwa amimene Petorora-una baungno eyero sewa, “Nae ge mapu nina nigitinenane Galilaya emora ge ine niya. Ning meba dubu nuna-una zo ara.” <sup>74</sup> Ayero sewa nung nupema Tuwa Bayaura beraungna ge eyero senu tau yena, “Na ge iwarinena, awiya Tuwa Bayau na dai magayarinena. Na emo awiya oko gosinona.” Ayero sinenu kokora mene ge sena ara. <sup>75</sup> Petoro kokora ge nigiro Yesu mene gitau nung eno ge eyero sena awiya kotungna. “Kokora ge oko saore nine na bewae yasa be etama yariniya.” Nung ge awiya kotungno kasa daung yero zi bainakama sena ara.

**Yudas keregao emo mene awong Yesu puro baung Pilatora-una yewa  
giro nung muri zuwena.**

*Mk 15:1; Lu 23:1-2; Yo 18:28-32*

**27** <sup>1</sup>Iya gainu pirisa babuzere simaire awong au dekaongna gairo Yesu daya magayaise sewa tau yena ara. <sup>2</sup>Ayero yero sewa Yesura wawong etobe bunero puro Romana emo tuwa Pilato auna-una bamuwa ara.

*Apo 1:18-19*

<sup>3</sup>Magayaise sewa tau yena awiya Yudas keregao emo mene nigiro giro, “noeno ayero yeteni?” ayero sero dubo nuna meko yenu moni pugaiwa awiya puro baungno pirisa babuzere simaire aeno pugaina ara. <sup>4</sup>Ayero nasani eyero sena, “Na were-were yero emo pasena aung awiya keregina pumeya.” Ayero senu awong eyero sewa, “Nae no yanenese buro sinesi? Awiya nona nina gege.” <sup>5</sup>Ayero sinasani moni awang sewa puro baungno Tuwa Bayaura ibu bainana atu augainu witinu nung doro baungno muri zuwero magayena ara.

<sup>6</sup>Ayero yenu pirisa babuze mene moni silva awiya yangtagairo pu dekaongna gairo eyero sewa, “Moni ewiya dao magayaora zuma, aeno ibu bainana awangna puganane oko teng yariniya.” <sup>7</sup>Asero awong moni amimene no yarinene ayero sero wina-se nete sewa teng yenu moni awiya puro baungno au yao emora tawing agewa zo zuma gaewa ara. Emo esewa buro magayaya atu mutaya biriti esewara yaise sero zuma gaewa ara. <sup>8</sup>Arare tawing auna yazo “Yu Zuma Gayaora” ayero sewa tau yenu mitoiya ara. <sup>9</sup>Arare porofete Yeremiara ge me yena ara. Ge awiya eyao era,

Isreli emo awong zuma nuna  
silva moni 30<sup>j</sup> ayero sewa ara.

<sup>10</sup> Emo moni silva 30 amimene au yao emora  
tawing zuma gaewa ara.  
Tuwa mene na eno sena deka ayero yewa.

**Pilato mene Yesu i pasaora magayaise sewa niginu tau yena.**

*Mk 15:2-15; Lu 23:3-5, 13-25; Yo 18:33-19:16*

<sup>11</sup> Awong Yesu puro bamuwa emo tuwara benaungna dopenu emo tuwa mene atata yero sena, “Ning Yuda emora emo tuwa ing?” Ayero senu Yesu mene eyero sena, “Yore, sinesa ara.” <sup>12</sup> Ayero sena ara. Arata be pirisa babuzere simaire mene nung gera pugari sero ge sewa be aune nung ge abena oko sao yena. <sup>13</sup> Ayero yenu Pilato mene atata yero sena, “Ning eno ge mou-mesa yao sineya awiya nigitinesita?” <sup>14</sup> Ayero senu Yesu mene ge abena oko sao bora bora yero mitinu emo tuwa mene giro wawong di gauna ara.

<sup>15</sup> Magayao mene awong Daigaina auna iya sero emo tuwa nung Yuda emo zo yazo yau sinawa emo awiya bunao gare atu besero ayero nasani nauna. <sup>16</sup> Arare be auna atu gorobo emo meko nibamu zo bunao gare mitina yazo nuna Barabas. <sup>17</sup> Arare emo apakana augairo dodopinewa Pilato mene atata yero sena, “Emo zota zo besanese sinei? Na Barabas besanese sineita Yesu nung emo tuwa Kristo asineya, nung awiya besanese sinei?” <sup>18</sup> Pilato mene ayero sena, noeno okowata, Yesu mene buro nasani naunu emo bauno Yudara gitau yao emo yangdoro nuna-una bautunauwa aeno gitau yao emo mene nung eno tini kapao puro nung puro buro nuna-una newa, ayero gigina.

<sup>19</sup> Be aune emo tuwa nung ge sao tau yao masi nuna-una adungno mitinu bauno nuna mene ge eyero pugainu baungna, “Ning emo dang auna ge osina zo oko sase. Noeno okowata, na yeme atiyo yero nung aeno yaya baina tapunete gigena.”

<sup>20</sup> Arare pirisa babuzere simaire awong emo bauno dawong gaero eyero sewa, “Barabas ao-diro Yesu daese sepu.” Ayero sewa. <sup>21</sup> Arare emo tuwa mene nupema atata yero sena, “Zota zo besanese sinei?” Ayero senu awong eyero sewa, “Barabas.” <sup>22</sup> Ayero sewa nung atata yero sena, “Ayero Yesu Sorao Emo Kristo ayero sinowa nung eno nono yarineni?” Ayero atata yenu be kerero zayero wawa sero eyero sewa, “Nung i pasaora magayaise.” <sup>23</sup> Ayero sewa Pilato mene nupema atata yero sena, “Noeno ayero sinei? Nung pasena no yени?” Ayero senu awong atata auna susuwa oko sao yangdoro wawa sero eyero sewa, “I pasaora magayaise.”

<sup>24</sup> Ayero sewa Pilato ge sero tetere yero giro winade bainakama kasa yoiye sero awang nasani senu soumani ou puro bumuwa nung Yuda

<sup>j</sup> 27:9 Soremao Ge zo Matiu 26:15 auna atu mitiya awiya gi.

emora benaungna atu wawong nuna sainasani eyero sena, “Emo pewayao ewiya dao magayao auna pasena awiya nana-una oko mitaise. Awiya nona ninae gege.”<sup>k</sup> 25 Ayero senu awong be kerero wawa sero eyero sewa, “Dao magayao nuna auna pasena awiya nae aune saisibuna nanae auna-una mitaise.” Ayero sewa ara.

26 Ayero sewa Pilato mene senu Barabas besewa kasa yenu awong Yesu angsi wo tata mene yao<sup>k</sup> amimene wezewa ara. Wezinete duwa aune Pilato mene Yesu i pasaora daya magayaise sero gorobo emora waweng pugaina ara.

**Gorobo emo mene Yesu izewa.**

*Mk 15:16-20; Yo 19:2-3*

27 Pilatora gorobo emo ena mene Yesu puro Roma emo tuwara gare witiro sewa gorobo emo apakana nuna-una augaiwa ara. 28 Augatinasani Yesura taung wori dutugairo taung wori yuyao wosogaiwa pungna. Awiya emo tuwara taung wori wosogaine yewa pungna. 29 Ayero yero angsi dungne puro ewero aune ziyo nuna-una atu wosogaiwa ara. Ayero yero itu zo pugaiwa wawong me mene puro dopena ara. Ayero dopero mitinu nuna-una nugu baungno boma gaero nung izinasani eyero sewa, “Iya iwaing, Yuda emora emo tuwa.” 30 Ayero sero begura pisinasani itu sorero puro nung ziye dewa ara. 31 Ayero nasani nung izinasani nete gorobo emora taung wori dutugairo yangdoro taung wori nuna awiya nupema wosogaiwa pungnu i pasaora dari sero puro bamuwa ara.

**Yesu i pasaora dewa magayena.**

*Mk 15:21-32; Lu 23:26-43; Yo 19:17-27*

32 Puro bautunete nagibe atu emo zo tamuwa yazo nuna Simon, nung Sairini napora. Awong nung taungno ato sewa Yesura i pasao soreuno diunu bamuwa ara. 33 Bautunete tawing zo yazo Goligata, ge naname-una “Gitau Atora Wetu,” atu kasa yewa. 34 Kasa yero ou wain puro ou dokowang yao yaya nuwegaora ou aune dema dawero pugaya minaise pugaiwa miniro giro yangduna ara.

35 Ayero yero nung i pasaora dewa ara. Dero aune taung wori nuna itagi yero pumari sero ge tuwao zo yazo nuna laki awiya yewa ara. Ayero aune taung wori nuna bono yero pumuwa ara. 36 Ayero nung diya nasani adungno mitiwa ara. 37 Ika i pasao tame atu susuwa nouna nung dewi auna ge eyero gaero pugaiwa mitina, “Ewiya Yesu, Yuda emora emo tuwa.” 38 Emo ugaing mani etobe nung aune dema i pasaora dero zo enaba zo enaba ayero pugaiwa dopewato ara.

---

<sup>k</sup> 27:26 Angsi wo tata mene yao, awiya wo tata gege okowata, seni tauyao ta nona ena diyao amimene wo tatare dema buro yao ara. Nona ayao mene mani dedunauwa yaya baina tapunauwa.

<sup>39</sup>Masi auna atu emo puma-sauma nasani Yesu izero nung eno eyero sewa, <sup>40</sup>“Ae, ibu baina kasero wari be etama aune ibu seka yari sasa amimene taung aingso nina gera yaora atu sore. Ning Tuwa Bayaura mani me nosi siya, arare ning nika nitope i pasaora atu wosi dopase.” <sup>41</sup>Pirisa babuze aune sao tauyao ge gipao emore simaire awong deka ayero nung izinasani sewa, <sup>42</sup>“Nung gitau emo ena soreuno kora yero nasani nauna, arata nung nuka nutope soremao ine teng oko ara. Nung Isreli emora emo tuwa naname noita, aeno i pasaora atu yeme wosai nung Sorao Emo naname me ayero sarinenane. <sup>43</sup>Nune ‘Na Tuwa Bayaura Mani’ asinasani Tuwa Bayau tumo didinoiya, arare Tuwa Bayau mene nung aratapu nasani giro nung sorero pumaise ganene.” <sup>44</sup>Ayero sewa pasena emo etobe dema awongto Yesu deka ayero izewato ara.

### Yesu magayena.

*Mk 15:33-41; Lu 23:44-49; Yo 19:28-30*

<sup>45</sup>Ayero nung eno newa wari ditu 12 kilok yenu mume baina kasa yero tawing teng yero mitinu 3 kilok yena ara. <sup>46</sup>Arare 3 kilok yenu aune Yesu mene wawa sero eyero sena, “Eli, Eli, lema sabaktani.” Ge naname-una, “Tuwa Bayau nana, Tuwa Bayau nana, ning nono yero na dotinesi?” <sup>47</sup>Ayero senu dopero mitiwa auna ena mene nigiro eyero sewa, “Nung Eliya yau siniya.” <sup>48</sup>Aune zo mene nigiro mena sungno baungno witora yabutata zo puro wain dokowang yao dusero itura diro Yesu mene minaise sero pugainu witina ara. <sup>49</sup>Ayero yenu ena mene giro eyero sewa, “Ning yangdo. Eliya mene buro nung batagairo pugai wosarinita, awiya ganene.”

<sup>50</sup>Ayero sinewa Yesu nung nupema wawa bainakama senu oweno aung yenu magayena ara.

<sup>51</sup>Magayenu ibu bainana mo bainakama<sup>1</sup> kimegao awiya ika atu zayero kerero dao etobe yena ara. Dumi bainakama ipenu daba babuze bebezegaiwa. <sup>52</sup>Ayero yenu biriti be gausenu ge emo gitau magayao ena mene seka yewa ara. <sup>53</sup>Ayero yewa ago Yesu nung nuka nutope gitau yero iropunu aune awong biriti nunae-una atu iropuro Yerusalem napo dang auna baungno emo bauno daigairo auna-una kasa yewa gigiwa ara.

<sup>54</sup>Gorobo emora gitau yao aune gorobo emo nuna ena awong Yesu diya nasani dopero mitiwa amimene dumine nona enane dema kasa yena

<sup>1</sup> 27:51 Mo bainakama. Tuwa Bayaura ibu baina auna mokora atu masi etobe mitauna. Zo awiya yazo nuna Masi Dang. Pirisa emor duwu mene wari be sero masi auna toitinasani buro nunae yero nasani nauwa. Ora masi zo bautara atu mitauna yazo nuna Masi Dang Nibamu pewayao auna towao be amaze mo bainakama mene gazinasani nauna. (Hibru 9:1-7 awiya zazagairo gi.) Yesu magayenu aune mo bainakama awiya kerena, awiya name pirisa aung Tuwa Bayaura benaungna atu kasa yao ine teng susuwa awiya ganenese kerena ara.

awiya giro awang yero sewa, “Emo ewiya kara meba Tuwa Bayaura Mani ara.”

<sup>55</sup>Mani bauno daigairo Yesu Galilaya tawingna atu ago yero nasani sou buro nauwa amimene ake ina atu dopero tani awiya gosinasani mitiwa ara. <sup>56</sup>Nunae-una ena awiya Maria Madala napora, aune Maria yazo nung Yakoboto Yosefera ai, nupema Zebedira mani etobe auna ai dema.

**Yesu mutewa.**

*Mk 15:42-47; Lu 23:50-56; Yo 19:38-42*

<sup>57</sup>Ture inu aune Arimatia napora emo waure zo yazo nuna Yosefe, nung Yesura ge nigitinasani nauna, amimene baungno kasa ye <sup>58</sup>Pilatora-una gairo Yesura taung aingso pumari senu nigina ara. Nigiro taung aingso pumaise gorobo emo eno senu yangduwa. <sup>59</sup>Yangduwa Yosefe mene taung aingso puro mo neyangyao sekawa zo imoko-kaungkaung mene ewero <sup>60</sup>puro baungno daba uma sekawa wamao biriti gerao nuka nuna auna atu Yesu pugairo daba bainakama zo dereme yenu baungno be gazenu yangdoro baungna ara. <sup>61</sup>Ayenu biriti auna bera atu Maria Madala napora nung yazoreto adungno mitiwato ara.

**Gorobo emo ena mene Yesura biriti umo yewa.**

<sup>62</sup>Fraide ture weno dung mume yenu Sarerera be zayewa be aune pirisa babuze Farisayore awong au dekaongna gairo Pilatora-una bamuwa ara. <sup>63</sup>Baungno eyero sewa, “Emo tuwa nanae, nae ge zo kotupunenane, awiya sanane. Ge iwao emo omimene nung seka nasani eyero sero nasani nauna, ‘Na magayero wari be etama aung yai aune seka yero iroparinena.’ <sup>64</sup>Gitau nung seka nasani aune nuka nutope Sorao Emo Kristo ayero sero naunu meko yero nauna. Arata yeme awiya buro-mani nuna mene baungno taung aingso nuna ugaing puro tara yero aune, ‘Nung magayaora atu iropuro seka yetiya,’ ge asero name eno ge iwaya meko yore yariniya. Arare awong ayero yowi sero, ning ge sasa gorobo emo mene baungno diya yero baingtitinaya wari be etama aung yaise.” <sup>65</sup>Ayero sewa Pilato mene awong eno eyero sena, “Gorobo emo pugatinena. Arare niye puro baungno pugaipu umo yero baingtiti nasani mitae.” <sup>66</sup>Ayero senu awong gorobo emo aune dema baungno daba be gazao awiya angsi mene diwa. Ayero yero angsi osina besaya mitai gari sero angsi osina etobe awiya i saora mung mene dewa saneneungna ara. Ayero yero gorobo emo ena biriti diya yaese pugairo ayero yewa ara.

**Yesu iropuna.**

*Mk 16:1-10; Lu 24:1-12; Yo 20:1-10*

**28** <sup>1</sup>Sabat iya aung yenu Sande gora iya gatinenu Maria Madala napora nung yazo nuna auneto biriti gari sero bamuwato ara.

<sup>2</sup>Bautunewato dumi bainakama ipenu Tuwara angelo zo mene uritira atu wosiro daba dereme enaba yenu baungnu nung tame adungno mitina ara.

<sup>3</sup>Benaung nuna awiya zayang-zayang nasani waegatinena. Taung wori nuna imoko-kaungkaung awiya neyangyao, bereze ine ara. <sup>4</sup>Arare diya emo awong giro awang yero wetu ipenu zuwero mamagayaao ine yero mitiwa ara.

<sup>5</sup>Ayero mitiwa bauno etobe baungno kasa yewato angelo mene eyero sena, “Nito awang oko yaeto. Na gosinena. Nito Yesu i pasaora dao awiya gari sero butuneyato. <sup>6</sup>Arata nung etu oko mitiya. Nung gitau niye eno sena deka ayero iropumiy. Nito bungputo, masi nuna gaeto. <sup>7</sup>Diti moko ninato mene giro aune mena baungno buro-mani nuna eno eyero seputo: Yesu nung magayaora atu iropuro Galilaya tawingna gitau bautuniya. Arare niye baungno nung atu garineya. Ge kara sinena ara.” <sup>8</sup>Angelo mene ayero senu giro awongto awang yero biriti doro mena kapetegairo sungno bamuwato. Arata awongto yawa yawa bainakama dema yero buro-mani nuna eno bowi sari sero sumao gege sungno bamuwato ara. <sup>9</sup>Bautunewato Yesu mene nagibe atu awongto taungno eyero sena, “Gora iwaing.” Ayero senu awongto nuna-una nugu koing gairo te nuna iniwato ara. <sup>10</sup>Ayero yewato Yesu mene eyero sena, “Nito awang oko yaeto. Baungno otao mani nana sayato Galilaya tawingna baungno na garineya.” Ayero sena ara.

### **Gorobo emo mene baungno ge ungwe yewa.**

<sup>11</sup>Bauno etobe bautunewato biriti diya nunae-una ena mene mena sungno baungno nape atu pirisa babuze eno ungwe didinasani tani kasa yena auna ungwe diro aung yewa. <sup>12</sup>Ayero sewa nigiro awong simaire dema augairo ge sero nigiro ayero aune gorobo emo eno moni witao pugatinasani eyero sewa, <sup>13</sup>“Niye eyero sepu, ‘Pingne auriti awinenane buro-mani nuna mene kasa yero aingso nuna ugaing puro babeya.’ <sup>14</sup>Ge awiya emo tuwa mene nigiro niye eno nona zo yao eno awang oko yae. Nae nung zawaigairo sanane nigariniya.” <sup>15</sup>Ayero sewa gorobo emo mene moni awiya puro ge sewa awiya dimuwa ara. Arare ge iwao ge awiya Yuda emora-una teng yena. Teng yero mitioya mitiya.

### **Yesu mene diri atu kasa yero buro nuna awiya buro-mani nuna eno sero pugaina.**

*Mk 16:14-18; Lu 24:36-49; Yo 20:19-23; Apo 1:6-8*

<sup>16</sup>Buro-mani 11 awong Galilaya tawingna diri zo gitau Yesu mene awong eno sena auna witiwa ara. <sup>17</sup>Witiro nung maze giro nuna-una baungno kokoing gaiwa ara. Dekaong dekaong mene dubo gagausewa ara. <sup>18</sup>Arare Yesu mene nunae-una nugu baungno eyero sinasani tugata yena, “Putoung baina uritira aune tawingna aune apakana na eno

pugairo aung yao. <sup>19</sup>Arare niye tawing sero sero bautunasani emo bauno dubu sero ge tugata yaya nigliro awiso nana yae. Ayero nasani Mama, Mani aune Oweno auna yazora susupunasani ge ou suwepu pumae. <sup>20</sup>Wini ge sero gipero ayero nona amaze gipecu diungno aung yae. Sana nigipu. Na wari be gitii niye aune dema nana tawingna be aung yariniya arauwa.”